

**NATIONAL ASSEMBLY OF  
SEYCHELLES**

*Monday 14<sup>th</sup> November, 2022*

*The Assembly met at 9am*

*National Anthem*

*Moment of Reflection*

*Mr Speaker in the Chair*

**MR SPEAKER**

Bonzour Manm Onorab. Bonzour nou Zofisye Lasanble. Nou piblik ki swiv nou e byenveni pou nou travay lasemenn. Nou pou kontinyen avek konsiderasyon *Appropriation Bill* dan en pti moman.

Me Onorab *Leader* Biznes Gouvernman Onorab Georges in demann mwan, pou adres Lasanble lo en *matter of privilege*. Mon a donn li laparol.

**HON BERNARD GEORGES**

Mersi Mr Speaker. Bonzour Mr Speaker. Bonzour tou bann koleg Onorab dan Lasanble. E bonzour tou bann dimoun ki pe swiv nou dan lakour.

Mersi Mr Speaker pou donn mwan sa loportinite pou *raise en matter of privilege*

bomaten. Mr Speaker parey nou tou nou konnen, e parey Onorab Pillay ti fer nou rapel ler i ti ganny *interview* lo SBC semenn pase, laliberte lekspresyon i enn nou drwa pli enportan.

Dan Lasanble sa laliberte i telman enportan ki nou privez i ganny proteze menm dan Konstitisyon nou pei e i pa kapab ganny met an kestyon par okenn Lotorite. Dan son repons lo Bidze 2023 en Manm mon *Caucus* Onorab Naddy Zialor ki pa la ozordi, aköz i pe reprezant Lasanble dan en Konferans *La Tanzanie*, Onorab Zialor ti koz kler lo plizyer size e i ti fer serten deklarasyon politik for. Sa pa'n fer serten Manm e siporter Parti *US* plezir e nou konpran zot.

Me Mr Speaker laliberte lekspresyon i pa lot ki laliberte pou en dimoun dir, sa ki en lot dimoun pa kontan ouswa pa anvi tande. Se sa labaz sa laliberte, e se sa ki Onorab Zialor in fer - pa plis, pa mwens.

Malerezman nou pei e pou nou la demokrasi swivan diskour Onorab Zialor, serten dimoun in poste lo rezo sosyal en seri reaksyon ki enkli menas kont Onorab Zialor e zot in fer sa dan bann term vremen enkyetan. Sa bann *post* i menm denigre Onorab Zialor, aköz son

kapabilite fizik e fer menas vyolans kont li.

Sa Mr Speaker set en menas kont privelez en Manm Lasanble, e an konsekans en menas kont privelez tou Lasanble pou nou koze san konsekans. Mr Speaker permet mwan pou dir Onorab Zialor ki nou *Caucus* isi dan sa Lasanble, i onor li koman en frer pou sa ki i ete e nou pa war okenn diferans ant li ek nou.

**(APPLAUSE)**

**HON BERNARD GEORGES**

Si i annan en diferans se ki, Onorab Zialor i pli Onorab e pli brav ki bokou parmi nou, akoz in annan kouraz pou li sirmont bann difikilte ki lavi in met dan son semenn, *including* sanz son prop direksyon politik.

Koman *Leader Caucus LDS* dan Lasanble Mr Speaker, mon annan en devwar pou fer tou Seselwa rapel ki laliberte lekspresyon i annan limit. E mon oule lo lapar nou *Caucus* deklare ki sa bann kalonmni e menas fizik ki'n ganny fer kont Onorab Zialor in depas sa limit e napa plas dan lespas piblik nou pei.

Nou kapab agase par sa ki en dimoun in dir, nou kapab mekontan. Nou kapab menm ganny blese part parol. Me napa

rezon pou pa annan en diskord sivilize, olye fer menas vyolans ki en lofans anba Kod Penal ouswa denigre kondisyon en imen.

Pir ankor, mon konpran ki serten sa bann dimoun ki'n poste sa bann parol i annan plas enportan dan sistenm ledikasyon nou pei, e i me annan koneksyon tre pros avek Manm *US* dan sa Lasanble.

Olye servi sa ba pozisyon e koneksyon pou edik nou pep, zot i prefere denigre e fer menas kont en zanfan Bondye. Lo lapar nou *Caucus* Mr Speaker, mon kondann op pli o nivo sa bann reaksyon inakseptab. Mon repet nou sipor pou nou frer Onorab Zialor.

E mon demann sa Lasanble enkli bann Manm lo lot kote latab lo kote *US*, pou disosye zot avek sa bann parol e sa bann menas. E ansanm koman en Lasanble renouvle nou sipor pou Onorab Zialor, kondann sa bann aksyon e demann Lotorite konsernen pou pran desizyon apropiye kont sa ki responsab. Mersi Mr Speaker.

**(APPLAUSE)**

**MR SPEAKER**

Bon, nou pa pe antre dan en deba lo sa *matter of privilege*.

Mon pou - koman i en *matter of privilege* - mon pou donn en *ruling* lo la. Me selman *Leader* Lopozisyon in lev son lanmen pou koze, si i ti a kontan siport sa lapel mon a donn li laparol. Onorab Pillay.

### **HON SEBASTIEN PILLAY**

Mersi Mr Speaker. Mersi. Bonzour. Bomaten mon'n ekout atantivman *Leader* Zafer Gouvernman e bann komanter ki in fer atraver son *matter of privilege*.

Mon pa la pou kestyonn son *matter of privilege*, aköz mon ti pe lev mon lanmen baze lo lefe ki in *raise* en *matter of privilege* pou mwan osi *raise* en *matter of privilege*. Mon krwar sa ki nou bezwen realize dan nou pei se ki, ozordi en kantite komanter i ganny fer lo tou dimoun ki koze dan sa Lasanble.

Par egzanp mwan menm mwan Mr Speaker, i annan bann portre vilger ki'n pase ki denigre mwan e fer bann latak personnel lo mwan personnelman. In annan latak personnel ki'n ganny fer pou *threaten* mwan avek vyolans fizik dan en group ki apel "Wavel 2025."

In annan latak personnel ki'n ganny fer avek manm mon fanmir dan en group ki apel

"Wavel 2025." A plizyer repriz mon pa'n reponn sa bann latak me i menm annan dimoun ki apre ki zot in fer serten sa bann latak in menm sey apros serten manm mon fanmir, pou koz lo vyolans ki zot anvi fer anver mwan personnelman, e lezot serten Manm *United Seychelles* espesyalman Onorab Johan Loze.

Alors ler nou pe dir ki nou kondann sa bann aksyon, mon ti a kontan osi demann bann Manm lo kote *Caucus LDS*, pou disosye zot avek sa bann Manm dan group "Wavel 2025" ki pe fer sa bann komanter ki zot pe atak e *threaten* avek vyolans d bann Manm lo kote *United Seychelles*.

E lefe ki ou decide pou ou donn en *ruling* lo sa size Mr Speaker, mon ti ava demann avek ou popu analiz tou sa bann komanter ki'n ganny fer pei ler nou'n komans prezant Bidze, e pou ou decide parey mon ti dir ou en pe letan pase pou decide ki Lasanble i pran en pozisyon lo ler en Manm i koze, pour ki en Manm pa ganny atake an deor pou sa ki in dir.

Prezan lo en pwen Mr Speaker ki mon ti a kontan fer kler. Ler mwan mon'n koze mon pa'n atak siporter *LDS*. Mon'n koz lo Bidze e mon'n kritik

pozisyon Gouvernman LDS. Mon bann Manm lo mon kote latab in fer menm parey. Nou'n reste ferm pou pa atak personnn personnelman oubyen atak siporter LDS. Akoz nou konnen e nou konsyan ki i ana dimoun ki siport LDS ozordi ki ti siport nou e i visversa.

Me lefe i reste ki nou koman Manm Lasanble nou bezwen osi konsyan sa ki nou dir e sa ki nou fer. Alors ...

### **MR SPEAKER**

... Onorab ou pe al an deor la. Reste lo size menas e vyolans anver Manm Lasanble.

### **HON SEBASTIEN PILLAY**

Si mon pou retourn lo sa pwen menas e vyolans anver Manm Lasanble Mr Speaker, mon annan en portre lo mon telefonn ki en dimoun in anvoy mwan ki'n ganny fer lo mwan.

Sa portre i dekrir mwan koman plizyer keksoz e mwan mon en dimoun ki'n marye mon annan mon zanfan, mon annan en relasyon avek mon madanm. E sa portre osi i fer serten alegasyon anver mwan. Alors mon demann mon lekor Mr Speaker lefe ki mon'n dan politik, e mon'n ganny en lapo ase dir, mon les sa bann keksoz pase.

Me si sa size in ariv devan Lasanble la bomaten mon ti ava apresye ki si ou donn en *ruling* sa *ruling* i ava aplik pou tou dimoun. E siporter LDS e siporter *United Seychelles*. Me la Mr Speaker e sete sa mon *matter of privilege* bomaten mon oule met devan ou, se ou ki *Leader LDS*. E sa bann keksoz pe ganny fer anba ou *watch* koman *Leader LDS*.

So si sa portre ki'n ariv lo "Wavel 2025" sa bann komanter ki pe ganny fer lo "Wavel 2025" savedir ou'n bezwen konn donn sa bann komanter. Alors mon demande dan tout enparsyalite ki ler ou donn ou *ruling* ou donn en *ruling* i aplik pou tou Manm Lasanble.

E pas zis pou en sityasyon ozordi ki ganny souleve par Onorab *Leader* Zafer Gouvernman, me i aplik pou tou sityasyon ki pou souleve apre. Mersi Mr Speaker.

**(APPLAUSE)**

### **MR SPEAKER**

Mersi Onorab Pillay. Donk mon *ruling* mon pou ekrir en *ruling* ki mon pou partaz avek Lasanble a en moman pli tar. Pou le moman mon pou dir selman, mwan mon kondann tou

menas, lensilt kont Manm Lasanble.

Mon pa okouran tou ka ki'n pase. Mon'n ganny met okouran ka lo Onorab Zialor ki size *matter of privilege* Leader Biznes Gouvernman, e mon kondann sa premye. Me selman mon pa ezite pou dir tou menas vyolans, lensilt, latak personnel kont Manm Lasanble, i deplorab e i regretab.

Mon kondann sa. Mon pe adres sa koman Speaker ozordi aköz mon pa la koman *Leader LDS*. Mon envit tou Manm pou disosye zot avek sa bann latak e pou kondann li an parol ferm.

Mon a fer remarke ki Lasanble i vilnerab avek sa bann tel aksyon. E i pli vilnerab aköz zot an piblik e zot pe zwe en rol piblik zot pli vilnerab ki lezot dimoun dan lasosyete. Me selman latak lo medya sosyal in vin e problem pou nou popilasyon. E nou Lasanble nou, nou sipòrt sa, premye.

Donk sa osi i en pwen ki nou sosyete i bezwen adrese. Zot a rapel ki Lasanble ti pas en Lalwa kont sa bann aksyon dan en *Cyber Crimes Bill*. E sa mon espere aksyon i kapab komans ganny pran lo sa bann tel lofans. Mon remersye *LGB* pou anmenn sa *matter of privilege*.

Mon sipòrt *Leader* Lopoziyon si in dir dan le pwen

ki'n in fer, se ki tou aksyon i devret ganny kondannen. Tou aksyon menas, vyolans e lensilt. Mersi mon pou met mon *ruling* an ekri pli tar.

Madanm raporter nou ava demann ou pou apel Minis Finans.

Bonzour Minis Naadir Hassan e byenveni dan Lasanble pou zwenn nou pou kontinyasyon deba lo *Appropriation Bill*. E nou a kontinyen avek entervansyon bann Manm.

*Chief Whip LDS* in notifiye mwan ki i oule sey en sanzman dan lord, tou senpleman aköz bann manm ti an deor pei e zot fek retournen. Alor se Onorab Gervais Henrie ki pou pran laparol premye.

### **HON GERVAIS HENRIE**

Mersi Mr Speaker. Koleg Onorab. Ser zabitan Mont Buxton e tou dimoun a lekout bonzour. Sa i nou letan. Letan tou bann Seselwa ki ti odasye e vot pou sanzman an Oktob 2020. Malgre nou gran viktwar istorik nou pa ti ganny letan selebre senpleman aköz Parti Linyon Demokratik Seselwa *LDS*, ti pran direksyon pei - setadir *State House*, e mazorite dan sa Lasanble Nasyonal, dan en letan kot letan kot lemonn ti pe pas dan bouwers e Sesel ti

trouv li lo en baz ekonomik, difisil.

Letan nou'n pran pouvwar an Oktob 2020 reveni pei pa ti pe ganny zenere, selman depans ki ti pe ganny fer. Me ti napa larzan pou fer sa bann depans. Dan en zefor pou esey asir son laviktwar elektoral an Oktob 2020, ladministrasyon Parti *United Seychelles* ti al pret larzan, me zot pa ti pridan e konsyansye. E zot i pret tro bokou e stok det lafen lannen 2019 ti 62poursan nou *GDP*. Lafen 2020 ti'n ariv 92.2poursan.

Sa gran logmantasyon dan det ti'n ariv en nivo ki pa soutenab. Minis Finans in rapel nou ki dan kont Gouvernman ti annan selman R14.9milyon. Nou tou nou ankor rapel sa entervi ansyen Minis Finans dan ki i ti sizere ki Gouvernman ti kapab revwar ler sekter piblik setadir redwir saler.

E si nouvo ladministrasyon pa ti dil avek sa sityasyon enkyetan Gouvernman pa ti pou kapab fonksyonnen, *afford* son bann depans. Me pli enportan pey bann travayer sekter piblik e bann Seselwa ki depan lo lasistans sosyal Leta pou viv. Eski ou kapab mazine sa soufrans ki ti pou lo nou?

Erezman konfyans mazorite Seselwa dan en Gouvernman responsab disiplin e desisif, 2an pli tar nou pe rebran nou souf koman en Nasyon. Lo sa not Mr Speaker, mon oule zwenn Minis Finans ki dan son diskour Vandredi le 4 Novanm ti dir ki pli gran remersiman i al pou Lepep Seselwa, akoz pandan sa dernyen 2an nou'n montre bokou rezilyans, perseverans, kouraz e matirite.

Lepep Seselwa dan son gran mazorite pandan sa dernyen 2an, in ekoute e fer bokou sakrifis. Nou'n annan pasyans an atandan ki nouvo Gouvernman i konsantre lo stabilizasyon e relansman nou lekonomi. Lo lapar zabitan distrik Mont Buxton mon rekonnèt ki mannyer Gouvernman ozordi pe travay dan en fason konsyansye pou son pep.

E ankouraze pou vwar ki tou benefis posib pe retourn ver nou pep. Ozordi nou annan tou rezon pou selebre. Apre sa sakrifis bann mezir ki'n anonse dan diskour Bidze 2023 i nou benefis. Pli gran parti mon repons lo diskour Bidze 2023 Mr Speaker pou konsantre lo kote zabitan Mont Buxton i merit vwar zot dan sa Bidze. Me

avan sa mon ti a kontan regarde kote Sesel i ete ozordi.

To lenflasyon anyel i ekspekte ariv 3.04poursan lafen 2022. Si nou par nou avek Langleter, ki an se moman i 8.8 e *La France* 5.5poursan, pou *être* fran i pa mal. Sirtou ler ou mazin ki sa sif in ariv 9.8 lannen pase. Sa ki'n ede stabiliz to lenflasyon an grann parti se to Roupri kont Dolar ki'n desann dan 3an pou ariv R14.32 lo komansman sa mwan sorti R22 an 2020.

Mon aplodir langazman Gouvernman pou kontinyen redwir son det e fer li ariv 50poursan an 2026 sorti 92.2poursan prodwi domestik brit an 2020. Pou le moman sa sif in prozekte pou ariv 69.7poursan an 2022 e 64.6ver lafen 2023. Antretan apartir le 3 Novanm, rezerv pei an total ki anba responsabilite Labank Santral ti \$637milyon parmi lekel nou kapab servi \$486milyon.

Me eski nou'n fini sorti dan difikilte ekonomik? Larepons i en gro *NON!* Minis Finans in rapel nou ki nou bezwen kontinyen pran kont ki sitasyon lo nivo mondyal i ankor ranpli avek lensertitid e risk. Nou bezwen sezi ki Sesel i ankor en pei ki vilnerab avek bann sok eksteryer. Sa i dwatet

donn nou plis rezon, pou kontinyen azir dan en fason responsab e pridan.

Anfet dernyen fwa ki i ti dan sa Lasanble an Zilyet 2021 Gouverner Labank Santral, manmzel Carolin Abel ti predir ki nou bezwen prepar nou pou detrwa lannen difisil, menm pli difisil ki kriz ekonomik 2018. Sa zour i ti met aksan lo konprenezon nou tou e korperasyon nou tou pou asire ki pei i zener sifizaman reveni. Alor pou li kapab delivre lo son bann a target bidzeter.

Lopozisyon ti'n sov travay sa zour. Zot pa ti a alor pou ganny sa *memo*. Ki pandan okenn letan kriz en Nasyon i bezwen vin ansanm e ofer kanmarad sipor e soutyen pou nou travers sa tirbilans ansanm, e pa kit personn deryer zis parey parti *SNP*. Koman en Lopozisyon responsab ti fer pandan Katriyenm Lasanble.

Malerezman Parti *United Seychelles* ti deside fer en lot semen e abandonn Sesel ler i ti pli bezwen li. An komansman par Dirizan Lopozisyon i pa'n zanmen zwenn avek Minis Finans, pou diskit plan pei pou sorti dan sa kriz e ki mannyer zot a kapab ede menm apre ki Minis Finans ti ofer pou zwenn li. Nou a rapel i ti fer sa lapel

dan Lasanble Nasyonal le 7 Zilyet 2021, ver 4er apre midi.

Dirizan Lopoziyon ti retir son partisipasyon lo Komite *Platinum*. Zot Parti ti obzekte pou reouvertir *Airport* e Onorab Cosgrow atraver ou Mr Speaker, le 31 Mars 2021 ti annan lodas demann Dr Jude Gedeon isi dan sa Lasanble, si nou annan presyon politik lo Lotorite Lasante pou re ouver *Airport*? Larepons Dokter avek konviksyon ti non. I ti eksplike ki nou pa kapab selman konsider bann faktor lasante piblik e dan en tel desizyon, me osi bann rezon ekonomik byennet pei e sirvi popilasyon.

US depi Oktob 2020 in pran en tyak lo en tren *express* popilis, zot in kritik tou bann desizyon Gouvernman *LDS* ki wi, zot pa ti popiler, me zot ti neser.

**(APPLAUSE)**

**HON GERVAIS HENRIE**

Sa ti enkli desizyon pou aboli *Scheme FA4JR*; *Scheme URS*; Koup labi dan en *ASP*, logmantasyon dan laz retret sorti 63an pou vin 65an apartir Zanvye 2023 e lentrodiksyon sistenm performans pou peyman 13enm mwan.

Al reget ladres *SONA* 2018 ansyen Prezidan Faure, kot i ti pe dir ki 5an lavertisman i sifi pou nou popilasyon lo size logmantasyon dan laz pansyon. Al reget entervi ansyen Minis Finans Mr Loustau-Lalanne lo eleksyon ansyen ladministrasyon, lo en sistenm performans pou peyman 13enm mwan. Al regete avan desann anvil e fer dimoun riy zot le 26 Novanm.

US nenk in *walk-out* dan sa Lasanble, vot kont merit e lobzektif Bidze 2022; fer Konferans Lapres parti Konferans Lapres, e menm met bann karakter *Telettubies* avek boutey *whisky Jameson* kot Lorloz, pou deray nou zefor e konsantrasyon pou redres lekonomi sa pei.

Zot ti obzekte depans Gouvernman dan bann proze kapital e argimante i sa larzan i al dan bann program sosyal. Gouvernman ti reste ferm dan son konviksyon, ki lenvestisman dan lenfrastruktir i kre lanplwa, ki an retour i kre saler permet konsonmasyon; permet dimoun pret larzan; permet dimoun fer *savings* ouswa re envestir. Se koumsa ki en lekonomi ki'n aret fonksyonnen tanporerman, i kapab rebran lo li menm.



Sa diskour 2erdtan in ranpli avek plizyer bon nouvel ki prensipalman pe target bann Seselwa ki pe leve e debourye, e ki kapab ed zot prop lekor. Sa i enportan ki nou sezi byen. I annan en diferans remarkab dan prensip ant parti mazorite *LDS* e parti *Lopozisyon US*.

Nou pe pouse pou lepanouisman e responsabilite personnel e swa endividi. *US* i oule fer ou krwar ki Leta i oblize pran swen avek ou, depi ou nesans ziska ou lanmor atraver larzan *tax payers*. Sa i en mansonz ki nou Nasyon dan son fran mazorite i nepli krwar ladan.

Letan nou dir nou en Gouvernman ki responsab, an retour nou pe kont lo tou nou sitwayen pou sakenn nou pran nou responsabilite parey Lartik 40 nou Konstitisyon i demann nou.

Setadir defann Konstitisyon e obeir Lalwa. Promouvwar lentere nasyonal e ankouraz Linite Nasyonal. Travay konsyansyezman dan en profesyon ouswa kontribye ver byennet ou kominote, protez, prezerv e anbelir nou lanvironnman e zeneralman viv dapre preanbil nou Konstitisyon.

Sa i enportan Mr Speaker, akoz menm ler nou pa pran

kont, reste asire ki nou aksyon koman bann endividi i annan en lenpak direk lo Bidze anyel pei. Se akoz sa ki i dezir nou parti pou asir disiplin dan nou aksyon koman bann endividi, e pou mentenir e ganny konfyans popilasyon ankor plis.

Mr Speaker pou kontinyen mon oule koz direktman avek bann zabitan Mont Buxton. Mon promet zot ki nou pou evantyelman vwar benefis parey nou'n komans tande le 4 Novanm. E mon pe asir zot ozordi ki sa Bidze pou enpakte pozitivman, dan zot lavi toulezour.

Lo kestyon saler, en langazman ti ganny fer dan Manifesto *LDS* lo paz 3, ki avek formasyon en nouvo Gouvernman, pou annan en logmantasyon saler e pli o standar lavi. Parey nou'n dir en promes set en det. Tou zabitan Mont Buxton ki travay dan sektor piblik pou benefisy e avek en logmantasyon saler apartir le 1 Avril 2023.

Akoz an Avril, akoz i enportan ki Gouvernman i ganny en lespas fiskal, pou li kapab pran sa desizyon en pe pli tar. E in koumsa tradisyonnelman tou bann ladministrasyon avan menm parfwa bann logmantasyon saler ti pran lefe apartir *juillet*.

Pou bann *allowance* pou ganny konsolide, ki vedir ou saler debaz pou ogmante, sa pou en bon debousman pou ou ki oule pret larzan avek kek Labank Komersyal pou ou devlopman personnel. E sa pa tou. Apre ki ou bann *allowances* in ganny konsolide ou koman sa travayer sekter piblik ou pou osi ganny en logmantasyon an mwayenn 10poursan ki ekivalan R1000 pli ba.

Demann ou lekor ki dernyen fwa ti ana en tel logmantasyon dan ou karyer? Wi bann pansyoner dan distrik in demann mwan akoz zot pa'n resevwar en logmantasyon dan zot pansyon. Zot zenerasyon pou konpran ki nou bezwen fer keksoz pa par pa.

An mezir sityasyon ekonomik i amelyore, mon oule asir ou ki lezot kous nou popilasyon pou benefisye direktman. Me pa oublie ki ban pansyoner pou kontinyen benefisye anver sa R500 par mwan ki zot pe gannnen depi *juillet 2022*.

Zot pa pey bis *SPTC*, e *Scheme Home Improvement* ou swa *Reroofing* pou pansyoner, i reste an plas e 5milyon pe ganny bidzete pou 2023. Me pa oublie osi Mr Speaker ki i annan

konsiderasyon pou bann travayer sekter prive. Mon zwenn Minis Finans dan son lapel avek bann anplwayer pou zot osi evalye e analize kote zot kapab donn en logmantasyon zot travayer.

Depi ki in vin o pouvwar an 2020, sa Gouvernman in pran plizyer mezir pou donn sekter prive lespas finansyel neserer pou zot kontinyen agrandi zot aktivite ekonomik.

Sa in enkli labolisyon *CSR tax*, rediksyon to *tax* biznes pou ariv 15poursan pou bann ki fer par anba 1milyon e 25poursan pou bann par lao. Se selman bann gro lakonpanyen telekominikasyon labank avek lasirans, ki pey 33poursan parmi plizyer lezot linisyativ ankor.

Me parey Minis Finans in eksplike, Bidze 2023 i en kontinyasyon Bidze 2020 e 21. Par egzanp nou vwar ki apartir lannen prosenn to *tax* lo valer bann benefis to monneter ki bann travayer dan sekter prive i benefisye avek, pou desann sorti 15poursan pou ariv 20poursan.

Me pli enportan Gouvernman pe al revwar sa lalis dan Katriyenm *Schedule* dan Lalwa *Tax* lo saler benefis non-monneter, pou tir *tax* lo omwen 4 kategori depans ki

enkli manze, medikal, ledikasyon avek transportasyon.

Alor menm ler travayer dan sekter prive pa pe benefisyè direktman avek logmantasyon saler dan Bidze, i annan lespas ki in kree pou zot anplwayer rekonpans zot. Mon felisit ban anplwayer ki konsansye e demande ki plis zot i komans rekonpans zot bann travayer, ki donn tou pour tou dan travay.

Lo kestyon ledikasyon promes *LDS* pou Lepep Seselwa trouve lo paz 24 nou Manifesto sete pou akonplir en standar ledikasyon ki a fer nou bann zenn vin bann partisipan konpetan dan en sistenm ekonomik modern e osi bann sitwayen responsab.

Bidze 2023 i annan ase provizyon ladan pou satisfè bann paran dan distrik Mont Buxton ki annan en zanfan ou plis dan sistenm skoler depi *day care* ziska liniversite.

En sonm 27.6milyon in bidzete an 2023 pou *Day Care Scheme* pou sibvansyonn kou vey zanfan. Provizyon gadyak pou tou etidyan dan Lekol Leta Primer e Segonder, pou asire ki tou zanfan i komans zot lazournen letid avek en repa pou permet zot konsantre e donn zot maksimonm dan zot

letid. An 2023 sa pou kout R17.9milyon.

Zanfan i osi kapab ganny en lasyet dezennen depi trwazyenm trimes sa lannen. Sa i kontinyen an 2023 e pou kout R20.1milyon. En sonm 6.8milyon in bidzete an 2023 pou ofer servis *Wifi* dan lekol. *Laptop Scheme* pe ganny mentenir pou bann etidyan ki pou kot 5milyon an 2023.

E pour sak zanfan Mont Buxton ki dan lekol Leta lo nivo primer, segonder e pos-segonder i an en kou peye par *tax payers* Seselwa anyelman.

An 2023 letid en zanfan dan primer pou kot pei R42mil 914, 8sou. Segonder pou kout R61mil 264, 91sou e pos-segonder R57mil 878, 44sou.

Ledikasyon pa'n zanmen gratwit. Sa bann sif i konparab avek sa ki bann lenstitisyon edikasyonnel prive pe sarze. Alor mon lapriyer se ki tou zanfan paran, ansennyan *PTA*, *school counsellors* e zesyon Minister Ledikasyon, i asir bon rezilta pou kontribisyon *tax payers* Seselwa i kont pou en keksoz.

Kontrerman avek rimer politik apre ki Lasanble Nasyonal ti *repeal* Lalwa *ANHRD*, en sonm R205.1milyon in prozekte pou asire ki bann

etidyan Seselwa, i kontinyen avek zot letid avanse aletranze.

An plis ki sa, pou asire ki bann etidyan Seselwa i dan konfor ler zot laba deor, pou 2023 Gouvernman in fer en logmantasyon 10poursan dan *stipend* pou bann etidyan ki pe etidye dan 17 pei an vi logmantasyon dan pri lavi.

Sa benefis i osi aplik pou bann etidyan ki pe fer zot letid kot Liniversite Sesel. Zot osi pou ganny en logmantasyon 10poursan dan zot *stipend*. En sonm 2.5milyon on ganny bidzete pou sa logmantasyon. Pou bann ki oule pran zot responsabilite ver zot letid avanse Gouvernman in entrodwir en *Scheme Loan* Edikasyonnel pou lannen 2023 ki pou kout R8milyon.

Anba sa *scheme* en endividi i kapab pret ziska R800mil avek sipor sibvansyon Leta e son repeyman pou dan 10an.

Mr Speaker mon vwar en alokasyon 19.3milyon ki'n planifye pou konstriksyon en nouvo blok laklas, e osi renovasyon lo en blok laklas ki deza egziste pou lekol primer La Rosière.

Mon oule rapel tou zabitan Mont Buxton, ki premye fwa ki Gouvernman ti anonse ki lekol La Rosière ti pe al ganny

renouvle e osi konstriksyon nouvo blok ti an Septanm 2007. Mon repete Septanm 2007, pandan en vizit ansyen Prezidan Michel dan distrik. Konstriksyon i ekspekte komanse an 2009. Sa ti 13an pase.

Finalman Mr Speaker sa nouvo ladministrasyon pe rod sours finansman isi menm pou konplet sa proze. La mon ti a kontan envit mon de koleg Onorab Naidu avek Labonte, pou nou swiv sa promes tre pre e met presyon neserer pour ki sa proze i materyalize. Mon kont lo zot sipor.

Mr Speaker *LDS* i apresye rev sak Seselwa pou annan son prop lakaz. Nou konpran ki bokou zenn dan zot 20 ouswa 30tenn lannen pe reve pou konstrir o sito posib. E bann kondisyon dan marse lozman pa favorab pou zot. Gouvernman alor in vin avek bann mezir swivan, ki a fasilit akse avek finans pa abordab pou bann zabitan Mont Buxton ki kapab finans zot prop lakaz.

Gouvernman pa zis pe mentenir akse konstriksyon abordab pou endividi vin propriyeter son prop lakaz me i pe osi ogmant sa sibvansyon par lao son *loan* lakaz. Lefe ki Mont Buxton i lo Mahe i komansman Zanvye 2023, sa to

pou ganny revize sorti 8500 par met kare pou vin 9500 par met kare.

Gouvernman pe osi redwir kontribisyon personnel ki pou bezwen anba sa *scheme* sorti 7.5poursan pou ariv 5poursan. Me fodre ou pe konstrir en limit maksimonm 125met kare pou ou kalifye anba sa *scheme*.

En sonm 18milyon in ganny prozekte dan Bidze 2023 pou *scheme* pou sibvansyon lakaz. Gouvernman pe osi eksplor tou opsyon pou redwir kou lasirans ki relye avek en *loan* lakaz, ki apepre 6poursan *loan* total.

Diskisyon i ankour avek bann lakonpanyen lasirans e osi zot regilater, pou vwar ki manner nou kapab fer sa pri pli abordab. En lot benefis direk ki zabitan Mont Buxton ki premye fwa pe aste en kare later ouswa en lakaz pe benefisyé avek, se pou pa pey 5poursan *stamp duty* lo okenn propriyete ki vo R3milyon. E la in annan en logmantasyon par 1milyon.

I osi annan *Part-Rental Scheme* pou lakaz ki reste anplis e en sonm 11.8milyon in ganny bidzete pou 2023. Menm ler Mont Buxton pa'n ganny nonmen direkteman pou okenn proze lakaz demare an 2023, mon vwar potansyel dan Bidze

kantmenm sa pou nou ganny konsidere.

Anba Bidze Minister Later avek Lakaz, i annan 4 alokasyon spesifik kot Mont Buxton i kapab rantre ladan. E i en alokasyon pou 32 *unit social housing* valer R22milyon; *social housing projects* valer R39.3milyon; *special housing development project* valer R14.1milyon e 342 *affordable housing units* valer 91.5milyon e tousala in bidzete pou 2023.

Ozordi Mont Buxton i annan kare later H-13558 ki mezir 20ektar e debord Anse Etoile avek Beau Vallon. I annan *parcel* V-5896 Lari Angar ki 1610met kare e *parcel* V-3561 kot ansyen lakaz *emergency* ti ete e ki kapab *amalgamate* avek *parcel* V-8391, pou azout ankor en pe met kare avek sa 347 met kare orizinal.

Alor mon donn mon langazman koman MNA distrik, pou diskit avek Minister konsernen pou vwar ki manner pou bouz de lavan. Apre tou depi louvertir Dominique Savio an 2017 Mont Buxton pa ankor benefisyé avek okenn proze lakaz nouvo. Mon apresye sa loportinite Mr Speaker.

Pou donn larepons lo en diskour Bidze Koman MNA parti

mazoriter ki osi o pouvwar pou en trwazyenm fwa. Sa i en loportinite ki zabitan Mont Buxton in konfyè mwan atraver dezyenm manda koman Manm Elekte zot distrik. Ankor enn fwa mersi pou krwar dan mwan avek Parti *LDS*.

Sel keksoz ki mon demann zot se kou kontinyen fer konfyans nou Gouvernman. Pou nou kontinyen travay ansanm, e akonplir sa ki meyer avek nou pei avek nou pep. Ansanm annou fer nou mye pou asire ki lasante sekirite e byennet sak Seselwa, sirtou bann ki pe pas dan dir an se moman i ganny byen pran ka avek.

Annou ansanm kontinyen travay konsyansyèzman pou redres lekonomi nou pei, avek menm viger ki nou pou ale pou koup depans Gouvernman retir labo e koripsyon dan servis piblik e retir depans lo lasistans sosyal pou bann endividi ki kapab travay.

Nou pou kontinyen ganny teste koman en Nasyon e koman en pep. Par devan nou i kapab annan moman difisil ankor. Be mon swete ki lespri solidarite avek linite, pou sa ritm ki nou pou mars lo la ansanm a kote kanmarad ver sa lalimyer o fon tinel.

Mon lapriyer toulezour i se ki koman Seselwa nou pe rat okenn sans. Nou kontinyen koste e fer Sesel pou tou son zanfan.

Mr Speaker pou asir reisit sa Bidze nou bezwen de keksoz ki aprezan mon oule adrese ; - Enn se lenplimantasyon program e proze e lot se koleksyon reveni. Si nou met en keksoz dan Bidze nou bezwen fer sir ki bann proze sirtou kapital ti ganny egzèkite antyerman. I komans a ler i termin dan dernyen letan ki in planifye.

Lasanble Nasyonal i aprouv Bidze e fer disponib finansman nesèser. Mon lavertisman pou tou *MDAs* ki pou paret devan nou isi ant le 15 Novanm ziska le 2 Desanm asire ki si zot in met en plan dan sa Bidze e vin dir nou sa i zot proze; sa i Polisi zot pe al enplimante; Lalwa zot pe al entrodwir ouswa amande, fer sir zot delivre.

Tou bann *MDAs* i oblize delivre zot target. Zot bezwen fer sir ki avan le 31 Desanm 2023, tou bann keksoz in ganny enplimante. Akoz si i pa ganny egzèkite se lekonomi pei e popilasyon ki perdi. Alor nou bezwen fer sir ki le nou decide fer en keksoz, nou tou nou

bezwen asire i ganny materyalize.

Si non, opsyon ki pou reste nou koman en Lasanble, se redwir Bidze ki bann MBAs pe demande ler nou konstate ki lannen apre lannen zot pa kapab delivre sa ki zot promet. Solisyon pou sa Mr Speaker mon panse, se pou nou kontinyen vwar mannyer nou kapab anbelir prosedir bidzeter e asire ki i annan pli bon planifikasyon depi komansman ouswa konsepsyon proze, ziska ki in konplete.

Lot pwen i koleksyon reveni ki konponan kle tou Bidze. Nou bezwen aksepte ki reveni i bezwen ganny zenere sirtou en sirplis ki a ed nou mentenir target pou redwir det Gouvernman pou ariv 50poursan an 2026, sorti 92.2 poursan prodwi domestik brit an 2020.

Mon siport lentrodiksyon en *tax* lanvironnman soutenab nou bann viziter, ki ant R25 a R100 par nwit. Mon osi dakor avek lentrodiksyon en *tax* 2poursan lo reveni bann mwayen e gran lotel, akoz mon krwar ki Lendistri Tourizm i merit pe kontribye plis dan *tax* domestik, ki 25poursan sa sonm total R6.379bilyon ki ti kolekte an 2021.

Mon osi *welcome* revizyon to *tax* ki aplikab pou Sekter *Securities Dealers* anba *tax* biznes, sorti 1.5poursan pou ariv 3poursan komansman Zanyve 2023. Letan mon regard rapor anyel Komisyon Reveni Sesel pou lannen 2020, mon konstate ki in annan selman R18mil376 *tax payers* anrezistre.

Sa sif i enkli endividi e lakonpanyen. Me pou menm lannen Fon Pansyon ti annan 42mil 901 manm aktiv, ki 2.3fwa plis ki sa sif SRC. Alors si nou oule agrandi nou baz *tax* ki konversasyon nou merit pe konmans fer? Sa i bann refleksyon ki tou lede kote latab Mr Speaker i dwatet pe fer.

Mon osi konstat kontribisyon *tax* direk atraver STC ki Praslin avek La Digue i fer. I vremen ba e mon krwar pour sa i montre nou poudir Sekter Enformel lo dezyenm e trwazyenm pli gran zil dan nou larsipel, i pe poz en problemm pu koleksyon reveni dan nou pei parey i leka lo Mahe.

E mon krwar sa i ban konversasyon ki Lasanble Nasyonal ansanm avek tou bann Lotorite konpetan dan pei i bezwen adrese pandan bann lannen ki devan nou.

An konklizyon Mr Speaker, an gro i en Bidze ki pe

permet lekonomi agrandi, kre plis lanplwa e fer bann ki ti krwar zot pou vin score pwen politik lo zefor Gouvernman, kapot avek las. E aköz sa mon vremen apresye konteni sa Bidze.

I demontre plizyer mezir brav en parti liberal ki anvi ankouraz tou dimoun ki pare pou leve e ed son lekor an premye. Me sa Bidze i osi montre konpasyon pou annan ki pli feb e vilnerab atraver en alokasyon R1.2bilyon pou *Benefits and Approved Programs of Agency for Social Protection*.

I pou annan en lenpak pozitif lo lavi bann rezidan distrik ki mon reprezante isi anndan, e si sirtou si zot sezi bann loportinite ki a zot laporte.

I nepli letan pou reste a lekar pu war tou keksoz negativ e konplent sak aksyon ki ou prosen i fer. In plito ler pou avans devan ed ou lekor e ou fanmir ou kominote e pei, par demande kwa ki mon kapab fer? Mon krwar Minis Finans in adres plizyer konsern lasosyete ozordi partikilyerman bann *middle income earners* e i pe fer provizyon pou lavenir;- en lavenir pli stab e pli prosper.

Mr Speaker en Gouvernman pa merit zanmen travay zis pou avek lentansyon

ranport eleksyon. Son vizyon i dwatet pou sofgard aki zenerasyon a lavenir. Bann fot ladministrasyon lepase i se ki zot pa'n reste disiplin dan bann reform striktir ek ki nou lekonomi ti bezwen pas atraver.

I parey ler en dokter i donn ou latizann pou geri en maladi, ou bezwen pran tou son doz, si non ou pa pou reganny ou lasante. E se sa ki arive avek nou pei an 2020. 12an apre gran reisit program reform makro ekonomik 2008.

Gouvernman Lepep US ti pli enterese avek bann eleksyon e zot ti perdi lobzektif reform avek *IMF*. Koman Manm Elekte pou distrik Mont Buxton, mon pou zwenn ansanm avek tou Manm lo sa kote latab, pou travay san ses malgre difikilte e kritik, pou zenerasyon fitir pa anmas fardo okenn fot ki nou fer ozordi.

Mr Speaker, sa i nou letan apre tou sa sakrifis nou pe vwar son benefis. E nou annan tou rezon pou selebre. Mersi pou ekout mwan. Mersi Mr Speaker.

**(APPLAUSE)**

**MR SPEAKER**

Mersi Onorab. Mon a donn laparol onorab Wallace Cosgrow.



**HON WALLACE COSGROW**

Bonzour Mr Speaker. Bonzour tou Manm e en bonzour spesyal tou Seselwa ki pe ekout nou ozordi.

Mr Speaker de lazournen repons lo Bidze mon'n fer en pe refleksyon lo bann diferan diskour. En keksoz ki tre aparan se lafason ki bann Manm lot kote latab in swazir pour reakte lo sa Bidze. Zot annan dapre zot en bon Bidze. Zot annan en gran mazorite dan Lasanble Nasyonal e zot in annan en loportinite pour promot sa ki dapre zot en bon Bidze avek Lepep Seselwa.

Me zot in prefere antre dan bann retorik 43 an lepase; antre dan latak personnel lo parti *United Seychelles* e nou bann Manm. Zot in ganny en manda pour dirize lo en premiz 'Sanzman', me apre 2 an e trwa prezantasyon Bidze nou tann menm keksoz sorti lot kote latab.

Mon sertennman pa pou ganny antre dan zot politik. Par kont mon pour adres keksoz ki konsern pep Seselwa. Prezan mon pe mazin en Mr Speaker, sel keksoz ki'n kapab derob zot koumsa, se sa gran *rally United Seychelles* Anse Boileau.

Alors mon a profite remersye tou nou siporter e tou bann nouvo ki'n zwenn nou

lans Boileau. Nou ava zwenn zot le 26 dan gran lamars ki klerman pe fatig *LDS*.

*Ceci dit* Mr Speaker, mon krwar ki depi o konmansman nou bezwen remersye e salye zefor tou travayer servis piblik ki'n enplike dan preparasyon sa Bidze. Mon konnen ki prose Bidze i enn ki long. Sirtou bann travayer Minister Finans ki'n bezwen a dernyen moman met en zefor ekstra, pour kapab fer ki Bidze ganny prezante le 4 Novanm olye le 7 parey ti'n ganny planifye.

Nou konnen sa ti en mannev par Gouvernman *LDS*, pour sey dekouraz Seselwa pour zwenn nou dan nou gran *rally* Anse Boileau.

Mr Speaker, bokou mon frer e ser Seselwa i ava dakor avek mwan, ki lavi dan nou pti pei Sesel an 2022, i pa'n enn ki'n fasil ditou. In annan bokou presyon lo lafanmir Seselwa. Zot in war li difisil si non-pa preski dir enposib bokou fwa pour zwenn zot bann bezwen de baz. In vreman difisil si non-pa enposib pour fer de bout zwenn.

Sa ki'n santi sa douler i pou dakor avek mwan e ki sa Gouvernman pa'n enterese pour anmenn solisyon pour ou e pour ou fanmir.

An 2022, pri sa komodite ki mwan avek ou nou'n bezwen

kot nou lakour in pet plafon. Pri manze, elektrisite, delo, bis e lezot ankor in sitan o, ki menm bokou dimoun ki ganny en saler en pti pe pli o, in santi sa lefe.

Prezan ou kapab zis mazin sa enn ki son saler i pli ba. Bidze 2023 pa adres sa bann konsern. Pour bokou ki'n konmans en pti biznes zot in fer fas avek realite en pep ki son *pouvoir d'achat* in vreman redwir e bokou zot in bezwen ferm zot laport. Bidze 2023 pa pe aport okenn solisyon.

Ou ki'n konmans konstriksyon ou prop lakaz, ou menm esey fer en renovasyon, ou'n vitman realize ki depans in desot ou Bidze. Sa sete realite lavi Sesel an 2022. Dan Bidze 2023 Minis i dir kou lavi pa desann alors napa solisyon.

Par kont dan son diskour Bidze, Minis in dir nou ki *statistic* i dir lekotr, ki to lenflasyon i zis 3poursan. Alors kestyon ki mwan e bokou lezot dimoun ankor pe demande, se eski sa mezir ki pe ganny servi pour kalkil lenflasyon, i enn ki reprezantatif e pe pran kont realite dizour? Akoz sertenman lefe lo nou Bidze lakour in konpletman le kontr.

Si ou dakor avek sa pti analiz ki mon'n fer e ou santi ou

afekte avek desizyon sa Gouvernman, mon envit ou pour zwenn nou le 26 Novanm dan nou gran lamars, e anvoy en mesaz kler avek sa Gouvernman, "Nou'n ganny ase. Seselwa in ganny ase!"

Mon'n konmans mon repons lo diskour Bidze dan sa fason, akoz mon krwar ki i enportan, annan en revi realistik lo lannen 2022, avan ki nou menm analiz kwa ki Bidze 2023 pe prezant devan Lepep Seselwa. 2022 in en lannen tre dir pour lafanmir Seselwa.

Prezantasyon Bidze i enn bann moman dan lannen kot tou Seselwa ki swa lendividi, la fanmir ou menm bann biznes - annefe tou Seselwa Mr Speaker - i swiv tre atantivman, akoz i sa moman ki Gouvernman i prezant son plan finansyel e osi son bann gran laliny Polisi pour sa lannen ki pe vini.

Seselwa i swiv Bidze akoz zot konnen ki sa Bidze dan en fason ou en lot, pour enpakte direkteman lo zot lavi pandan sa lannen ki pe vini. Me eski sa Bidze i anmenn gran lespwar? Mon larepons Mr Speaker se non!

Mon lentansyon Mr Speaker fer en analiz lo serten Polisi dan sa Bidze, pour ki mon kapab penn en portre pli kler lo

ki vremen sa Bidze i reprezante pour pep Seselwa. Mon osi anvi koz lo serten size ki mon krwar Bidze pa'n adrese, me ki osi enportan pour pep Seselwa.

An gro Mr Speaker sa Bidze i pa sa mervay ki Gouvernman *LDS* ek bann Manm lot kote latab i le fer nou krwar. I reprezant en depar avek zot bann krwayans fondamantal konman en parti liberal kapitalis, e i en mannev kler pour re galvaniz sipor, labaz e re ganny konfyans siporter ki pe kit zot par grap.

Zisteman mon'n war en bon pe dan laplenn Anse Boileau. En Gouvernman ki'n perdi konfyans ek sipor la mazorite pour dirize; en Gouvernman ki mank linisyativ e ki pe klerman aziste anba presyon an servan linisyativ e bann program deza etabli par parti *United Seychelles*.

Zot in kanmenm mank bokou keksoz esansyel e enportan pour pep Seselwa a sa moman la. E an fezan sa, zot pe kit bokou Seselwa an 2023 deryer. E la mon pa pe koz lo sa ki zot abitye dir Seselwa pares, me bann fanmir ki travay dir.

Mr Speaker apre 2an ki Gouvernman *LDS* in vin o pouvwar lo en baz promes pour fer sanzman, pou fer desann kou lavi, pour ogmant pansyon

retret bann dimoun aze pour vin R10mil; pour met larzan dan pos tou Seselwa. Pour soutenir bann ki pli vilnerab e dan bezwen atraver lasistans e sipor sosyal - e pa bliy sa zafer "sakouy pye", zot in fer tou le kontrer atraver sa Bidze ki'n ganny prezante! Menm si a plizyer repriz Minis e osi Prezidan in dir nou ki lekonomi pe fer byen.

Menm si zot ti dir ki firamezir lekonomi i fer byen zot pour pas bann benefis avek pep Seselwa. Nou'n ganny dir ki krwasans i 10poursan menm pli o ki Lasin, me nou pa war sa lapartaz sa krwasans avek tou Seselwa! Nou pa pe war nouvo linisyativ pour akonpany sa krwasans. Ou tann zis nou pour kontinyen program isi, nou pour kontinyen program laba, nou pour ranforsi, nou pour konsolide, eksetera.

Zot ankor - mon repete - pe fonksyonn lo bann program e Polisi ki nou'n met an plas apard enn de eksepsyon. Ki swa *Scheme Day Care*, ki swa *Part-Rental*, ki swa *Housing Subsidy*, *breakfast* pou zanfan, *Laptop Scheme* e lezot ankor. Sa se bann linisyativ ansyen Gouvernman.

Nou'n tann Minis dir ki zot pe al fer letid pour evalye servis lasante. La dan Minister Spor

laba li Minis i *study* menm, i fer plan! Tousala Mr Speaker i bann siny e sentonm en Gouvernman ki pa ti ankor pare, ki ti napa plan e ki ti'n vol konfyans sa pep.

Aprè ler Seselwa i konplent, zot dir pasyante! Ou pa kapab blanm Seselwa akoz zot ti vot pour en keksoz meyer e en promes sanzman! Aprezan ou tann zis “pasyante.” *LDS* delivre sa ki ou'n dir! Si ou pa kapab avanse sed la plas! Parske bokou lizye in ouver e dakor ki *US* i sel opsyon pou Sesel an 2025!

**(APPLAUSE)**

### **HON WALLACE COSGROW**

Zot mank linisyativ a ankor pe anpandan lo Polisi e programm Gouvernman avan.

An 2023 Mr Speaker, malerezman zot in obliy e abandonn nou bann dimoun aze. Promes logmantasyon dan pansyon retret in ganny kit ater e pa koz lo la personn. Zot bous lizye avek en R500 ki ti sipoze tanporer, la zot fer li permanan. Me lo lot kote zot deside tir plis ek bann dimoun aze ki reste dan bann *Homes* e apre dir ki zot en Gouvernman responsab e konpasyon.

Mr Speaker, tou resaman monn antann Minis koz lo sa

size fer desann kou lavi. Minis i dir nou ki konman en ekonomis, i konnen ki pa egziste sa zafer fer desann kou lavi, e ki sa en term ki politisyen ki'n kree. Minis i dir en parol, me Prezidan i kontinyen dir nou ki i pe fer desann kou lavi. Zot kontradwir kanmarad. Ki nou pour konpran Mr Speaker?

Lala Onorab Philip Monthy laprev “*gross inefficiency*” dan zot Gouvernman.

**(APPLAUSE)**

### **HON WALLACE COSGROW**

Annefe mon pour azout en lot. Ou Minis ek Prezidan i mank sinerzi ek kanmarad. Zot parey speaker ki difil pa touse.

Annefe petet Minis koman en teknisyen, politisyen, mon dir koumsa akoz parfwa i enn par fwa i lot. Ou pa'n swiv politik *SNP*, *LDS* ase lontan pour konpran ki sa ti batay ki *LDS* dan Lopozisyon ti anmennen, a tou repriz ki zot ti kapab. E i ti enn bann pwen kardinal dan zot kanpany ver eleksyon 2020.

Sa i enn bann rezon akoz Seselwa ti vot pour zot. Mon repete Seselwa ti vot pour zot an mazorite pour anmenn solisyon pour kou lavi. I en keksoz ki rezonnen ek tou Seselwa, akoz

nou tou nou anvi war en bes dan pri komodite ek servis. Nou tou nou anvi annan sa abilite pour aste plis avek mwens larzan. Nou tou nou anvi mwens presyon lo nou Bidze lakour.

Se sa ki Seselwa pe demann ou ek sa Gouvernman pour fer. Omwen gard sa promes. E silvouple sorti dan la teori avek bann liv lekonomi ek finans! Seselwa i bezwen solisyon realis e non-pa akademik. Keksoz i real la deor e mazorite Seselwa dan son senplisite, i ekspekte bann sanzman senp ki tous son lavi toulezour.

Pri tiket bis pli afordab; en logmantasyon dan zot saler ek pansyon retret; en rediksyon dan kou lavi. Se bann demann senp me i paret zot napa solisyon. Sa i fer mwan osi poz en kestyon, si Minis Finans pa krwar dan sa zafer fer desann kou lavi, eski i pour vreman travay pou pei *attend* sa lobzektif?

Mr Speaker ler mon adres sa size kou lavi, mon senserman krwar ki i bezwen ganny adrese avek de lezot keksoz ki'n osi ganny fer resorti dan ladres Bidze, e mon pour tous premye, sa size sipor e lasistans sosyal.

Mon'n dezapwente ki ladres Minis pann tous preski ditou lo reform dan Sekter Sosyal apard kreasyon en Lazans pour zer swen kot lakour *Home Care*.

Annefe mon ti swete ki i annan serten revi dan la fason ki Lazans Proteksyon Sosyal i dil avek bann laplikasyon. Bokou Seselwa pe esper sa sanzman e transformasyon laba kot sa Lazans, pour kapab soulaz zot en pe, pou kapab soulaz zot Bidze lakour.

E la mon pe enplor Gouvernman, pour silvouple ekout bann ki pli vilnerab e ki bezwen servis sa Lazans. Akoz bokou in senpleman dezespere e perdi konfyans dan sa Lazans. Zot senpleman dir ou, ki menm ki zot bezwen lasistans finansyel, zot pa pe al ankor fer laplikasyon.

Sa sityasyon pe fer ki bokou fanmir pe plonz dan lapovrete, e sa pe kre bokou problem sosyal e pe ankouraz bokou konportman anti sosyal. Zis met larzan dan Bidze pa abouti dan naryen, si birokrasi ek fason fer pa sanze!

Mon dezyenm pwen Mr Speaker, i tous annefe lo sa size ki'n ganny koz lo la plis depi ki diskour Bidze in ganny prezante, e sa i annan pour fer avek logmantasyon e revi

striktir saler. Ouswa parey *LDS* in kontan dir, “met larzan dan pos Seselwa.”

Ler mon fini fer mon pti analiz, ou a dir mwan ou menm si *LDS* in vremen met larzan dan pos Seselwa, atraver sa logmantasyon dan saler sekter piblik.

Mr Speaker, apre 2an ki zot in byen aranz zot avek tou sord kalite *allowance*, palto, ledan, linet, lakaz e lezot benefis ankor, tel ki; voyaz aletranze. Enstal *camera* sirveyans kot tou bann Minis avek bann Kontra zerans e mentenans sa bann sistenm par en lakonpanyen san *tender*, tousala pandan sa bann letan ki zot ti dir ki lekonomi pa pe fer byen e pep i bezwen fer sakrifis.

Zot, zot in aranz zot byen boner, e prezan sa Gouvernman in deside vin avek en revu saler dan sekter piblik. Tou sa letan zot solisyon ti lasistans tanporer pour pep me zot bann elit e, tou keksoz i permanan, enkli zot gro *jeep RAV4*.

Apre pour mazorite sa pep ou a dir firamezir, ou o fir ki lekonomi i amelyore. Ki sa logmantasyon i reprezante Mr Speaker dapre dernyen statistik?

Limero 1; - Selman 20poursan travayer ki pe benefisyé.

Limero 2; - Gouvernman *LDS* in atraver sa desizyon, senpleman kit 80poursan travayer deryer e abandonn son promes pour met larzan dan pos tou Seselwa. Ou ki travay dan sekter parastatal, ou reste dan lensertitid. Parske Minis in fer tre kler ki li i fer Bidze Gouvernman.

Selman nou ava rapel ler ti pour kennsel 13enm mwan saler, menm si Minis pa fer Bidze parastatal, I ti entervenir atraver *PEMC* pour donn lenstriksyon pour pa peye. I dir ki i pa fer Bidze sekter prive, selman i fer lalwa pour dir sekter prive ki mannyer pour evalye e pey 13enm mwan saler. Be eski sa pa apel ou pe enterfer dan Bidze sekter prive?

Ler pou tir benefis i *ok*, me ler pour donn benefis ou lav ou lanmen. Mon kit sa la pour ou fer ou prop analiz ser e frer Seselwa. Pour ou ki travay dan sekter prive, ou osi ou reste dan en lensertitid. Minis i selman ankouraz ou anplwayer pour ogmant ou saler e dir ki i pa fer Bidze sekter prive.

Minis konman en ekonomis i konn tre byen ki i rol en Gouvernman pour entervenir atraver regilasyon,

pour koriz enperfeksyon dan marse. Diferan Gouvernman i swazir son nivo lentervansyon. E dan marse lanplwa, nou koriz lenperfeksyon e lenzistis dan nivo saler atraver saler *minimum*.

En Gouvernman i bezwen, e i son rol pour protez e soutenir pep. Si i annan en Polisi alors, ki montre kler zot kouler e tandans liberal kapitalis, i sa enn an se ki konsern saler! Zot refize azir pour travayer sekter prive ki osi viv dan sa menm lekonomi e pe soufer egalman avek kou lavi ki pe kontinyelman ogmante.

Sepourtan statistik resan pour 2022 i montre ki lapey mwayenn dan sekter prive ek parastatal, i mwens ki dan sekter piblik. Annefe sa diferans ant sekter prive e sekter piblik i preski R5mil diferans. Sours i *Formal Employment and Earnings bulletin Q2- 2022*. E avek sa nouvo lanons ki Minis in fer sa gap pour elarzi plis ankor. Si sa pa en rezon pour en lentervansyon imedyat, mon demann mon lekor ki rezon zot bezwen, e lo ki baz si pa statistik ki zot in pran sa desizyon pour get zis sekter piblik?

En lot lipokrizi Gouvernman LDS se sa zafer

logmantasyon saler lo baz poursantaz. Tou Seselwa i ava rapel an 2019, ler ti annan propozisyon logmantasyon saler 5poursan devan Lasanble, LDS ti dir kareman donn tou dimoun parey.

Ozordi zot bliye sa zafer donn tou dimoun parey. Zot vin avek en zafer poursantaz. I kler ki avan eleksyon zot ti pe fer politik popilis pour bat latet Seselwa pour ganny vot. Me apre zot vin ek menm propozisyon, me zot *package* li konman sanzman ek transformasyon. Dir mwan la ki zot in sanze?

Par lefe ki zot ti blok sa an 2019, i annan dimoun ki'n pran retret e ki pann benefisye en pli o pansyon, senpleman aköz zot saler pa ti kapab ganny ogmante par 5poursan an 2019. E sa i lafot LDS kareman!

Mr Speaker lasante nou Nasyon i enn ki devret pran gran priyorite bidzeter. An se moman i annan bokou defayans dan la fason ki servis lasante i ganny delivre. Bokou nou sitwayen pe eksperyans retar avek lapwentman pour tretman spesyalize.

E la ki nou'n aprann ki bokou bann spesyalis *Cuban* pe kit pei, nou zis priye ki sa pa afekte nou sitwayen. Mankman latizann enportan tel ki *insulin*;

tretman pour pasyan *parkinson*; tretman pour pasyan kanser e lezot ankor, i osi en problem grav.

Prokirman latizann ek lezot *supply* medikal, i enn ki bezwen byen kalkile e fer dan la transparans. Mon pe demann Minister Finans avek *FPAC* pour regard sa tre pros, pour ki napa trik mardaz, sirtou ler ou pe tande ki i annan lendividi ki'n fini kre lakonpanyen pour antre dan sa biznes enport e vann latizann ek Gouvernman Sesel.

Pep Seselwa i *deserve* en meyer servis lasante. E pour sa arive i bezwen annan restriktirasyon mazer dan la fason ki nou delivre sa servis. Nou annan bokou profesyonnel e konpetans, me kordinasyon ek zerans sa servis li menm bezwen ganny revwar.

Nou bezwen investir dan bann profesyonnel, pour etidye dan kad *hospital management* e *administration, health care management*. Administrater ki kapab administre.

Mon'n deza dir e la mon pou repet ankor, si Minis a latet sa Minister enportan pa santi i kapab delivre sa servis sitan enportan pour nou pep, sed la plas avek en lot! Mon pour dakor ki pour nou ariv

transformasyon nou pei pour fer fas avek nouvo developman mondyal e pour re pozisyonn nou lekonomi e fer li pli rezilyan, transformasyon dan nou sistenm ledikasyon i kle.

Bann Gouvernman presedan in toultan aziste e adapte kot ti neserer, pour zwenn bann bezwen sa bann letan. Pour nou kapab develop nouvo sekter e lendistri Sesel, sa transformasyon i kle e labaz dan ledikasyon i deza la e sa in ganny rekonnet.

Ler nou koz lo la baz pour fasilite sa transformasyon nou pe koz an term bann lankadrem legal, akse avek ledikasyon, lenfrastruktir e resours imen. Malerezman Mr Speaker, apre 2 an *LDS*, sa Bidze pa pe ofer sa transformasyon ki merite dan ledikasyon.

Annefe sel keksoz ki nouvo dan ledikasyon ki Minis in anonse, se *loan* pour letid avanse. Menm sa i limite e pa pour anmenn sa lefe ki nou dezire. Met antet ki sa ki nou konmanse ozordi dan ledikasyon, nou pour rekolte son fri dan mwayenn e long term. Napa letan pou *delay*!

Minis i koz lo kontinyasyon *Laptop Schemes*, kontinyasyon anvoy etidyan aletranze e kontinyasyon *Day*



*Care Scheme.* Tousala i zis kontinyasyon bann program etabli par Gouvernman presedan - Gouvernman *United Seychelles*.

Napa nouvo linisyativ pour reform nou sistem e pour anmenn nouvo nide. Napa sanzman e transformasyon dan domenn ledikasyon. Annou form nou bann zanzan pour fer resers e inov. Annou form zot pour vin anplwayer olye zis anplwaye. Zot ava vin bann antreprenner e zot a kre larises.

Annou ekspoz zot a en tre zenn-az avek ledikasyon nimerik an mezir ki nou kontinyen mentenir standar nou bann domain tradisyonnal. Se sa transformasyon ki bann paran i oule war e se sa fitir pour nou bann zenn.

Zot pour war loportinite isi menm lo sa ros dan Losean Endyen ki nou apel Sesel. Koumsa nou ava aret koz *brain drain*. I pou gou e i pour profitab pour travay e viv dan paradi lo later.

Mr Speaker sa i anmenn mwan lo lazennes Seselwa. Tou sa ki nou fer i bezwen vize ver nou lazennes. Pour nou kapab liber tou zot potansyel, nou bezwen promot en nouvo fason fer. I nepli tan pour zis granmoun desid pour zenn. Tou sa ki konsern zenn i bezwen

annan partisipasyon zenn a tou nivo, menm a nivo desizyon.

Sa i devret konmans kot lakour, kot paran pa zis dikte avek zot zanzan, aköz nou ki paran me nou osi annan en konversasyon dan desizyon ki ganny pran pour zanzan. Sa i ava fer ki nou zanzan i grandi dan lafanmir solid e anpes bann problem sosyal dan le fitir.

Zenn i bezwen o sant transformasyon nou ledikasyon, o sant devlopman nou lekonomi e bann sekter ki pe emerze. Zenn i deza angaze dan domenn lanvironnman, konservasyon e Lekonomi Ble. Lazennes Seselwa i ozordi e i fitir. Me parey Bidze 2022 sa enn Bidze osi napa okenn Polisi targete. Mon sipoze Minis responsab pour Lazennes i ankor pe fer plan. Nou a esper 2024 petet zot ava konplete.

Mr Speaker biznes i moter nou lekonomi e si biznes pa performan lekonomi li menm par pour performan. E a se moman mon bezwen adres en lipokrizi ki nou pe tande dan sa Lasanble. Nou bat lanmen ler Minis i dir ki an 2023 nou pour annan en krwasans dan nou lekonomi ekivalan 10poursan.

Politik a kote. Mr Speaker lo ki baz sa krwasans pour vini? Mon konnen ki Minis i konnen sa ki mon pe dir i byen, mon

konnen ki bokou bann pti e mwayenn biznes pour dakor avek mwan, ler mon dir ki sa program *FA4JR* in soutenir zot biznes e garanti ki zot biznes in ganny en sans rekipere ler sityasyon i amelyore.

Mr Speaker, i annan kantite pti biznes ti'n met lanmen lo latet ler lemonn ti'n preski dir paralize an 2020. Det avek labank, travayer pour peye, mentenans zot lenfrastruktir. Tou keksoz ti dan dout. *FA4JR* in gard lespwar e permet mazorite *bounce back*. Annou donn kredi kot i merite.

E ler nou koz *bounce back*, Gouvernman *LDS* pe pran laglwar. Zis mazine si nou pa ti annan en bon relasyon avek pei Arab. Sa bann menm Arab ki zot in pas zot letan dan Lopozisyon kritike. Vaksen in ganny donner, wi aköz nou bon relasyon. Me pa obliy lenter biznes tourist ki *UAE* i annan Sesel.

Mr Speaker nou dan *United Seychelles* nou senserman krwar ki menm si nou pe war siny pozitiv ki lekonomi pe amelyore, e biznes pe retourn performan, nou krwar fermeman ki i ankor annan biznes ki ankor pe fonksyon lo en baz mwan pou mwan, e okenn sok eksteryer i

kapab fer zot troun dan difikilte.

Se sa ki nou pe dir pour retourn biznes lo en baz solid, nou bezwen entrodwir en *post-Covid Stimulus Package*. Nou pe osi dir ki dan serten ka ofer bann don ki pour devlop nouvo nide pour devlop nouvo sekter ki pli rezilyan.

Nou deza annan en *track record United Seychelles* - travay ki nou'n konmanse dan domenn Lekonomi Ble. I malere ki tou bann sipor pour biznes ki dan sa Bidze, se bann kontinyasyon program Gouvernman avan. Ankor napa nouvo linisyativ e napa okenn sanzman.

Lagrikiltir; Mr Speaker nou Sekter Lagrikiltir pa pe avans parey nou ti ava anvi. Se pourtan *Covid-19* in sipoze donn nou en leson. Minis in dir ki nou pou war en krwasans Selman 1poursan dan lannen 2023. Sa i pa soka.

Problenm fermye in anta. Problenm lo stor lagrikiltir, konpetisyon avek enportater ki met zot transport partou lo Mahe e vann lavyann legim *wholesale*; loportinite vann ek lotel par nou bann fermye i reste tre pe. Larzan ki dan Bidze i pa pour kre sa vre krwasans ki pour relans sa sekter. E nou

bezwen nouvo nide, siporte par en Bidze sibstansyel.

Konmansman zot manda zot ti koz lo relansman kiltivasyon kannel, lavannir eksetera konman en nouvo sours reveni pour nou lekonomi. Malerezman dan sa paragraf dan Bidze lo Lagrikiltir, nou pa'n tann naryen. In mor an nesan e napa nouvo linisyativ. Avek sa Gouvernman pour napa en sou sanzman dan Sekter Agrikol. Pour napa okenn transformasyon!

Mr Speaker drwa imen ek drwa lekspresyon i fondasyon nou Konstitisyon e sa de size ti ganny koz lo la bokou par *LDS* ler zot ti dan Lopoziyon. Annefe mon'n deza antann Prezidan Ramkalawan dir dan en *interview* avek TeleSesel ki 'o fet konman bann liberal, marse lib e drwa imen i labaz krwayans bann liberal.'

Me malerezman Mr Speaker la Pratik apre ki zot in ganny pouvwar i pa neserman le ka. Isi menm dan sa Lasanble, souvandfwa nou ganny difikilte pour eksprim nou konman en lopoziyon. Konferans Lapres nou Parti *United Seychelles* in ganny *ban* par *SBC*. Tou resaman bokou Seselwa in soke pour vwar ki *SBC* in ganny

somonn par L'Egzekitiv, aköz en program kot partisipan i sipoze eksprim zot lopinyon. Me i paret ki sa in ofans bann gran imsy *State House*.

Parey Onorab Georges in dir bomaten, an sa ki konsern laliberte lekspresyon, eski i pare pou kondann aksyon Vis-Prezidan e *State House* an sa ki konsern program "Lopinyon"? Dan tousala nou demande oli Komisyon Medya? Ki rol Komisyon Medya?

E la mon le fer en demann avek Lasanble e pli partikilyerman avek ou Mr Speaker, ki sa Komisyon i aparet devan Lasanble Nasyonal pandan Staz Komite. I enportan ki i fer son pozisyon, kler pour sa Bidze ki pep Seselwa pe vers ver sa lorganizasyon.

An konklizyon Mr Speaker Bidze 2023 pa'n anmenn gran lespwar pour la mazorite pep Seselwa. Mazorite ki ti annan en lespwar pou annan en pti soulazman baze lo bann diferan parol ki'n ganny donner diran lannen, in finalman dezapwente.

Aprè sa 2an ki *LDS* in o pouvwar, bann travayer dan sekter piblik ki zot *long service* ti'n ganny met *on-hold*, ti pe ekspekte en revizyon dan sa desizyon.

Malerezman zot in ganny kit ater. E la mon pe mazin bann *teachers* e *nurse* ki lo menm nivo kad me diferan letan servis. Zot saler ler i konsolide, i annan gran diferans. Tousala pa'n ganny eksplike e zot in ganny kit ater.

E la avek sa lensertitid bokou pe mazin pran zot retrait akoz zot pa pe kapab esper 65an. Zedi dan repons i annan manm ki ti dir ki Fon Pansyon pa pour Gouvernman e Gouvernman pa kapab dir avek Fon Pansyon ki pour fer. Sa fon i pour bann travayer ki kontribye. Sa i zot gran parol ler zot pa anvi fer nanryen!

An servan sa menm lozik Mr Speaker, mon alors dir avek Fon Pansyon si sa i nou fon, vin ver nou e les mazorite pep Seselwa pran desizyon lo sa zafer ogmant laz retrait, pour akse fon pansyon.

Les kontribiter osi annan en lavwa dan sa desizyon. Nou dan *United Seychelles*, nou pe demande ki sa desizyon i met *on-hold* ziska ler ki travayer Seselwa ki kontribye, i donn son verdik.

Bokou profesyonnel pe osi demande avek sa konsolidasyon *allowance* sirtou *allowance marketable skills*, ki pour arive ler zot in fer en lavansman profesyonnel?

Ozordi *scheme* anba zot *cadre* i kler, e ou konn ou progresyon finansyel. Sa ki'n entrodwir i pa kler e pa pour ankouraz devlopman akademik e profesyonnel. Bann profesyonnel sekter piblik ki pe aktyelman swiv bann kour ki dapre zot *Scheme* i en *requirement* pour permet zot ganny en logmantasyon dan zot *marketable skills allowance* i bezwen rod leksplikasyon avek zot seksyon *HR*, lo ki mannyer zot pour benefisy e avek sa nouvo lanons kot sa i ganny konsolide dan saler?

Mr Speaker, sa Bidze pa al ase lwen pour la mazorite pep Seselwa. E avek lensertitid ki lannen 2023 i prezante ek en prozeksyon lenflasyon 4ekek poursan, lavi pour pli dir dan Sesel sirtou pour bann ki sa Bidze pa'n tous zot.

An konklizyon mon oule repet ankor, ki apre ki zot in byen aranz zot pour en peryod 2an menm dan letan ki ti swadizan difisil, zot decide inyor la mazorite travayer Seselwa e pti biznes.

Anba Gouvernman milyonner prometer pti donner *LDS*, sa Bidze in kit Seselwa deryer. Zot napa en sou konpasyon pour mazorite e les mwan dir zot 2025 sa pep pour met zot deor! Mersi Mr Speaker.

**(APPLAUSE)**

**MR SPEAKER**

Mersi Onorab. Laparol i aprezan pou Onorab Desheila Bastienne.

**HON DESHEILA BASTIENNE**

Mersi Mr Speaker. Bonzour Mr Speaker. Bonzour tou koleg Onorab e bonzour tou dimoun a lekout e tou zabitan Perseverance.

Mr Speaker, Vandredi le 4 Novanm ti en zour vreman eksitan pou nou Lasanble e pep Seselwa an zeneral. I ti eksitan akoz Bidze 2023, prezante par Minis Hassan, Minis pou Finans in anmenn bon nouvel e osi bokou soulazman pou Pep Seselwa, ki *MNA US* ti pre pou sorti dan Lasanble an tayan.

Mr Speaker, malgre bokou spekilasyon ki sa Bidze pou dan lentere zis sekter piblik, i kler ki laplipar bann endividi ki ti pe kontinyelman *boycott* e pa war naryen bon dan sa Bidze, se menm dimoun ki touzour war tou sa ki Gouvernman i fer pa bon. E pa'n zanmen ase, akoz zot in pri dan zot prop kwen ki ranpli avek zis negativite. E kot zot ti lib pou donn bal mannyer zot ti anvi.

Mr Speaker, mon bann koleg *MNA US* pa'n koz preski

ditou lo sa Bidze li menm. Zot in telman perdi dan larealite lavi ozordi, e travay ki Gouvernman *LDS* pe fer pandan, in fer pandan zis 2an i tro fermal lo zot. E sa Bidze ki Minis Finans in prezante in en lot sok. Alor napa naryen pou dir. Zot in bezwen zis vin koz lo sa *rally* pli vid ki zanmen ki ti fer Anse Boileau. E apre profite pou fer politik sal lo en aksidan ki'n enplik enn nou Minis. *Minister* Derjacques. Apard sa, zot dir napa naryen ankor pou koz lo la.

Mr Speaker, proverb i dir ler ou reste dan lakaz an vit ou pa anvoy ros. Aksidan i kapab ariv avek nenport drayver ki servi semen piblik. I kapab ou menm. Ou madanm. Ou zanfan, ou ser, ou frer, e en nenport dimoun dan ou fanmir. Maler pa averti. Atansyon *mes chers amis*. Annou aret pran plezir dan maler ki kapab ariv avek nenport ki, a nenport ki moman!

Mr Speaker, la nou'n kapab ganny pli byen konpran akoz dan laplenn Anse Boileau ti annan gran trou Lendi bomaten. Set akoz sa Bidze ti tro lour pou *US*. E zot in pile dan sa labou avek laraz, konmsi Onorab Gabriel! Wi, sa Bidze ti tro lour pou zot.

Mr Speaker, parey Onorab Gabriel in dir dan son *speech*, sa laraz ki avek zot. San dout nou pa pou war li drol ki Onorab Naddy Zialor pe ganny menase. Sa in toultan zot.

Lakle baro *State House* ki ti ganny vole dan lannwit le 5 Zen '77, atraver vyolans, kot serten nou frer ti perdi zot lavi. Pou zot sa ti fason pli zis pou pran en pei demokratik. E zot in toultan dir ki personn pa pou pran sa lakle avek zot. E nou *LDS*, nou ti pran sa lakle trankilman e dan lape, atraver bwat vote le 25 Oktob 2020. E nou pou gard li ankor pou en bon pe lannen ankor.

Mr Speaker, ler nou Gouvernman ek son bann *Leaders* pe fer en travay pou benefis pei. Lopozisyon i kontinyelman devlop laenn. Kontinyen menas dimoun. Fer dimoun per akoz sa laswaf pouwar, i fer zot pa dormi byen e ganny kosmar laverite.

Mr Speaker, mwan mon pou felisit Gouvernman dizour, pou sa bon travay ek sikse ki'n anmennen pou Lepep Seselwa pandan zis 2an. Pou mwan, sa Bidze pa pe kit personn deryer. I pe fer provizyon pou tou nou bann frer ek ser travayer. Tou dimoun dan Gouvernman koman dan prive ki leve bomaten, i desann pou al travay

8er 4er ouswa 5er ou menm ziska 6er diswar.

Mr Speaker, ozordi tou sa ki ou war li pe benefisyé dan sa Bidze, se nou frer ek ser ki pa asize e fye lo *welfare*. Plant 2 pye kanabis, rod problem met lo zot ek zot fanmir, apre blanm tou dimoun e kontinyelman konplent ki Gouvernman pa pe get zot.

Ki mannyer serten nou, nou oule ki Gouvernman i get nou plis ki sa? Travay i ganny met a ou dispozisyon. Ankor ou ankor pe *pick and choose*. E ou annan tou sord leskiz. Ler ou pa pare pou fer zefor an plis pou ou prop lekor ek ou fanmir.

Ler ou pas ou letan zis konplent dan ou landrwa travay. Bomaten letan ou antre dan biro, ou bonzour se *boycott*, fer propagann e pas ou letan senm rimer gos, drwat! Gaspiyaz letan travay e pa delivre. Trenn lipye e an menm tan se ou menm ki pou konplent ki Gouvernman pa pe get ou.

Mr Speaker, mon'n toultan tann dimoun pli aze ki mwan, dir ki "nou bezwen aprann marse avan ki nou le taye." Mon'n tann dir pasyans i geri lagal." "Zwazo pa fer son nik dan en zour." E mon fyer pou dir ki nou Gouvernman in montre nou larealite. Nou'n

espere, nou'n pasyante, e ozordi nou annan tou rezon pou nou selebre.

Mr Speaker, apre 2an ki nou Seselwa in espere, in pasyante, in solider avek Gouvernman pou ede anmenn en lalit pou war en lafen avek *Covid-19*, ki ti pe kree retar dan nou pei, ozordi nou fyer pou nou arive rekolte lapenn sa bann sakrifis ek nou lapenn espere.

Anplis ki sa, nou pe rekonnèt valer ki rezilta pozitiv, tou sa bann desizyon difisil ki nou Gouvernman ti war li i nesese pou pran, ki'n anmenn solisyon pou nou pei ozordi.

Mr Speaker, dan sa dernyen lannen ki'n pase, Gouvernman in fer li son devwar pou rod solisyon, pou tir nou pei dan sa trou ki ti'n plonz ladan.

E an premye i ti fer sir ki nou ti annan manze, *fuel*, annan latizann, ase komodite debaz, enkli lafarin, lantir, dile pou baba, vaksen nesese e osi lezot komodite priyoriter pou soutenir son pep. Se sa ki nou apel lakonplisman en Gouvernman responsab. En Gouvernman ki pa zis depanse pou zis fer en pti group kontan. Me i travay pou son pep antye!

Mr Speaker, la i fer mwan demand sa keston, nou bann

Seselwa dan Sesel, koman aletranze, ki pe swiv nou, eski zot in oubliye konbyen ki ti reste dan kof, ler Mr Wavel Ramkalawan ti vin Prezidan pei le 25 Oktob 2020?

Mr Speaker dan kof pei an Oktob 2020 ti annan selman R14.9milyon pou fer bouze en pei ek tou son pep! E mon a fer zot ankor mazine ki sa 14.9milyon ti'n ganny kale avek son ta det ki ti'n akimile atraver bann aksyon ek desizyon irresponsab, par Gouvernman Lepep *US!*

Sa bann ki zis asize lo *Facebook*, e pas tou sord komanter negativ. Ki kantite zot ki ti fer en kalkil pou gete si sa pei ti pou sirviv? E ki tou fanmir Seselwa ti pou ganny en saler pou anmenn manze kot lakaz? E kalkile ki kantite mwan sa R14.9milyon ti pou arive soutenir en pei parey Sesel?

Les mwan dir zot ki Sesel in sirviv, akoz Bondye ti met sa pei dan lanmen en zonm responsab, ki rod solisyon, ki pran bon desizyon e ki met son pep an premye.

Mr Speaker ozordi ankor letan nou fer refleksyon lo sa 2an malgre tou mannev ki'n ganny fer pou met retar, tou bann propozisyon negativ ki ti pe ganny met ater zis pou fer nou Gouvernman *fail*, nou dir

mersi Bondye ki nou Gouvernman ti kontinyen pran bann bon desizyon. In pouse. In tape lo diferan laport. In ankouraz son pep pou pran zot vaksen kont *Covid*.

E se sa ki ti fer, ki nou ti kapab gard nou *Airport* ouver e osi les bato antre dan por Victoria. Re organiz fason anmas plis *tax*. Koup lo gaspiyaz resours. Prioritiz lasistans *welfare*. Met en *stop* avek sa bal ki ti pe ganny donner dan *FA4JR*. E bokou lezot depans initil ki ti pe zis sis Kof Leta e ti pe zis fer dalon kontan.

Bann ki ti pe ganny 3 saler degize dan laform *allowance*. Alor nouvo Gouvernman ti fer li son devwar pou met en lord dan tou sa bann dezord. E se sa ki ozordi tou sa bann ki ti pe byen benefisye, zot ankor pe grense!

Mr Speaker, gras a tou sa bann bon desizyon ozordi pep Seselwa pe temwanny zistans nou bann progre. Tel ki lakaz i kontinyen konstri dan plizyer distrik. Semen i ganny re sirfas, e plizyer nouvo *lane* i ganny azoute pou redwir trafik.

Renovasyon i kontinyen lo lekol *NIHSS*, pou permet nou akeyir e ankouraz plis zenn dan profesyon *nursing*. Bazar dan bann distrik i kontinyen konstri avek sipor *SFA*. Lekol pe

kontinyen konstri enkli plizyer lezot devlopman ankor.

Mr Speaker, sa ki pli enteresan ankor dan sa Bidze, se ki Seselwa ki travay e ki'n reste solider, e donn tou, lannen 2023 zot resevwar zot merit atraver en logmantasyon 10poursan lo zot saler. Ki dernyen fwa en Seselwa in deza ganny en tel logmantasyon par lao R1,000? Ki dernyen fwa? Si ti annan, i ti zis en pti group ki ti gannyen.

Mr Speaker, Gouvernman pou le moman pe kapab donn son pep en logmantasyon 10poursan lo zot saler. Mon krwar i ti a kapab fer plis ankor si Gouvernman Lepep *US* pa ti'n kit pei dan sa ta salte avek sa kantite det, ki ozordi nouvo Gouvernman i war li pe pey tou pou zot!

Koz laverite, dir avek Lepep Seselwa akoz zot pa pe kapab ganny plis ki sa, set akoz zot prop lafot. Zot in donn bal dan larzan piblik partou kote. Partou kote kot zot in pase, zot in kit zis det deryer! Donn bal dan *VIP lounge*. Ozordi e tou sa bann det Gouvernman dizour, li ki bezwen peye, e ankor zot ganny lodas demann plis larzan ankor.

Alor mon bann frer ek ser, annou dir mersi sa ki nou pe gannyen, akoz mon asire ki



anba Gouvernman US, petet zot ti ava pe ganny zis R250 logmantasyon. Ou menm manke zot pa ti pou ganny naryen apre kot sa pei in arive ozordi.

Mr Speaker, parey Minis pour Finans ti dir dan son *interview* Lendi le 7 Novanm, atraver sa logmantasyon, se sak endividi ki bezwen fer li son devwar pou konn depans son larzan. Seselwa i konnen pri bis ti R24. Pa fek ganny arive la aköz sa logmantasyon. I konnen ki i bezwen pey son lakaz, son elektrik, son delo, aste manze letan zot ganny zot saler lafen dimwan, se sa ki nou apel priyoritiz ou saler. Konnen kwa ki ou priyorite nimero 1.

Mr Speaker, letan ki mon pe tous logmantasyon saler, i donn mwan gran plezir pou koz lo fason travay ek *delivery* dan tou sekter. Gouvernman in koz bokou lo donn bon servis e delivre. Bon lakey dan landrwa piblik. Lefikasite. Ase fer dimoun monte, desann, avan ki i resevwar en servis ki i ape rode. E annou tir fristrasyon. Tou sa bann kalite, letan nou fer li byen, nou delivre i vin avek son rekonpans.

Mr Speaker, dan bokou landrwa travay in annan amelyorasyon, kot travayer i pran son travay aker e i donn

servis de kalite. Me i ankor annan en pti group ki pe ganny ankouraze pou kontinyen trenn lipye par ekspre! Aksyon malisyè e zot krwar zot ki la. Swa zot pe ganny dir ki manner pou fer dimoun fristre. E ki Seselwa i a kontinyen ganny pini. E la byensir sa i a fini atraver fristrasyon e tou blanm i a tonm lo zepol Gouvernman dizour.

Mr Speaker, nou war e nou konnen ki i annan sabotaz, e nou konnen ki zot pe ganny ankouraze pou fer lavi Seselwa malere.

Mr Speaker mon pou donn en legzanp kler, kot en dimoun in pas atraver en aksyon pirman malisyè kot servis Lapos Sesel, Seksyon ki delivre parsel. En madanm i *order* en lenz avek son larzan ki'n travay vreman dir pou gannyen pou lokazyon son laniverser.

I ti son swa Mr Speaker, aköz sa madanm i leve 3er bomaten pou li konmans travay. E alor pou li son laniverser ti en keksoz spesyal. I ti anvi *treat* son lekor. Oli problem ladan? I ganny lenformasyon ki parsel in arive dan lapos depi le 13 Oktob 2022.

Lendi 17 Oktob i al lapos i ganny dir, "pa ankor pare, nou bezwen fer prosedir." Le 21

Oktob sak pa ankor ganny ouver. Le 26 Oktob, “nou ankor pe fer prosedir. Espere, nou ava anvoy en mesaz lo ou *mobile*.” Le 31 Oktob i retournen, zot dir li “prosedir ankor pe fer. Nou ava *text* ou letan nou pare.”

Mr Speaker, sa *text* pa’n zanmen delivre. Le 3 Novanm, 2 zour avan son laniverser, i anvoy en zanmi, akoz petet li i annan en vilen figir, an krwayan ki son zanmi i a pli sanse. I al kot lapos pou resey reklanm sa parsel, maler, i ganny demande “ou ki ou? Ler nou a pare nou ava *text* sa madanm. Nou pa kapab fer naryen.”

Mr Speaker. Sa bann travayer la dan Seksyon Parsel kot Lapos Sesel. I konn zot travay koman zot 10 ledwa. Zot in fini *master* sa travay e zot konnen ki groser parsel ki i annan lenz ou soulye, *name it. Shein, Ali Express* ek lezot *site*, ki fer vin lenz, in fini popiler dan seksyon Parsel Lapos.

Ou pran en mwan pou idantifye en kalite parsel parey? En pti parsel ki annan zis en lenz ladan?

Mr Speaker sa madanm ti bezwen desann anvil le 4, lavey son laniverser, al aste en lot lenz, fer en lot depans. E ozordi le 14 Novanm son lenz i ankor dan Lapos Sesel!

Mr Speaker eskize, pou tou respe, mwan tanka mwan, mon laniverser in fini pase. Sa rob ki’n pri dan Lapos Sesel pa’n anpes mon selebre mon laniverser. Ler ou *call* mwan ou dir mwan vin serse mon pou dir ek ou, “kit lanmenm mon pa bezwen prezan!”

Mr Speaker, sa i en legzanp tipik, kote ki trenn lipye i vini! Kote ki malis i antre, e kote ki fristrasyon i konmanse! Fodre nou pran kont osi ki kot Lapos napa naryen ki donner *free*. Tou servis i ganny peye. Tou servis i annan son pri. Par ler Seselwa i bliye kote zot saler i vini. Mon poz sa la Mr Speaker. Alor ler Gouvernman i entrodwir *performance appraisal* nou tonm kriz? Kan nou menm ki rode?

Mr Speaker, ozordi mon pou dir ki in ler pou Gouvernman entrodwi en Biro Konplent, kot piblik ava al anmenn son konplent ek konsern e bann Sef dan sa bann biro. Kot konplent i ganny mete kont zot landrwa travay ek zot *staff*, a vin reponn kestasyon. E zot ava oblize aranz zot bann *staff* ki krwar zot pou kontinyen fer dimoun fristre.

Mr Speaker in osi ler ou fer bann travayer dan bann biro piblik met en *badge*, ki i annan zot non lo la, pou kapab

idantifye zot. Sirtou sa bann ki krwar zot *untouchable*! E zot kapab kontinyen fer sa ki zot anvi dan sa bann biro. Akoz ozordi i annan serten zot ki menm refize donn zot non lo telefonn ler ou *call* dan en biro pou en servis.

Mr Speaker, Sesel i pou tou son zanfan. Me sa pa vedir ki ou kapab fer sa ki ou oule dan sa bann biro! Ou'n ganny mete la pou travay me pa pou fer dimoun fristre. Pa pou tir ou fristrasyon politik lo manm piblik!

Si ou pa oule travay avek sa nouvo Gouvernman, ou senpleman *resign*. E en lot dimoun a pran sa plas, akoz *le conseiller pas le payeur*. Apre demen se zot menm zot ki pou kriye, "viktimizasyon politik!"

Mr Speaker, Gouvernman LDS i oule war transformasyon dan son pei. I pe fer tou pou ki sak Seselwa i pran son responsabilite, transform son lavi e leve e debourye.

I le war nou pei ek son pep bouze. I le devlop en kiltir lakourtwazi. Annan respe, annan lape antre nou. Nou en pti popilasyon e partou kot nou vire nou konn preski tou dimoun. Alor i enportan ki nou annan sa zwa de viv antre nou, e ki lazistis i rennyen dan nou pei.

Mr Speaker, an rezilta sa travay eksepsyonnel ki nou bann *leaders* in delivre akote nou Prezidan, ozordi nou war bokou lezot pei, pe servi Sesel koman legzanp lo ki mannyer pou zer en lekonomi dan en moman, kot i annan en kriz mondyal. E la nou pran legzanp *Covid-19* ek lefe lager ant Ikrenn ek Larisi.

Bidze 2023 i enn ki pou distribye rezilta sa bon travay ek determinasyon son Gouvernman. Ki pa'n les tonbe. Ki'n servi son lespri ek tou son konpetans. E atraver sa Bidze, nou pou war plis lenvestisman dan lenfrastruktir pou byennet sosyal nou popilasyon.

Mr Speaker, ler mon nonm lenvestisman, mon pa pou rat sa sans pou koz fyerman lo distrik Ile Perseverance. Mr Speaker Ile Perseverance i en distrik ki'n annan plis ki 12an legzistans. Ki mon'n vin zwenn dan Perseverance? Tou biro Gouvernman pe okip 2 lakaz ansanm. *MLUH, GIBBs*, stasyon lapolis, Biro Ladministrasyon Distrik, 2 pou 1. Biro Lazenek eksetera, tousala i dan lakaz.

An tou nou ti kapab deservi 14 dimoun. Peser ti pe vann zot pwason ater o bor semen lo *palette*, lapli koman soley. Mr Speaker, 18 mwan apre ki ou Gouvernman *LDS* in

pran labar e mwan konman *MNA*, peser dan Ile Perseverance ti ganny en bazar, apre ki mon'n tap laport *SFA*.

Lasosyasyon Peser in ganny formen ansanm avek sipor bann lezot dimoun ki servi sa bazar pou vann zot fri ek legim. *SFA* in promet nou pou *upgrade* sa bazar Perseverance, la ki prezan i pou, i pa pou bouze kot i ete. E pou annan travay ki pou ganny fer lo la pou fer li vin pli gran e pli modern.

Dan sa Bidze Perseverance, nou pou ganny nouvo *building* ki pou annan sant kominoter, lofis *MNA* ek *DA* e osi lezot fasilite ki a deservi lakominote Ile Perseverance, kot tou dimoun pou annan en par dan sa proze. Zanfann, bann zenn ziska nou bann dimoun aze, a lafen zot a ganny en landrwa apropiye e konfortab pou fer zot ti rankont ler zot anvi.

Mr Speaker, deza proze *condominium* in fini demare. 16 *unit flat* in osi komanse dan Perseverance (1) ki pou pran apepre 10 mwan pou konplete par Oktob 2023. E la nou bann dimoun ki pe fer zot kontribisyon a tan e azour, zot a kapab ganny zot lakaz.

Mr Speaker, dan sa Bidze nou war nou Stasyon Lapolis. Tro bokou letan bann zofisye

lapolis Perseverance pe travay kwense, zot osi, e enkonfortab. Ler mon antre dan sa stasyon, ou bezwen fer sir letan ou ouver laport. Akoz ou riske tap en zofisye, ouswa en lot zot dimoun ki la ki vin rod en servis.

Mr Speaker, in plis ki ler pou tou sa bann biro annan en landrwa pli konvenab e pli vizib, e sorti dan bann lakaz ki Gouvernman Lepep *US* ti met zot ladan. Zabitan Perseverance pe demann en servis *ATM*. E la Lotorite Distrik ansanm avek mwan, nou pe negosye en landrwa konvenab avek Minister Gouvernman Lokal, ek Minister Later, pou nou ganny permisyon met en *ATM*. E sa negosyasyon i osi pe ganny fer avek en labank spesifik ki pe montre lentere pou vin met en *ATM* dan Perseverance.

Mr Speaker nou'n osi aprann ki annan en lenvestiser prive ki'n pare pou met en *ATM* dan Perseverance. Alor mon oule dir avek zabitan Perseverance, zot pou gannyen zot *ATM* par 2023.

Mr Speaker, nou lot proze mazer ki nou pe espere avek pasyans, se proze lalimyer *solar*, pou bann *streetlight* dan Ile Perseverance. Vandaliz i kontinyen lo *streetlight* dan Perseverance. Nou konnen,

kontrakter i aranze. Lalimyer i marse ozordi, demen i rekase. I annan dimoun ki ganny anvoye par ekspre pou sabotaz lalimyer. E i annan ki kas sa bann lalimyer avek lentansyon pou vole.

Domaz lapolis pa ankor atrap personn, me sa pa pou dekouraz nou. Ler nou kontinyen kase, kontrakter pou vin aranze li byensir. E i pou bezwen ganny peye. E apre nou menm ki pou rode kote larzan i ale, ler nou kontinyen pey menm keksoz, aranz menm keksoz.

Mr Speaker nou pou kontinyen fer nou travay, akoz ler pou arive kot en zour sabotaz pou bezwen arete. Lot proze dan Perseverance set en *multipurpose court* ki deza i lo proze anba Gouvernman Lokal. Ozordi i malere letan nou get sa 2 *court* ki'n tonm preski an rin. Baro i ater. Gro, gro trou in ganny koupe dan son baraz. Napa en *changing room*, ni en fasilite *toilet*. Nou bann zenn pe rod landrwa pou de-foule.

Mr Speaker, nou sel tim *sport* ki nou tann nonmen pou le moman, se tim football Perseverance ki pe fer ase byen. Me i napa en landrwa, en laplenn, pou li fer son *training*. Pou le moman, nou pe bezwen negosye en laplenn kot lekol

*Independent School*, pou zot kapab fer zot *training*.

Domaz mon bann zanmi, se Lasosyasyon *Cricket* ki'n ganny priyorite lo zot. Zabitan Ile Perseverance. E se zans i dir klerman la pou zot. Pa vin deranz zot laplenn e pa vin met okenn trou dan zot laplenn!

Mr Speaker i kler ki Gouvernman avan, letan i ti a pe konstrir lakaz dan Perseverance, i pa ti mazine ki ti pou annan zenn ki ti pou devlope demen. Diferan kalite *sport* ti pou bezwen ganny enplike dan Perseverance. I ti mazin zis annou fer lakaz pou nou ganny plis vot ankor. La lezot lenfrastruktir ki ti vin avek en distrik, pa ti dan son plan. Pa ti pe enteres zot sa letan.

Mr Speaker, ankor Perseverance 2003, nou pou kontinyen avek plizyer proze. Tel ki enstal nouvo *bin site*, konstri en fasilite rekreasyonnel ki ava atir bokou lezot dimoun, ki a vin pas en pti letan detann. Renovasyon lo bann *playground*. Enstalasyon ankor enn de *speed bump*. Akoz ankor annan enn de bann pti menn ki vin fer *speed* dan Perseverance. E zot bliye ki i annan zanfan ki reste pre avek semen.

Mr Speaker, mon remerisi Lepe Seselwa ki'n met konfyans

dan nou Gouvernman. E ki'n krwar dan son promes pou delivre nou pei. Pou arive tir li dan sa semen presipis. Mersi Lepep Seselwa pou met konfyans dan nou bann Minis, ki'n pouse zot osi pou fer en travay eksepsyonnèl, pou ede diriz nou pei dan sa moman difisil.

Mersi Minis Hassan pou sa travay eksepsyonnèl, ki ou Minister ek tou ou bann teknisyen ek lezot travayer a kote ou. Sakenn in kontribye pou arive donn nou en sitan zoli Bidze pour 2023.

Mersi DA, Aaron, Nichole, Owen, Fraxy, Ms Chantal, mon *clerk* Ms Hazel Larame ek tou lezot travayer dan tou lede distrik dan Perseverance, pou tou zot sipor e pou ede fer nou distrik bouze.

Mr Speaker, pli gro mersi i al pou nou Prezidan. Ki'n diriz sa lekip solid. Zot pa'n vwale. Zot in konsantre lo sa ki bon pou nou pep ek pou nou pei Sesel. Mersi Mr Speaker.

### **MR SPEAKER**

Mersi Onorab.

### **HON SEBASTIEN PILLAY**

(*Off-Mic*)

### **MR SPEAKER**

Yes Onorab Pillay.

### **HON SEBASTIEN PILLAY**

Mersi Mr Speaker. Mon annan en *point of order* anba *Order 8*. Bomaten ou'n dir ek nou koumsa poudir i annan en serten nivo respe ki bezwen ganny mentenir baze dan *matter of privilege* ki Onorab Georges in anmennen. En *speech* in ganny fer la in akiz *United Seychelles* pou fer sabotaz. *Ok?*

Largiman ki'n re ganny avanse bomaten, nou ganny akize pou fer sabotaz. E menm nou'n tann koz lo en rob ki en dimoun in fer vini lapos eksetera. *Now*, sa ki ou bezwen fer, mwan mon pran sa koman en keksoz serye mwan! Sa ki bezwen ganny fer, (Mr Speaker, eski Onorab Flory Larue i kapab les mwan koze silvouple)?

### **MR SPEAKER**

Kontinyen Onorab, me selman mon'n fini konpran ou *matter of privilege*. Terminen apre mon ava adrese silvouple.

### **HON SEBASTIEN PILLAY**

Sa ki bezwen ganny fer se ki mon krwar i enportan ki *CEO Postal Services* i donn en larepons sa alegasyon ki Onorab i fek fer la. Lo sa *case* an partikilye, akoz zisteman

pou nou viv sa ki Onorab Georges in dir bomaten. Ou'n dir nou annou resiprok. Koumsa nou a fer sir poudir sa ki nou, nou dir osi dan Lasanble i baze lo bann fonnman. Mon ti a kontan met sa devan ou akoz ...

**MR SPEAKER**

Mersi.

**HON SEBASTIEN PILLAY**

... apre sa i pou anmenn en reaksyon. Be si ou pa konnen eski ler mon pe koze i en problem pou mwan koze dan Lasanble?

**MR SPEAKER**

I en problem si ou pa adres size ki ou sipoze pe adrese.

**HON SEBASTIEN PILLAY**

Be mon'n adres mon size. E Onorab...

**MR SPEAKER**

Mersi Onorab.

**HON SEBASTIEN PILLAY**

... mon pou dir ou mon'n adres size. Akoz si en problem ou pa pou vini pou pini nou sa ...

**MR SPEAKER**

Mersi Onorab.

**HON SEBASTIEN PILLAY**

... sak fwa en keksoz i ganny dir la deor ou!

**MR SPEAKER**

I en problem osi pou ou adres bann remark ki pa respektab. Ki pa montre respe pou Speaker. Mersi.

Ok, Onorab mon konpran ou *matter of privilege*, selman mon oule dir premye mon pa ti enterpret koman term Onorab Bastienne, konman vize ver ou parti. Mon konpran in koz lo serten defayans dan sekter piblik, parey plizyer Manm in fer. Donk mon pa war okenn *matter of privilege* ki'n arise la. Mersi. Nou a pran poz, nou a pran poz la. Nou a rebran 11er en kar. Mersi.

***(BREAK)***

**MR SPEAKER**

Mon a zis enform nou piblik ki nou retar i akoz nou ti annan en *fire alarm* e ki nou'n fer en pti legzersis evakyasyon. Nou a kontinyen avek deba. Onorab Clifford Andre ou annan laparol.

**HON CLIFFORD ANDRE**

Mersi Mr Speaker. Bonzour Mr Speaker, Minis, tou Manm Onorab, tou dimoun ki a lekout. Espesyalman zabitan Anse Aux Pins. Mr Speaker, en

pei i bezwen en Bidze. E en Bidze i ganny fer lo en plan, lo en baz anyel, pou gete ki mannyer reveni i ganny anmase. E ki mannyer i pou ganny depanse. E Sesel pa en leksepsyon.

Bokou pe kritike e dir ki i annan trou oubyen sa Bidze i pa bon. Sa i zot swa Mr Speaker, pou zot kapab determin koumsa. Sesel i en pei kot tou dimoun i devret santi li i form par sa devlopman ki pe arive dan nou pei. Bann dimoun aze, menm bann zanfan e lezot ki pe travay.

Parey Minis in dir, e mon osi mon oule re afirmen - mon oule re afirm sa, tou dimoun i merit ganny remersye, akoz san zot sipor nou pa ti pou la kot nou ete ozordi. Ler nou get nou pei Mr Speaker, nou bezwen dir mersi nou bann dimoun aze. Akoz se zot ki'n anmenn nou pei kot i ete. E la nou pe permet zot repoz dan konfor.

Mr Speaker, mon ti a kontan demann Minis pou revwar sa R500 logmantasyon, akoz menm si nou bann sitwayen aze pa pe travay, me zot al dan menm laboutik parey nou tou. Mon dir sa Mr Speaker avek tou respe, pou ki zot osi zot ava ganny soulaze par sa logmantasyon dan pri lavi.

Mr Speaker, Onorab Cosgrow in dir ki nou pe kontinyen lo bann program ki *US* ti'n met an plas. I enportan note ki Seselwa an Oktob 2020 ti elekte en parti ki ti pou gard sa ki bon, e rezet sa ki pa bon! Se sa akoz ou war ki tou Seselwa pou benefisye.

I enportan note ki bann program ki pou anmenn soulazman pou pep Seselwa, Gouvernman *LDS* pou kontinyen amelyor lo la. Be bann ki nou vwar i pa pe anmenn benefis pou nou pep, nou pou fer sir ki nou ranplas li, oubyen nou met li dekote. Pou ki i pa ava anmenn sa soufrans pou pep Seselwa.

Mr Speaker, mon komans mon analiz lo Bidze avek lazenes. Lazenes se nou lavenir. Lazenes i reste en eleman prensipal pour Sesel. Vot dan Bidze i demontre sa. En alokasyon ki'n ganny fer kot pou pran konsiderasyon, ledikasyon pou nou lazenes, e bann byen net ki asosye avek i vremen enportan. E i demontre ki Gouvernman *LDS* i pran son zenes aker.

Mon pou demann Gouvernman, se pandan, pou revwar bann fason ki bann aktivite kot bann santer e artis sorti aletranze i ganny fer. En zanfan anba laz pa devret dan



sa kalite aktivite Mr Speaker. I responsabilite tou Seselwa, pou ede ki demen nou annan nou en zenerasyon ki kapab anmenn en nivo kontrol lo nou zanfan.

Alors a sa pwen, mon oule osi demann bann organizater sa kalite levennman pou met lo zot tiket, laz ki dimoun i kapab antre dan sa bann kalite aktivite.

Mr Speaker, sa bann aktivite i annan bokou sanson ki annan bann konotasyon vilger e bann danse ki pa apropiye pou manrmay ki par anba 18an. Se sa rezon akoz nou annou bokou difikilte dan nou pei.

Mr Speaker parey mon'n dir, Gouvernman in met alokasyon pou laznes ki enkli ledikasyon. Ledikasyon li menm Mr Speaker in ganny li 1.3bilyon dan sa Bidze ki devan nou. E ki nou pe ganny demande pou nou vot lo la. Sa parey Minis in dir pe reprezant 4poursan prodwi domestik brit.

Alors i vremen enportan ki nou zenes i met zot letid avan e zot fer sir ki demen zot annan zot en travay, en profesyon ki nob. E ki zot osi zot ava satisfè ki zot in fer byen dan zot letan ki zot ti annan ledikasyon, kot nou bann ki travay, nou'n met larzan *tax* e zot, zot in benefisyè.

Mr Speaker i osi enportan pou note ki Gouvernman *LDS*, Minis in dir nou in met letid avanse, in pran konsiderasyon letid avanse, kot in met de kote R205.1milyon, pou ki bann manrmay ki *attend* zot lobzektif e *attend* bann grad nesese, zot pou kapab kontinyen fer zot letid avanse.

Mr Speaker, Minis dan son ladres in osi fer remarke ki pou annan en logmantasyon 10poursan lo *stipend* pou bann manrmay ki bann etidyan ki pe etidye dan 17 pei. Mon ti a kontan demann Minis dan son repons, oubyen pli tar letan nou pe analiz Bidze, pou vwar si zis sa 17 pei ki nou annan manrmay ki pe etidye. Oubyen si nou pou osi fer sa, si i annan bann lezot manrmay ki al dan bann lezot pei ki pa parmi sa 17 ki lo lalis.

Devlopman dan Sekter Tourizm: Mr Speaker, Minis in dir nou sa i tonm dan kad *FDI*. I estimen ki 230milyon Dolar Ameriken i pou ganny depanse an 2022. Sa in ede pou siport nou pei. Prozeksyon ki sa sekter pou agrandi par 15poursan dan sekter akomodasyon. E 16poursan pou sekter servis, i vremen enportan.

Sa lagrandisman i anmenn en keksoz ki nou bezwen koman en Pti Leta Zil ki

vreman depan lo touris. An se moman nou annan devlopman lo proze Anse La Mouche. Pli pros avek mon distrik Mr Speaker, nou annan en *proposed development* pou Reef Hotel ki lo *drawing board* depi 3an la.

Sa proze i reprezant en lenvestisman anviron R750milyon. Peyman *tax* ki enkli *VAT* e *tax* lanvironnman pou anviron R100milyon pou sa prosen 3an. Travay pou gannyen pou anviron 350 dimoun. Parmi priyorite pou Seselwa.

Mr Speaker, sa proze ki o bor nou Anse Aux Pins avek Au Cap, peser osi dan sa 2 rezyon pou vreman benefisyé, enkli bann Sekter Agrikol. Sirkilasyon trafik Mr Speaker dapre plan ki'n ganny montre avek nou, i pou ganny amelyore, aköz pou annan serten kondisyon ki pou ganny fer amelyore dan sa proze semen.

Proteksyon lakot pou ganny mentenir, avek bi pou anpes delo mont lo semen dan rezyon les, pandan bann movetan. E osi pandan mare o. Sa proze bezwen ganny en direksyon Mr Speaker. Mon pou demann Minis pou enpoz. Pa pou enpoz plito, pou konsilte avek koleg Minis kot

lanvironnman, pou fer sir ki parey mon'n dir en direksyon i ganny donnen an koneksyon avek sa proze, ki zot ava konnen ki zot pou bezwen fer, oubyen ki zot pa pou bezwen fer pou ki zabitan Anse Aux Pins, Au Cap, e bann ki o bor nou, i ava kapab benefisyé.

Bidze 2023 in ganny ogmante par 4poursan konpare avek Bidze 2022. Sa i en lendikasyon kler ki nou lekonomi pe rebran e ki nou lo bon semen pou anmenn en bon soulazman pou nou pep dan lavenir. Mr Speaker ler nou get lo kote Lasante, Lasante in ganny en alokasyon ki reflekte 13poursan sa Bidze ki pe ganny met devan nou pou nou aprouve.

Mr Speaker, sa retar ki mon'n gannyen, sete aköz mon ti pe fer bann tes. Bann ners i la kot nou Lasanble - Minister Lasante i la kot nou Lasanble, pou fer sir ki nou ganny bann *screening* pou gete ki nou kondisyon e kote nou bezwen amelyore.

Mr Speaker sa i enportan aköz i ti deza lo mon plan pou koz lo la, ki lasante primer i bezwen enn ki pli o nivo. Aköz si nou okip nou lasante primer e nou annan bann servis ki pe fer bann *screening* a tan, i fer ki letan nou annan *secondary*

*health issues*, oubyen *tertiary health issues*, i redwir, e nou kapab vwar, detekte bann sityasyon boner. E nou kapab fer sir ki ganny bann tretman apropiye pou ki i pa agrave.

Mr Speaker, i enportan dan sa konteks ki Minis Finans i angaz li avek bann lakonpanyen lasirans, pou vwar ki mannyer kekfwa nou kapab ganny en *health insurance*. Akoz nou pe vwar kompleksite lasante. E bokou larzan in ganny depanse pou al fer bann tretman aletranze ki pli spesyalize.

Alors si nou annan en metod lasirans dan sa kad, serten dimoun i kapab ganny kouver par zot lasirans, alors i ava redwir sa kou ki Gouvernman i bezwen enzekte pou fer bann tretman spesyalize dan bann pei aletranze.

Mr Speaker, Minis in koz lo revizyon to *tax*. Revizyon to ki'n ganny sanze pou bann *security dealers*, ki fer biznes isi Sesel, zot annan en loperasyon isi Sesel, ki ti 1.5poursan on *assessable income*, e sa ki annan en prezans Sesel.

Mr Speaker sa pe anmenn 116. (*Sorry*) i annan 116 *security dealers* ki'n etabli isi Sesel. E 15 ladan parey Minis in dir pe pey environ R71.5milyon. Minis in dir nou ki Gouvernman

pe ogmant to *tax* ki aplikab pou sa sekter, sorti 1.5poursan pou ariv 3poursan, komansman Zanvye 2023.

Minis mon'n ganny serten konsern, mon ti ava met la devan, ki i annan konsern ki sa i en logmantasyon 100poursan. Kekfwa i merit ganny revwar oubyen fer li en *progressive increase*, ki ava permet sa bann sekter aziste zot. Akoz la nou deza Novanm, pou al pran lefe an Zanvye. Zot ava ganny sa letan pou zot aziste, pou kapab reflekte sa prozeksyon 219.5milyon ki Gouvernman pe prozekte, i pou anmase avek sa logmantasyon.

Mr Speaker, mon ti a kontan en mo kosyon. Mon konnen kekfwa Minis ek son bann teknisyen, zot in vwar sa en mo kosyon, se pou vwar ki si nou pe fer en logmantasyon 100poursan, si sa bann sekter ki fer sa bann servis, i annan bann lot pei ki pli favorab ki pou nou. Si zot pa pou bouze sorti kot nou pou al laba. E nou pou - dan plas anmas 71.5milyon, kekfwa nou pou ganny mwens, oubyen nou pa pou *achieve* sa target 219.5milyon ki nou'n prozekte.

Pri lavi Mr Speaker, i reste en defi lemonn antye. Lager ki annan an Ikrenn, ki annan ant Larisi avek Ikrenn, i koz bokou

problemm pou bann pti pei, menm bann gran pei. Sa i en keksoz ki nou bezwen get ladan a profon.

Mr Speaker, i normal ki nou dimoun pou annan bann kritik. Pou annan bann konplent. Akoz pri lavi i sa ki tous zot pos. Zot bezwen tir larzan pou zot rod keksoz pou zot met lo latab avek zot fanmir. Alors mon pou felisit Gouvernman LDS, pou bann mezir ki i pe pran pou fer sir ki nou gard pri lavi abordab.

Me selman nou, nou annan mo kosyon ki osi dir ki nou siseptib avek bann sok eksteryer ki kapab fer sityasyon reste parey dan nou pei. Me bann mezir ki pe ganny pran lokalman i vremen enportan. E dimoun i bezwen vwar sa. I bezwen vwar ki pou dir i annan bann mezir ki pe ganny pran, pou redwir oubyen pou stabiliz pri lavi.

Mr Speaker, nou'n war ki pri petrol in desann lo laponp, e sa in ede pou kapab fer dimoun vwar en diferans dan zot kou, ki zot met dekote pou zot fer pandan lemwan. Mr Speaker i enportan pou note, par kont, ki sa in ariv zis pou *gasoil*. Alors i enportan ki nou gete bann lezot prodwi ki nou kapab fer desann si i posib.

Me dan sa konteks mon ti a kontan demann Minis, *SEYPEC*, eski akoz ki nou pa aste an *bulk* letan kou petrol i ba, pou ki i a fer ki nou kapab gard sa an stok, pou nou kapab kontinyen, menm si par kont ennler i monte nou kapab gard li lo sa pri.

Elektrisite Mr Speaker, i enn ki'n ganny koz lo la pandan sa letan ki nou pe pas Bidze. Bokou dimoun in vwar zot *bill* elektrisite monte. Zot pe demande akoz? Eski Minis i kapab posibleman donn nou en lesplikasyon. Eski *unit* in monte, menm si pri petrol in desann? E ki mannyer sa *equation* i ganny fer, pou ki dimoun i a kapab konpran? E vwar en soulazman e kan i kapab ekspekte en soulazman?

Minis dan son diskour in dir ki Gouvernman LDS i enn ki efikas. Mon pou dakor avek li. Me selman, Mr Speaker, mon pou demann Minis, mon konnen in dir dan son diskour ki pou annan bann revi. Bann resers ki pou ganny fer, pou fer Gouvernman vin pli efikas.

Mr Speaker, i pa akseptab letan ou annan en drayver ki pe dray dan en Departman Gouvernman.

I al sers manman oubyen paran, dimoun ki travay ek li pou anmenn Lopital, kan sa

bann dimoun i kapab fer sa zot menm. E sa i met en kou lo depans *fuel* dan Gouvernman. Alors i enportan ki nou gete ki mannyer nou kapab remede sa bann sityasyon pou annan plis kontrol. Ki a fer ki depans Gouvernman lo *fuel* i ava redwir, e ki i a fer ki sa benefis i kapab ganny repase dan bann sekter ki pli enportan.

Mr Speaker, Minis in dir ki nou'n met larzan dekote pou nou ranforsi bann - Mwan mon pe demande, eskize pa Minis ki'n dir - be mwan mon pe demande - ki nou met larzan osi dekote pou nou ranforsi bann lenstitisyon avek bi pou ranforsi nou demokrasi dan nou pei.

In annan bokou koze lo lafason ki dimoun i anmenn zot bann pwen devan. I byen, e mwan mon pou ankouraz dimoun ki si zot santi i annan keksoz ki pa pe mars parey zot ti a swete, i enportan ki nou koze. Nou koze avek respe. Nou vini nou dir kwa ki mal e sa bann keksoz i a ganny pran an kont.

Minis ou'n koz lo Minister Lasante ki pou annan en departman kot i pou pran bann konplent lo bann dimoun ki mannyer zot in santi, zot in ganny trete. Me sa i devret al pli lwen Mr Speaker. I devret en

landrwa kot tou bann Minister i annan enn sa bann sekter, kot dimoun i kapab vini e met zot konplent e vwar ki mannyer sa bann konplent i ganny adrese.

Nou konnen par kont, ki i annan ki fer bann konplent ki pa fonde. E alors i neserer pou nou kapab get byen e vwar ki pe arive e akoz serten keksoz i arive. Nou'n ganny dir ki pou dir i annan ki trenn lipye.

E Minis ou'n fer resorti tre fortman, ki sa ki pa kapab fer sa travay i pou ganny kit deryer e alors i pa pou kapab, donn - sed plas pou en lot. Sa i vreman enportan pou nou kapab asire ki nou pei i kontinyen devlope e nou bann zabitan i kontinyen satisfè avek servis ki Gouvernman pe ofer.

Mr Speaker, mon pou met en pwen devan Minis. Akoz ki dan sekter kot *carer* i ganny ofer, letan en dimoun i lopital e dokter i donn li en *score* 0 lo 100. I bezwen pas atraver prosedir ki inakseptab Mr Speaker. Akoz i esper tro bokou letan. Si in ganny 0, savedir dokter ki'n vwar poudir i pa kapab fer naryen, alors i bezwen en *carer*.

Mr Speaker dan sa konteks, mon pou demann Minis pou koz avek sa sekter. Sa Minister ki responsab sa. Mon konnen i annan en Lazans

ki pou dil avek sa prezan. Ki zot ava fer sa bann aktivite ler i koumsa, akseler sa *response* pou sa dimoun ganny en *carer*.

Mon annan 2 sityasyon Mr Speaker dan mon distrik. Kot dimoun ki'n annan bann kondisyon ki zot pou releve, me selman a ler aktyel zot ater, me zot ankor pe esper *carer* Mr Speaker, i annan plis ki 6 mwan. Sa pou mwan i inakseptab. Eski sa, Minis, i pa trenn lipye?

Mr Speaker fasilite dan nou distrik: Lakaz i reste en demann enportan parey in ganny dir dan diskour Bidze. Minis mon ti a kontan fer en koreksyon. Anse Aux Pins pa'n ganny 18 lakaz an 2022. Anse Aux Pins in ganny zis 6. Akoz mon bezwen fer sorti sa Mr Speaker, i enportan akoz dimoun i dir avek mwan ki mon pa'n ed zot pou zot ganny lakaz. Mon bezwen fer sa sorti kler, ki nou'n ganny 6, alors nou'n donn dimoun ki dan bezwen pou 6. Lalis lakaz i plis ki 120 Anse Aux Pins, alors zot trou pou arive.

Mr Speaker dan sa konteks mon ti a kontan konn en pti pe lo proze lakaz anler dan Karyol, kot laplenn. Kot mwan menm avek Minister lakaz nou ti al vizite. Pou nou vwar, nou'n get son plan, nou'n

modifye, nou'n fer sa ki annan pou fer.

E alors letan Minis i reponn oubyen letan Minis lakaz i vini, mon ti a kontan ki mon ganny en pti kontrandi lo proze lakaz anler Karyol. Akoz letan mon'n get *Budget Book*, mon pa vwar li lo *Budget Book*. Kekfwa i dan en lot laliny ki mon pa ankor vwar ziska konmela.

Mr Speaker, mou oule demann Minis, pou enform zabitan Anse Aux Pins, lo sa devlopman Karyol parey mon'n dir. Zot dir espere. Nou lalis i kontinyen agrandi olye raptisi, akoz nou annan bann sityasyon koumsa. Nou annan bann teren Mr Speaker, Minis in koz lo, in met larzan dekote pou travay lo *land bank*. Mon espere ki Anse Aux Pins osi i dan sa kad pou kapab soulaz bann dimoun ki pe rod en bout later.

Mr Speaker, Minis in dir nou larzan in ganny met dekote pou Semen Bodanmyen. Mon tre kontan, akoz sa i pou soulaz bann dimoun anler tel ki Betty Asba, ensidswit, pou zot kapab ariv kot zot dan konfor. Letan zot al fer zot *shopping* pou zot kapab ariv kot zot byen, pou zot kapab ariv kot zot byen e met zot *shopping* kot zot lakaz.

Sepandan, Mr Speaker, mon ti a kontan demann Minis,

i fer sak fwa mon ganny loportinite dan Bidze e dan Leta Lanasyon, mon demande pou semen Dan Gravye kot bann Payet, depi ler mon'n ganny elekte, mon pe demann sa semen.

Mr Speaker, mon ti a kontan anonse la, ki nou annan dimoun ki dan prive ki parey pou al dan en *PPP* avek Gouvernman, pou fer sir ki sa semen i ganny devlope, aköz zot osi zot annan later o bor la. Zot antisipe pou zot devlop zot later. E alors zot in pare pou zot antre ansanm avek Gouvernman, pou fer sir ki zot ava devlop sa semen.

Mon pou met sa bann diskisyon lo latap pou nou gete ki mannyer nou kapab minimiz sa depans lo Gouvernman, an prenon kont ki annan sekter prive ki kapab ede pou fer sa.

Me Mr Speaker, mon ti a kontan demann Minis pou akseler avek sa Lalwa *PPP*, ki a fer ki nou ava konnen ki bann paramet ki sekter prive i kapab mete. E ki bann paramet ki Gouvernman i kapab mete pou fer sir ki anler Dan Gravye kot bann Payet dan sa prosen letan, letan mwayen i permet zot ava ganny zot semen.

Mr Speaker, nou bezwen rekonnet Anse Aux Pins. Kot bann Pillay anba bor lanmer,

Gouvernman in fer drenaz ki prezan napa delo ki antre kot zot. Mon dir en gran mersi pou sa. Me par kont, i reste en defi dan semen Uranie, ki pa tro lwen. Nou annan menm problem e alors nou ti a kontan ki sa osi i ganny remedye. Aköz sa bann dimoun letan zot al travay, lapli pe tonbe zot bezwen mars dan labou. E zot lenz i sal. Zot pa konfortab letan zot ariv dan zot landrwa travay.

Mr Speaker, mon'n ganny demande par zabitan, pou fer en demann ki bann *fire tenders* ki *SFRSA*, i annan bann *fire tenders* ki en pe pli ptipti, aköz i annan semen ki ptipti ki sere. E sa bann groser *fire tenders* ki zot annan par ler pa arive letan i annan en sityasyon dife, aköz in deza arive sa anler kot nou Anse Aux Pins, kot zot pa'n kapab arive pou asiste sa bann dimoun. Zot in bezwen reste pli lwen. Alors kekfwa lasistans i kapab ganny donnen dan sa konteks pou ed sa bann dimoun.

Mr Speaker, ankor Anse Aux Pins, mon ti a kontan dir avek dimoun Anse Aux Pins, ki nou pou annan nou *playground* ki devan kot Ladministrasyon Distrik. Nou pe zis idantifye ki kalite bann zouzou ki pli apropiye pou nou met la, pou

fer sir ki bann zanfan i ava annan en pti lespas pou zot kapab vin detann zot osi avek zot paran.

Akoz sa vye *playground*, ki par kont mon'n ganny kritike lo al plizyer fwa, i en later prive, e sa, sa dimoun ki okip son later. Alors arete kritik Gouvernman lo sa *ex Playground* aköz pa pou Gouvernman, i pou later prive.

Mr Speaker, *ease of doing business*, i reste touzour en defi dan nou pei. I bezwen annan bann mekanizm, bann mwayen, ki ganny fer, ki ganny met an plas, pou fasilite biznes dan nou pei.

Mr Speaker, Sesel nou an aryer dan sa domenn. *Dubai* kot en biznes i kapab ganny ouver *online* e dan 24erdtan, nou bezwen osi *keep up the pace* avek devlopman enternasyonal. Nou pa kapab Mr Speaker, zis letan i annan bann defi enternasyonal kot ou asosye nou avek. Me nou bezwen asosye nou avek bann progre ki ganny fer, pou fer sir ki nou osi nou alaoter.

E nou kapab ganny konpare parey Minis in dir, avek en kominote enternasyonal. I vre ki dan Sekter Finans nou pe ganny *commended* pou sa zefor ki nou pe fer, e sa bann rezilyans ki

nou pe mete, anver sa bann defi global.

Mr Speaker, bann fasilite *sport* i reste enn ki nou kontinyelman ganny problemm avek dan nou distrik Anse Aux Pins. Nou annan en *court*. Lalimyer i ganny mete. Lalimyer i ganny kase. Lalimyer pa ganny aranze. Lekel ki responsab pou aranze? Toultan i annan enn ki anvoy lanmen, i dir ou sa lot, i dir ou sa lot.

Alors Mr Speaker, mon konpran mezir ki Gouvernman pe pran, pou fer sir ki tousala i ava tonm anba en parasol e ki a kapab ganny *attended to* letan i annan problemm. I vre ki zot pa pou war sa bann problemm. Se nou ki pou war sa bann problemm.

Alors nou, nou bezwen vin dir zot, e zot bezwen rektifye. *Unless* zot desantraliz vot pou fer sa bann travay zot met dan distrik, aprezan *DA* i ava pran responsabilite pou fer sa bann travay.

Mr Speaker, i annan peyman pou konpansasyon ki Minis in koz lo la. Mon'n ganny aproz par zabitan ki ti travay kot Minister Kiltir Minis. Byen avan kondisyon kot Ledikasyon ek Lasante. Zot in dir avek mwan, ki zot, zot osi zot in sibir kondisyon *fungus*. Me zot pa ankor ganny peye.



E la Minis dan ou diskour ou'n dir ki peyman pou ganny fer pou Ledikasyon avek Lasante. Sa msye in dir mwan, kantmenm zot a dir li espere, me selman i a konnen ki i lo lalis pou li ganny peye. Akoz i pa ankor gannyen sa konpansasyon ki i *deserve*. Menm bann formalite in fini ganny fer, in ganny anvoye kot *Attorney Zeneral*.

Bidze pou bann benefis sosyal Mr Speaker, i reste enn ki vreman enportan. I bezwen annan *safety net*, akoz i annan nou dimoun ki nou pou bezwen atrape pou fer sir ki zot akoz bann defi ki annan dan zot lavi. Bann defi lasante, bann lezot kalite defi zot pa pe kapab travay, e alors i enportan ki Gouvernman i soulaz zot pandan sa bann sityasyon difisil.

Mr Speaker, pou konklir, mon ti a kontan remersye ou pou gidans ki ou'n donn nou. Mon ti a kontan remersi Minis Finans pou sa bon Bidze, menm si i annan ki'n dir ki pou dir sa i pa en bon Bidze. Mon krwar nou bezwen komans en landrwa, pou nou kapab ariv kot nou anvi. Alors ou'n konmanse, garanti lo nou sipor ki nou pou donn ou pou fer sir ki nou ariv kot nou oule arive.

Mr Speaker, mon ti a kontan remersi tou zabitan Anse Aux Pins san eksepsyon, pou sipor ki zot in donn mwan dan eleksyon 2020. Mon ti a kontan osi remersi mon *clerk* pou sipor ki i kontinyen donn mwan. I ti'n menm dir mon ki i pou arete travay, me in sanz son nide, i dir mwan i pou kontinyen prezan.

Alors mon oule remersye li akoz mon ti pou al ganny en travay pou mwan al re rod en lot dimoun, pou kontinyen travay. Pou kontinyen kot li in kite pou travay.

Avek sa Mr Speaker, mon ti a kontan dir avek Minis, ki mwan Clifford Andre, mon pou lev mon lanmen pou mon aprouv sa Bidze pou fer sir ki Sesel ek Seselwa i kontinyen fleri akoz Sesel i pou tou son zanfan! Mersi.

### **MR SPEAKER**

Mersi Onorab. Bon nou a pas prosen entervenans. Laparol i pour Onorab Loze.

### **HON JOHAN LOZE**

Mersi Mr Speaker. Mr speaker mon ti a kontan komans par remersi tou bann siporter *US*, koman *LDS* ki ti vin dan nou *rally* Anse Boileau Dimans le 6. Mon'n la a kote zot anba dan labou, dan lapli. Nou'n *enjoy*

ansanm, nou'n koze, nou'n fer bokou lesanz parol. E mon ava zwenn zot le 26 dan lamars ki nou pe fer dan lavil Victoria.

Mr Speaker annou komans avek laverite. Sa laverite ki ti nou realite. An 2020 reveni pei ti'n redwir aköz en rediksyon 70poursan dan larive bann viziter. Me Gouvernman US ti'n fini prevwar sa. Gouvernman tin deza ogmant fasilite ki i pran avek Labank Santral, an ka i annan problem likidite pou sorti R100milyon pou ariv R500milyon.

Dezyenmman, bann *treasury bills* ki Gouvernman i abitye pran tou le semenn, ti osi ogmante pou kapab kouver sa rediksyon dan reveni. Par kont, an Desanm 2020, bann Labank Komersyal ti redwi bann sonm ki zot investi avek Gouvernman dan *treasury bills*, an vi zot planifikasyon lafen lannen.

E an rezilta sa kont Gouvernman dan Labank Santral ti desann. La, ou 14milyon la Minis. La i la ou 14milyon. La laverite mon'n dir ozordi!

Me ler Labank Komersyal pa ti pe aste *treasury bills*, Gouvernman US tin deza fini siny langazman avek Labank Santral pou ganny likidite. E se sa fasilite ki Gouvernman LDS

ti servi an Desanm 2020, pou kontinyen finans depans Gouvernman. Sa i toutafe normal dan en tel sirkonstans enpresedan, parey ti'n arive an 2020. Se sa ki en Gouvernman responsab US ti fer.

**(APPLAUSE)**

### **HON JOHAN LOZE**

Sa zistwar kales kase, *Covid*, move zesyon i demontre ki mannyer Gouvernman LDS in manipil bann stratezi ki Gouvernman US ti'n met an plas pou fer krwar ki pei ti'n faid. Aköz dapre zot US ti pe mal zer pei. Kan sete sa bann menm Polisi e stratezi ki Gouvernman US ti'n etabli ki zot LDS, zot in servi pou kontinyen roul lekonomi pei dan son bann letan pli difisil.

Alors, laverite se ki ler Gouvernman LDS in pran pei, zot in zis kontinyen avek sa fondasyon ki Gouvernman US ti'n met an plas e zot pe fer krwar pep Seselwa ki se zot Le Sover. Laverite sanmenm sa.

A sa pwen, mon oule lans en lapel a tou Seselwa e tou lorganizasyon medya, pou zot al fer lenvestigasyon dan sa bann alegasyon ki mon fek fer. *Interview* Gouverner Labank Santral. *Interview* bann zofisyè Finans ki ti la. Enkli ansyen PS

Finans, ansyen Minis Finans, e ansyen Prezidan Danny Faure.

Etabli klerman lekel ki pe koz laverite. Ant Loze, Hassan avek Ramkalawan. Swa zot ki pe koz laverite e pei ti en kales kase. Ouswa mwan ki pe koz laverite e reset pei ti'n redwir par 70poursan, akoz en bes dan larive touris. E kont Gouvernman tin redwir akoz en bes dan demann pou *treasury bills* par Labank Komersyal, e non-pa akoz move zesyon. Mon lans en defi, en *challenge* pou zot tou, ale, al verifye!

Pandan 2an, sa zistwar "kales kase" in arsitek tou Polisi Gouvernman LDS. Pandan 2an a sak fwa ki zot in enplimant zot stratezi mal fonde, mal enplimante, e mal kalkile. Zot in blanm tou lo US. Lo move zesyon e lo kales kase. E mwan mon ensiste ki ti napa kales kase e pa'n zanmen annan!

Annou komans par analiz en pe sa bann fame Polisi aprezan, ki'n de-koul dan sa zafer kales kase. An premye, se louvertir *l'aéroport*, ki nou ti ganny dir ti vin an rezilta kales kase e 14milyon. E ki Gouvernman ti oblize ouver *l'aéroport* boner, akoz sansan pa ti konnen kote pou ganny larzan pou pey saler travayer.

Saler parey ki mon'n deza dir zot, ti pey avek fasilite

likidite ki Gouvernman US ti'n deza fini negosye, e sinyen, avek Labank Santral.

Pou ouver *l'aéroport*, zot ti fer nou per e fors nou pou pran vaksen. Mon napa okenn problemm avek vaksen, me annou gete ki vaksen eski zot ti fer nou pran? Zot ti komans avek 50mil doz *sinopharm*. En vaksen ki zour ti antre Sesel, pa ti ankor resevwar laprouvasyon son prop Gouvernman.

E sa 50mil doz ki ti antre Sesel, ti en *batch* ki ti'n ganny anvoye UAE pour teste, pa tin ankor antre dan prodiksyon komersyal. Esansyelman Gouvernman LDS in servi nou, Seselwa koman *guinea pigs* pour zot eksperimant lo la.

Me pa fini la. Pli tar le 2 Avril 2021, Minis Radegonde ti enform nou, ki pou annan en lo 9mil vaksen pe vini *weekend* sorti Lafrik di Sid. Akoz Lafrik di Sid ti'n resevwar son lo *covishield*, me tin donn sa avek WHO, pour rezon ki sa pa ti efektif kont varyan Sidafriken.

Le 7 Avril 2021, dan en konferans lapres, dirizan parti *United Seychelles*, Dokter Patrick Herminie ti sey lans en *warning*, e demande akfer ki nou pe aksepte sa lo *covishield* ki pa efektif kont varyan Sidafriken, kan nou pa ni

konnen ki varyan ki annan dan nou prop pei.

Le 15 Avril 2021, dan en konferans lapres Lasante, Komiser Lasante Piblik, Dokter Jude Gedeon ti fer en deklarasyon, ki dan bann *samples* ki zot ti'n anvoy laboratwar depi an Fevriye 2021, 4 ladan ti'n teste pozitiv pour varyan Sidafriken. E nou, nou'n kontinyen donn sa *covishield*, pa efektiv.

La I enportan pou rapel ki Sesel ti ouver pei avek lemond le 25 Mars 2021, avek en *claim*, ki nou ti'n ariv en to vaksinyasyon 60poursan. Pa menm 2 mwan pli tar, an *May*, Sesel ti'n komans eksperyans en 3enm vag *Covid*, kot nou ti pe vwar en to lenfeksyon an mwayenn 134 ka par zour. E en tyer bann ka ki tin teste pozitiv, ti'n deza fini pran zot dezyenm doz vaksen. E se la kot konsern ti komans leve enternasyonalman lo nivo lefikasite sa vaksen *sinopharm*, ki zot ti'n donn nou.

Mon kestyon, eski ti nesese pour en tel keksoz arive? Eski nou pei pa tin kapab espere pour nou ganny en vaksen ki tin fini aprouve, vaksinen, apre ouver pei? Zot ava rapel, poudir leskiz ki ti'n donner pou fors louvertir pei ti "kales kase", "kof vid", "pei pe

faid", "move zesyon lekonomi par Gouvernman *US*."

Me mon'n deza etabli depi lo komansman, ki tousala sete zis en mansonz. Kales kase ti en mansonz; kof vid en lot mansonz, pei pe faid en mansonz, move zesyon lekonomi en pli gro mansonz ankor. Alors, akfer ki zot ti fors nou pou pran pikir ki pa ti'n ankor ganny aprouve, si sityasyon pei, pa ti en kales kase parey ki zot ti pe fer nou krwar?

Tou desizyon Polisi ki zot in pran pandan sa 2an, in ankre dan sa mansonz kof vid, sepa kales kase, tou sa soufrans avek martir ki zot pe fer dimoun kot *welfare*; logmantasyon dan pri bis, sispansyon 13enm mwan saler, sispansyon *long service allowance*, logmantasyon dan pri gas avek elektrisite.

Tousala in fonde pirman dan en mansonz, e sa mansonz se ki pei ti pe faid, akoz move zesyon Gouvernman *US*. Tou sa bann desizyon barbar ki zot in pran ki'n fer dimoun soufer, in fonde pirman dan mansonz.

Aprezan, permet mwan pour re-tous lo en bout ki *LOTO* ti'n deza touse briyevman dan son *speech*. An *May* 2020, byen avan ki Gouvernman *LDS* ti'n raport laviktwar an Oktob,

*Board IMF* ti anonse ki zot tin aprouv demann Sesel pour en *emergency assistance*, anba zot *Rapid Financing Instrument*, pour lavalan USD 31.2milyon Dolar Ameriken, ou swa 100poursan *entitlement* Sesel.

I paret ki Sesel ti'n deza an negosyasyon pour lasistans avek *IMF*, menm avan ki Gouvernman *LDS* ti pran labar. E kontrerman a sa ki pe ganny dir, Gouvernman *US* ti'n ganny tre byen resevwar par *IMF*, pour son bon zesyon ekonomik pei. Ankor, akoz sa zistwar kales kase, sepa kof vid ti pirman en mansonz. En lenvansyon sorti dan en lespri visye, malisye, e destriktif.

Annou aprezan fer en pti konversasyon lo logmantasyon saler. An lannen 2008, zis 1an apre eleksyon, Gouvernman *US* ti donn en logmantasyon saler and ti donn 2 logmantasyon saler - enn ti donn an Zanbye lo komansman lannen, e lot ti donn an Novanm. Sa ti pou ede anpar en pe dimoun avek sa dega ki reform ekonomik ti pe fer dan zot lavi. Nou pa ti esper 2an pou anpar dimoun. Nou ti fer li deswit.

Sa ti swiv par en lot logmantasyon an 2009, e en lot an 2014 kot sa fwa si ti donn ant 10 a 20poursan logmantasyon. E ankor pli tar

an 2019, ti annan sa logmantasyon 5poursan ki ti ganny bloke par *LDS*, ki Gouvernman *US* ti bezwen donn koman en *allowance* administrativ, e non-pa en logmantasyon saler. Sa 5poursan ki ozordi *LDS* pou bezwen konsolid avek saler.

La ankor, mon bezwen dir ki zot en bann manter, vi ki sa lannen zot pe donn en logmantasyon baze lo poursantaz, sa i vedir ki tou sa largiman ki zot ti servi pour blok sa logmantasyon 5poursan, dan Sizyenm Lasanble, ti bann mansonz. Eski nou komans vwar en *pattern* kot pe devlope la?

Boner sa lannen, pou premye fwa dan son listwar, Sesel in donn en logmantasyon saler son bann travayer par *means testing*. Kot zis serten ki'n gannyen, e lezot pa'n gannyen, e bann travayer sektor prive in bezwen al met laliny kot biro *DA*, demann pardon souple, zis pour zot ganny sa pti R500. Bokou pa'n kalifye, serten in zis abandonnen, e plis ankor in senpleman refize pour gaspiy zot letan, e abes zot dinyite, menm si zot tin reelman bezwen.

Ki mannyer eski zot kapab dir ki zot in vreman ede? Zot in

zis ede pour senm konfizyon. Sa ki zot in fer, sete pou senpleman *top-up* saler travayer ki pa pe kapab fer de bout zwen. En legzersis ki ti'n kapab ganny fer fasilman par *ASP*, dan plas fer krwar ki zot ti pe donn en swadizan logmantasyon ki lamazorite pa'n benefisye avek.

La ankor enn fwa dan sa Bidze, zot vire e ensilte travayer Seselwa, ankor! Zot kree en divizyon, par donn logmantasyon zis en serten group zanfann Sesel. Zis bann ki travay dan sekter piblik, e zot kit ater tou lezot ki dan Sekter Prive. E zot apel sa en logmantasyon saler?

De plis, zot dir ki zot pe ankouraz sekter prive pou donn logmantasyon. Me avan ki zot in fer sa, eski zot in asize pou koze avek sekter prive? Eski in annan okenn *form* konsiltasyon? Eski zot in diskite kot sekter prive in kapab prezant son bann konsern avek Gouvernman, pou zot kapab tonm lo en konpromi atraver negosyasyon?

Koumsa menm si ti pe zis ankouraze, ti a'n vin en lankourazman enformen, olye ki Minis pe zis asiz la anndan pou li soufle dan divan. Deplis, pou fer pli enteresan, Minis I dir i pa vin prezant Bidze sekter prive, me i vin prezant Bidze

Gouvernman. Minis, mon pa konnen si ou pa'n ganny memo, me ou Minis Finans dan Gouvernman pour Larepublik Sesel! Nou napa en lot Minis Finans pour sekter prive. Bidze ki ou prezante, I Bidze Leta Sesel.

Mon konpran par kont ki ou pe sey dir, ki ou pe prezant reset avek depans pour sekter piblik. Be ou Bidze pe osi entrodwir nouvo *tax* ki pe bour lanmen dan pos sekter prive. Alors, ki sa zistwar Bidze zis pou Gouvernman?

Minis, ou vin devan Lasanble pou ou vin prezant Bidze pei, e non- pa Bidze servis piblik. Ou avek ou Gouvernman zot annan responsabilite anver tou Seselwa, non-pa zis en serten. E i responsabilite Gouvernman pou *legislate minimum wage*, non-pa responsabilite sekter prive. Mon pou ankouraz ou Minis, *go back to the drawing board*, e refer ou kalkil. Ou annan en *duty of care* anver lanasyon Seselwa an antye.

Koman mon'n mansyon *tax*, *Leader* Lopozisyon dan son ladres in dekri sa nouvo *tax* lo lasanm koman regresiv. Mwan mon pou kareman dir zot, ki sa set en *tax* lepok Prezidan Rene ki zot in al detere, zot in pas en kout lapentir lo la, e zot in donn

en lot non. Dir mwan sa ki zot oule, sa zistwar *tax* lo lasanm, se sa menm *bed tax* ansyent lepok ki'n retournen.

Zot in fer sanzman, zis pour zot fer mars aryer, be kwa ki zot in sanze? La zot pou degres sekter prive zis pour zot angres zot lekor, avek zot bann gro *allowance* palto, loto, ledan, linet, sato e sepa kwa ankor.

Total *tax* ki Gouvernman i prezimen pou kolekte lo Sekter Tourizm i R280milyon ek sa de nouvo *tax*. Lentansyon, se pou finans bann proze popilis, dan en fason pli iresponsab posib. Olye grandi lekonomi dan en fason soutenab, e depans dan en fason gradyel, anmezir ki lekonomi I refer, agrandi e rekipere;- olye asire, ki nou pa pe depans anplis, e pe zer lekonomi dan en fason pli responsab ki posib, e pa pe depans plis ki nou kolekte, Gouvernman pe bezwen trangle Sekter Tourizm atraver nouvo *tax!*

Sa bann biznes I trouv zot pe anmas en fardo initil, zis akoz ki Gouvernman i anvi depans plis ki R700milyon koman finansman Gouvernman lo bann proze kapital. Dan sa moman frazil, priyorite Gouvernman I devret saler, swivi par byen e servis, olye enpoz nouvo *tax* lo sekter prive.

Gouvernman I devret pe ankouraz zot, pour zot servi zot larzan pou donn en logmantasyon saler zot bann travayer.

R700milyon pou Gouvernman fer tou sa ta proze kapital, plis en prozeksyon 1.1poursan sirplis bidzeter, e Gouvernman pe finans sa an parti par enpoz sa de manman *tax* lo nou bann lotel. Dan labsans sa 2 *tax*, sa Bidze ki devan nou pou dan en defisit fiskal total. Oli zot Gouvernman responsab?

Dan lepase, Onorab Ramkalawan in toultan ensiste ki Gouvernman i devret konsilte avek lendistri tourizm, avan ki i vin enpoz okenn nouvo *tax* lo zot. Rezon ki in donner, se ki *by the time* ki Bidze i vini, lotel li in fini finaliz son bann pri lasanm, e in fini kominik sa lenformasyon avek bann diferan *DMCs* enternasyonalman, ki pou vann sa bann lasanm, e i tro tar pou sanze. Alors lotel pou zis bezwen anmenn en fardo. Sa in toultan zot largiman.

Ozordi ki'n arive avek konsiltasyon? Eski koman ki zot in ganny pouvwar, zot nepli krwar dan konsiltasyon? Eski *State House* in fer zot obliy zot bann prensip nob, ki'n ede pour anmenn zot *State House?*

Ouswa tousala ti zis bann mansonz, zis parey “kof vid”, avek “kales kase”?

Mon vwar en sonm 50milyon ki’n ganny mete dan Bidze pou *subsidize* bann pti e mwayen antrepriz. Be Minis, sa sete en keksoz ki ti deza la avan anba Gouvernman US. Parey ou’n dir Minis, sa i fer 3enm Bidze ki ou prezant devan lasanble. E en 3enm Bidze, *nothing new*. Bidze li menm in parey bann proze lakaz, in zis en legzersis koup riban dan sa ki US in fer oparavan.

Pa aköz ou kopi mon leson e met ou non lo la, ki sa i vin ou leson. Pa aköz ou kopi *speech* Mr Albanese e met li an kreol, ki sa i vin ou *speech*. Egalman, pa aköz ou repran provizyon dan en Bidze US, e ou senpleman kontiny bann menm zafer ki US ti pe fer oparavan, ki sa i vin en Bidze “Sanzman’ - non! I vin zis enn Bidze kontinyasyon.

Zot in ganny elekte koman en “Gouvernman Sanzman”, me zot pe *fail* pou fer okenn sanzman ki bon. 3 Bidze anba ou *belt* Minis, e ou pa ankor *figure out* ki mannyer ou pou vin avek keksoz nouvo, san ki ou bezwen kopi dan kaye US. 3 Bidze anba ou *belt* Minis, e ou pa ankor *figure out* ki mannyer ki ou pou fer sanzman. Ou “Bidze kontinyasyon” i fer zis

repetisyon. Finalman, ou’n vin zis en nespes lonbraz US!

La mon konpran, aköz ki Onorab Georges dan son imans sazes, in deklar ou Bidze koman en lisyen ki in *shampoo*, e ki in poudre, Minis.

Dan son lentervansyon, *Leader* Lopoziyon in koz lo en kriz *leadership* dan Gouvernman LDS. Permet mwan pour ilistre sa dan zis detrwa legzanp. Dan enn son bann premye konferans lapres, Minis Hassan ti deklare konmkwa ki I annan plis ki 85 loto ki ti’n manke *State House*. Imedyatman apre, PS ti vin lo televizyon e dir ki napa okenn loto ki manke *State House*, e nou pa’n zanmen tann ankor nanryen lo sa zafer loto manke. Pa konnen si Minis Hassan i ankor pe rode.

Letan ki zistwar *allowance* palto ti leve, Minis Hassan ti dir avek *TeleSesel* ki napa okenn nouvo *allowance* ki’n ganny mete lo Minis, e ki tou sa bann *allowance* ti deza la, e nanryen pa’n sanze. Pourtan, Minis Derjacques ti’n ilistre byen an detay, tou bann nouvo *allowances* ki ti’n ganny mete, e tou bann ki tin ganny ogmante.

E pli resaman, nou’n vwar Minis Hassan pe dir ki pri lavi pa zanmen desan, me son parti LDS in anmenn en kanpany



bes pri lavi, ki'n reisi pou anmenn zot *State House*. E Minis, an ka si ou pa konnen, mon avar refer ou lo paz 16 dan *manifesto LDS*, kot paragraf 5 I koz zisteman lo bes pri lavi.

Be sa pa fini la, kriz *leadership* i grenpe ziska pli o. Resaman nou'n tande devan Lasanble, kot Minis Later in dir ki sa endividi in depans R300mil pou fer son semen. Me pli tar Prezidan in dir ki endividi in depans plis ki 1milyon konpasyon. *Sorry* Mr Speaker, Roupi, pou fer semen!

I osi annan sa fame pti *trip* lo zil, kot dan reportaz nouvel, Prezidan ti dir sa *trip* i kout en pti 3milyon ki i fer. E *SBC* ti anonse ki sa vizit in finanse par lofis Prezidan. Me pli tar dan konferans lapres, Prezidan ti dir Zanmen mon'n dir ki sa *trip* i kout R3milyon. I ti osi dir ki *State House* pa'n ganny okenn *invoice*, akoz *IDC* ki ti pou peye pou sa deplasman.

Klerman nou annan en problemn! Nou pei pe eksperyans en *massive* kriz dan *leadership*. Kot nou bann dirizan i senpleman enkapab koz laverite, menm lo bann size inital, ou senpleman ensinifyan. Zot enkapab koz laverite, e sa i en *massive* problemn pour Lepep Seselwa.

Koman mon lo sa size lenkonpetans Gouvernman, mon'n al lo *JOBOLA* bomaten en mon'n vwar ki pos *CEO NSC* pe ganny *advertised*. *Closing date* i le 3 Novanm 2022. *NSC* i en *body corporate* kree anba Lalwa. Manda Konsey *National Arts Council* in terminen depi le 1 Mars 2021.

Son dernyen *Chairperson* ti Mr Eddie Micoock. E depi Mars 2021 in napa en lot Konsey ki'n ganny apwente. Ki mannyer eski *NSC* i kapab fonksyon legalman pou preski 2an, san son striktir governans. Ki mannyer *NSC* i kapab pe vin rod larzan atraver Bidze?

Letan an Oktob 2021, Dokter Patrick Herminie dan en konferans lapres, in sonn *alarm* ki Gouvernman pe al fer nou bann dimoun aze dan *Old People's Home*, pey zot landrwa reste. E Minister Lafanmir in fer sorti en kominike ki konmkwa sa sete en mansonz, e ki zot napa lentansyon fer personn peye. Me an Oktob 2022, sa menm Minister Lafanmir in fer sa bann dimoun aze pey R1000.

Ou ki an se moman pe ekoute, les mwan poz ou en kestyon. Dan ki fason eski ou vwar sa Bidze pou adres sa kriz *leadership* ki nou pei pe eksperyanse an se moman?

En lot size ki mon oule adrese, se sa zafer 13enm mwan saler. Nou politisyen, nou tous nou saler. Plis R17mil *constituency allowance*, e osi *allowance* Komite tou le mwan. Osi pa obliy R10mil *clothing allowance*, e R8mil *entertainment allowance* par an.

Le 2 *Leaders* mon krwar ki zot *clothing allowance* I tonm R18mil par an, si mon pa tronpe. Zot *entertainment* sa mon pa asire. Me Selman mon rapel dan Sizyenm Lasanble ti annan en *Leader* ki ti sey *claim* en *entertainment allowance* lavalè plis ki R50mil. Me les tousala, sa i bann vye *allowance* depi lontan, e dernyen fwa ki zot ti ganny ogmante ti dan Senkyenm Lasanble.

Mon pwen, se ki menm avek tousala, nou politisyen nou pe al tous nou gratwite lafen lannen an plen. La an Desanm, ler mon'n kalkil pou mwan, i tonm anviron R93mil Sesel, e mon pe al tous sa sonm an plen!

Alors mon kestyon pour ou, set aköz ki ou, ou bezwen pas tes, aprann dray dan *cone*, pou ganny lot lanmwatye ou 13enm mwan? Kan politisyen pe ganny tou sa ki pou li?

Lekel isi anndan, ki kalifye pou dir avek en *nurse*, ouswa en nenport ki travayer lasante ki'n donn tou zot kouraz diran *Covid*, ki zot bezwen al pas tes pou ganny lot lanmwatye zot 13enm? Lekel ki *fit* pou dir avek en polisye, ki i bezwen zistifye pour li ganny lot lanmwatye zot 13enm?

*Teachers*, ki'n bezwen fer louvraz *teachers*, *nurse*, ek teknisyen *IT* zot menm avek nou zanfan, lekel la anndan ki kalifye pou anvoy zot zistifye zot lekor pou ganny lot lanmwatye zot 13enm?

Annou ase, annou tret tou dimoun parey. Nou politisyen pe ganny tou sa ki pou nou. Lezot *constitutional appointees* pe ganny tou sa ki pou zot. Annou azir avek *fairness* e pey tou Seselwa zot 13enm mwan saler an plen. Zis parey nou petet pe tous pou nou an plen!

Keksoz ki drol dan sa Bidze, apre ki *LDS* avek son milyonner napa leker kot *welfare* in dray lapo lagel tou bann travayer Seselwa, ki ti bezwen lasistans, e zot in avoue pli boner sa lannen ki ti reste zis 110 dimoun lo lalis lasistans *welfare*, dan sa Bidze nou vwar en logmantasyon dan *social safety net*, sorti R40.7milyon, pou vin 61.8milyon.

Oule dir mwan en logmantasyon sote 20milyon pou zis 110 dimoun? Konmsi, zot serye la zot? Logmantasyon 20milyon pou en ASP ki pe zis kre Komite, parti Komite, zis pou zot fer martir dimoun. Ziska la menm bann spesyalis Minister Lasante in komans ganny ase avek zot, e pe komans anvoy zot vire, akoz madanm avek son bann Komite i pli konnen ki dokter.

E dan tou sa bann ta ale, vini dimoun i zis soufer. I annan en soufrans terib la deor ozordi pour nou pep. Sirtou bann ki bezwen lasistans maladi. Spesyalis dan Lopital ki konn zot pasyan pe disparet enn par enn e personn pa kapab dir pasyan oli, kot in ale. ASP li i donn sa ki pou li. Zis fer dimoun ale vini, monte desann, vire, tourn an ron.

Petet koman en Nasyon, nou devret rezerv en pe konpasyon pou sa ki bezwen, e non-pa zis sa ki dan bon. La ki madanm in ganny 20milyon an plis lo son Bidze, mon swete ki lalis dimoun ki pe ganny asiste, ava kapab sorti 110 pou vin 111.

An terminan, mon oule koz avek lazenes Seselwa. Ou ankor zenn, e ou annan letan. Ou pa bezwen Bidze, Minis, politisyen, ou ni menm

lekonomi pei pou definir ou nivo sikse ekonomik e finansyel dan lavi. Komans sers ou lendepandans finansyel lo ou menm e dedye ou lavi pour atennir ou lendepandans finansyel.

Koumsa, nou ava annan en fitir zenerasyon ki li i endepandan avek ki Bidze I dir, ki politisyen i fer, si Bidze i bon, ouswa si Bidze pa bon. Mon konsey pour ou, se pou komans ozordi menm, pa espere, pa gat letan, komans par sers konesans, sa ki ou bezwen pour komanse se ledikasyon finansyel. Erezman, ozordi i annan, e i pou nanryen, servi *Google*, servi *YouTube* byen, edik ou lekor lo ki mannyer ki ou pou fer pou ou vin finansyelman endepandan.

Zour ki en gran parti nou zenn i komans sers zot lendepandans finansyel, i sa zour ki nou pou vwar en diferans pozitiv dan nou pei.

Pour lafanmir Seselwa ki pe get ver sa Bidze pou sey trouv en soulazman. Mon swete ki ou kapab trouve, sa ki ou pe serse. Mon swete ki in kapab annan omwen, en pti keksoz pour ou avek ou fanmir ladan. O fon mon lekor, mon swete ki ou kapab trouv sa soulazman ki ou pe serse.

Me si par kont, parey mwan, ou panse ki sa Bidze in kit Seselwa ater pe soufer lo milye koltar, pandan ki nou Gouvernman pe tay deryer bann ki dan bon, avek konpasyon pou soufle zero, alors desann le 26 Novanm, ou ava mars a kote mwan, pou les sa Gouvernman konpran ki ou'n ganny ase!

Sa Bidze, i enn ki'n batir lo soufrans 2an sa pep. 2an ki zot in diriz pei avek mansonz, e anba fo preteks. Sak sou ki dan sa Bidze, in sorti dan soufrans enn ou frer ou ser Seselwa. Kestyon alors, si Bidze en pei i pa la pou li servi son pep, be i pe servi lekel alors? Set a ou pou fer ou prop refleksyon. Mersi Mr Speaker.

**(APPLAUSE)**

**MR SPEAKER**

Mersi Onorab. Bon nou a pran *lunch break*. E nou a rebran deba apremidi 2er. Mersi.

**(BREAK)**

**MR SPEAKER**

Bonn apremidi tou dimoun. Nou a rebran deba avek Onorab Bistoquet.

**HON ROSIE BISTOQUET**

Mersi Mr Speaker. Bonn apremidi Mr Speaker. Bonn apremidi tou Manm Onorab e tou bann ki pe ekoute dan lakour.

Mr Speaker avek ou permisyon, mon annan 2 pti lanons pou mwan dir. Enn i pou mwan partaz avek bann Onorab ki ozordi le 14 Novanm. I lazournen Enternasyonal pou Dyabet. I ti ganny deklare par *WHO* anba tenm "Akse avek ledikasyon Dyabet" kot 1milyon dimoun dan 160 pei i ganny *reached*. E mon oule osi remerisi *Secretariat* Lasanble pou aport sa aktivite kot nou ozordi. Kot nou'n kapab ganny *screened* pou diferan kalite tes ki'n ganny fer. Mersi bokou.

E mon lot pti entervansyon, atraver ou Mr Speaker, se mon pran par dan maler lafanmir Didon Pointe Larue, kot zot lakaz ti brile konpletman 2 semenn pase, e menm en zepeng zot pa'n kapab sove. Avek lagras Bondye zot a kapab re batir, malgre zot pa'n ganny sipor – "*Oh my God it's very bad!*" Mon a osi dir mersi mon *clerk* Daniella Arissol, *DA* e *staff Local Government* pou siport sa fanmir. Mersi Mr Speaker.

Mr Speaker mon pou pas en pti mesaz ankor, Lanperer *Nero* pa ti zwe lakordeon parey

Onorab ti dir, ler lavil ti brile. Sete vyolon ki Lanperer *Nero* ti zwe. Onorab akord ou byen avek ou lakordeon, e *return back to school!*

Set avek gran lafyerte ki mon akeyir sa Bidze Mr Speaker 2023, ki Minis in prezante Vandredi le 4 Novanm 2023, menm si Lopozisyon in trouve ki sa Bidze in ganny politize. En kote mon pou dakor avek zot, akoz *SPUP, SPPF, US* in toultan politiz tou keksoz dan zot lavi. Sa i en mantalite ki zot in anzandre dan zot disan - i pa pou zanmen sanze! Zot ankor pe gele ziska ozordi, akoz zot ankor anvi ranpli zot gro pos san fon!

Be les mwan dir zot avek sa Bidze ki nou Minis Finans in prezante, pou napa okenn pos ki pou ranpli. Ni bal dan *FA4JR*, ni bal dan simityer - tousala in fini. Ni bal dan 50milyon, in fini prezan. Sel bal ki nou pou kontinyen danse tou le lannen, se Bal Bobes.

Menm bal dan lalin kler ti dan lepase. Kontinyen reve, e depi Oktob 2020 kosmar in pran kontrol. Zot pa war ki sa Bidze pe anmennen pou pep Seselwa. Zot war zis nanm gran lizour. Aret reve akoz se nou *LDS* ki pe *run border* avek en lekip solid anba direksyon nou

Kapitenn elekte Wavel Ramkalawan, nou Prezidan.

Nou Minis Finans i en teknokrat. En ekonomis byen plase, kot in fer en bon analiz pou sa Bidze 2023. Sa set akoz in swiv nou Manifesto *LDS* kot Sesel i pou tou son zanfan, alor tou zanfan Seselwa i annan par ladan.

Dir mwan kote ki fermal ek zot ler nou Prezidan pe partaz sa larises ek tou son zanfan. Non-pa avek bann paran, zanmi, galan e konesans osi! E osi pou bann dimoun ki voras e bann ki lafen pouvwar. Pa zis sa Mr Speaker, zot laraz perdi pouvwar in fer zot fer latak personnel lo enn nou Manm lo sa kote latab - Onorab Naddy Zialor.

Akoz Mr Zialor in koz laverite. Akoz Onorab Zialor in annan en diferan lopinyon politik, sa i fer zot mous dife dan zot nennen parey dragon. Set akoz Onorab Zialor dan son diskour Bidze, in dir son laverite. In dir zot laverite, akoz in sorti dan sa kazo poul ek kok ranpli avek lapipi. Zot in menase aras li son bekir, bat li e kraz son ledan avek son bekir.

Be Mr Speaker sa i montre nou ki kalite vanzans parti *United Seychelles* i annan, anver bann dimoun ki pa siport zot. Sirtou bann dimoun ki

annan dezabilite. Les mwan dir zot, letan bat dimoun in fini, touy dimoun in fini, me zot parti *US* zot ankor annan sa vilen manni. Pa avek Gouvernman *LDS* ki zot pou fer sa. *Nobody is above the law!*

La zot in deza komans en nouvo senaryo alternativ, kot zot pou toultan kontinyen pile dan labou pou tyak pou tyak, pou rod siporter dan binok.

Mr Speaker, Minis Finans in fer kler dan son diskour, ki sityasyon Gouvernman *LDS* ti trouv li ladan ler i ti vin o pouwar. Ki ti annan dan kof? Ki kalite kales ki ti erite. I pa ti zis en kales kase me en kales ki'n pouri. Menm si nou lekonomi ti dan mal. Menm si nou ti trouv nou dan en presipis, ladministrasyon Gouvernman *LDS* atraver nou Minis Finans, in kree en pon solid pou traverse. Pou nou kapab sov nou pti pei Sesel. Si pa Prezidan Ramkalawan, lekel ankor, dir mwan lekel?

Mr Speaker, mon felisit Sesel pou pran en desizyon brav, pour remet nou pei lo en semen fiskal ki pou benefis tou Seselwa, apre ki lepidemi in tap lemonn. Dapre en rapor Labank Mondyal pibliye le 11 Zanvye 2022, apele "*Global Growth to Slow through 2023, Adding to*

*Risk of 'Hard Landing' in Developing Countries"*

I ti fer resorti ki propagasyon varyan *Covid-19* ansanm avek lenflasyon, det e inegalite i pou entansifye lensertitid dan tou pei dan lemonn enkli Sesel. Sa rapor in fer resorti ki apre en for rebondisman an 2021, lekonomi global pe ralanti dan en fason tre remarkman. Menm lo mitan nouvo menas varyan *Covid*.

Sa i pou kree ogmantasyon dan lenflasyon. Plis det eksteryer, inegalite dan reveni ki pou met an danze rekiperasyon dan lemerzans e devlopman dan lekonomi. Sa rapor Labank Mondyal i osi fer resorti, ki krwasans mondyal i espekte pou ganny ralanti notableman sorti 4.1poursan an 2022, pou vin 3.2poursan an 2023.

Alor Mr Speaker sa i montre nou ki demann *pent-up* pou ganny dezentegre e alors sipor fiskal e moniter pou *slow down* dan lemonn antye enkli nou ti pei. Sa rapor in fer resorti ki sa lavites ki sa varyan *omicron* in atak e ravaz lemonn, i montre ki sa lepidemi pou kontinyen deranz aktivite lekonomi, sirtou bann gran pei parey Lasin, Lanmerik e lezot ankor.

E tou bann pei ki prodwi e *export* manze, latizann, *gas*, *fuel*, e lezot komodite esansyel. Sa Mr Speaker, pou anmenn inegalite e defi sekirite e sa i pou met an danze bann pei an devlopman, sirtou bann *Small Island States* akòz nou popilasyon i ti pti.

An menm tan Mr Speaker, sa ogmantasyon dan lenflasyon pou tap pli for bann travayer ki ganny pli pti git reveni.

Se pou sela Mr Speaker ki ladministrasyon *LDS* in pran konsiderasyon bann stratezi mondyal, Nasyon-z-Ini, *OECD*, pou met an plas bann Polisi fiskal pou sipòt tou kous Seselwa. Malgre i bann desizyon tre difisil avek en lekonomi ki pa ankor stabilize, pou anmenn en lannen fiskal pou lannen 2023, lo en baz pli for e pli rezilyan.

Mr Speaker, dapre rapor 2enm revizyon fer par *IMF* anba "*Extended fund facility for Seychelles June 29th 2022*," i ti dir ki lekonomi Seselwa in fer konsiderableman byen an 2021, avek en gran krwasans dan nou *GDP* ki'n depas lekspektasyon e sa in ganny pouse par nou Sekter Tourizm ki'n akseler vit ki nou pa ti pe ekspekte.

*IMF* in kontinyen an dizan ki sa lekspektasyon dan

rekiperasyon 2022, nou krwasans reel *GDP* pou ariv 7.1poursan akòz nou Sekter Tourizm i montre rezilyans e tou varyan *Covid-19* e osi bann tansyon zeopolitik. Nou rekiperasyon pou kontinyen avek en bon performans fiskal tre signifikan. Me avek pri komodite ki'n monte partou dan lemonn, sirtou avek lager *Ukraine* e Larisi, sa pou met presyon lo nou balans fiskal an 2022.

Ozordi Mr Speaker, gras a ladministrasyon *LDS*, en dirizan entelizan, en zonn for, en zonn brav, en zonn kapab, en zonn avek san lafreyer, en zonn karizmatik, avek en leker pou tou son zanfan, in navig sa bato dek o komansman dan sa movetan, ziska ozordi kot nou pe rekolte nou fri, sa ki nou'n semen.

Minis Finans in anmenn en Bidze 10.49milyon pou ganny dedye pour sekter piblik an 2023. Sa i montre ki nou Gouvernman *LDS* i serye. Granmersi Mr Speaker ladministrasyon *LDS* pa ti ekout sa bann karikatir *Teletubbies*.

Me sa ki nou konnen se travay dir ki ladministrasyon *LDS* in fer pou ouver nou pei, menm si *Covid* ti pe ravaz nou pti pei. I en travay ekselan ki

nou Gouvernman in fer zis pandan sa 2an pou met nou pei debout ankor, e asir en krwasans fiskal ki pou benefis tou nou bann zabitan.

Mr Speaker, ler Gouvernman *LDS* i pronons son lekor an 2021 pou ouver pei pou redres nou lekonomi, parti *US* ti dir *close down*! Ler nou Prezidan ti al rod led avek lezot zanmi Sesel pou ed nou pei, *US* ti dir nou pe fer frivolite, ki nou Prezidan pe voyaz tro bokou. Granmersi nou Prezidan pa'n travel dan sa *jeep prive* ki *US* in kree, san fwa sa i pa ti pou zanmen ariv kot son destinasyon.

Ler Minister Lasante ti konmans donn vaksen kont *Covid* pou ganny *herd immunity* parmi nou popilasyon, *US* ti *boycott*. Dapre zot *WHO* pa ti ankor *commission* sa bann vaksen. Me se zot menm apre ki ti al pran vaksen *COVID* anba-anba. Sa ti vedir zot ti napa ni en devan, ni en deryer - zot mars parey kanmaron! Me pa aköz zot latitid ki pou anpes sa Gouvernman kontinyen travay dir Mr Speaker.

Mr Speaker, pli gro proporsyon Bidze 2023 i pou al pou Sekter Ledikasyon, sa i R1.28milyon. Sa i a siport Minister Ledikasyon pou asire ki nou zanfan i ganny meyer

ledikasyon, aköz nou sistenm ledikasyon pe anmenn en nouvo transformasyon, baze lo nou Manifesto atraver *motto* '*Changing course, transforming education*'.

Sa Bidze pou osi troun ver sa bann ansenyan, reseser, tou bann *staff*, kot zot a pli byen kapab delivre ledikasyon pour tou nou bann zanfan. Parey nou konnen, *Covid-19* pa'n eparny nou, sirtou nou sistenm ledikasyon. Zanfan, paran, ansenyan in war zot pri dan en pandemik kot tou dimoun in bezwen reste a lekar.

Nou'n war tou sistenm skoler ti bezwen reazir e reaziste zot program pou asire ki laprantisaz i kontinyen. Permet mwan Mr Speaker pou fasilite tou bann anplwayer Minister Ledikasyon ek son Minis, pou koste ansanm. Mon kontan zot in koste ansanm dan sa moman difisil, pou asire ki nou zanfan i ganny akse avek program ki lekol in met an plas.

Avek *COVID-19*, nouvo metod lansennyman ti ganny dekouver. Sa se *online teaching* par bann ansenyan e *online learning* par nou bann zanfan. Avek sa Bidze mon pou demann Minister Ledikasyon pou kontinyen fer plis zefor, pou aplik sa metod laprantisaz pou



ki tou nou bann zanfan i a kapab ganny akse avek zot leson.

Mr Speaker mon fyer pou tande ki zanfan Lekol Primer ek Segonder Seselwa, pe fer byen dan *Science Fair*, ti fer byen dan *Science Fair 2022*, ki ti koensid avek *World Science Day for Peace and Development*. Lekol Anse Boileau i fer nou tre fyer pou dekros sa premye pri. Bravo lekol Anse Boileau, swivi par lekol Perseverance. Mon pou osi felisit tou zanfan lekol ki'n pran par dan sa bann proze inovativ.

Mon'n osi tande lo nouvel ki nou bann zanfan pe fer tre byen dan sa proze *Renesans online regarding myONE*. E ankore lekol Anse Boileau ki'n fer sikse, mon asire ki sa proze i Minister pe met an mars i pou kontinyen. Mon osi espere ki Minister Ledikasyon i a kontinyen avek sa program laprantisaz lalang *online*, pou bann zanfan amelyor zot performans. Sirtou pou metriz byen lalang Angle.

Mr Speaker, mon osi pe felisit Minister Ledikasyon pou sa linisyativ goute, pou tou zanfan dan lekol Leta. Sa i demontre ki nou Gouvernman LDS i krwar dan soulaz bann paran avek nesessite debaz. En *healthy breakfast promotes*

*learning*. Mersi tou bann *staff* Minister Ledikasyon. Bann *tuck shop owners* e tou bann endividi ki pe donn en koudmen pour benefis nou zanfan. I paret mwan ki sa goute i pli nitritif ki sa goute ki *US* ti donner, akoz sa bann zanfan pe byen *enjoy!*

Mr Speaker, Sekter Lasante i pou resevwar R1.19bilyon, e mon asire sa sekter pou met plis zefor pou kontinyen donn swen lasante pour tou dimoun ki reste Sesel. Wi Mr Speaker, Minis Lasante in fer son mye pou anpes *Covid* ravaz nou pti pei, ravaz nou popilasyon. Malgre sa dezaz ki *Covid-19* in fer dan nou pei, mon pou felisit tou travayer lasante pou debout ferm lo sa fon batay.

*COVID* i en nouvo lenfeksyon ki okenn profesyonnel lasante pa ti konn naryen lo sa viris. Me avek dedikasyon pou aprann, lanmour pou zot travay. Sesel in reisi met an plas tou bann gidans dan tou landrwa travay pou asire ki nou pep i reste an bonn sante.

Malerezman i annan serten nou frer ek ser ki'n kit nou, akoz sa viris *virulente*. Mon senpatiz avek tou fanmir ki'n perdi enn zot pros. Vaksinasyon ti en gran priyorite e ozordi sa program pe

kontinyen. Mon pou profit sa lokazyon pou demann tou dimoun ki zwenn kriter pou al pran zot vaksen kont *Covid* avan nou ganny en lot varyan.

Nou Prezidan ti kree en fon *Covid*, kot depans pou tou komodite esansyel parey latizann, latant, vaksen, peyman pou mont Lopital nef; enstalasyon nouvo *oxygen plant* e menm peyman pou bann *staff* ki'n fer travay dan *Covid*. Lopozisyon pe rode kote sa larzan in ale.

Mon krwar ki *Chairperson FPAC* i devret fer byen son travay, apre zot a dir ki *LDS* pe kasyet. *LDS* pe kasyet kwa? Prezan mon pou demann zot en lot kestyon. Oli sa lalis dimoun ki ti ganny asiste avek *FA4JR* ki letan nou ti demande pa ti le donnen? Dir nou kote sa fon ler ti ganny kree pou *Tsunami*, kote in ale?

Mr Speaker, malgre sa lepidemi mon pou felisit Minister Lasante ki son bann *staff* in toultan angaze dan tou sistenm, sistenm prevansyon, dan sistenm tretman, sistenm rehabilitasyon, e lezot servis ek swen ki in toultan kontinyen, menm si pandan sa letan kot ti annan letan ti kritik.

Me par kont, mon'n ekout en Onorab dan lot kote latab ki'n dir ki pasyan pa pe ganny

latizann. Onorab, Minis Lasante ti vin eksplike dan sa Lasanble, ki latizann zenerik in toultan annan. Akoz si en pasyan in abitye avek en serten kalite pilil, e sa pilil napa lo *market*, in toultan annan ranplase avek menm pilil zenerik ki ganny ofer.

Menm si son kouler, son laform pa parey. Apre tou Sesel pa manifaktir latizann. Tou latizann i ganny enporte e nou tou nou konnen sityasyon ekonomik dan lemond ki transportasyon e kou i en gran fakter.

Mr Speaker, avek sa Bidze ki Minister Lasante pou gannyen, mon demann sa Minister pou revwar bann servis, sirtou lapwentman avek spesyalis. Nou Gouvernman i reste son priyorite pou asire ki Seselwa i reste an bonn sante, e mon *welcome* sa linisyativ ki Gouvernman in anonse ki an 2023, en letid detaye pou ganny fer pou reform sistenm lasante. Kot i byen, i ava kontinyen fer pli byen. Kot i mal, nou a ganny zet anba e en meyer stratezi i a ganny met an plas baze lo bezwen aktyel.

Mr Speaker, program proteksyon sosyal i tre ankourazan ki nou'n trouve ki Minis Finans in dedye R1.2milyon pou program

proteksyon sosyal. Sa i montre ki nou Gouvernman pa pou kit personn ater. Ou sa manman, ou sa papa, ou sa fanmir ki ankor pe fer 2 bout zwenn.

Ou sa *carer*, ou sa trwazyenm- az, ou sa zanfan, ou sa endividi avek dezabilite. Ou sa etidyan, ou sa pasyan ki'n pas lo *Board* Medikal, mon konnen ki lazans proteksyon sosyal pou asiste ou baze lo kriter ki'n ganny defini. Me mon pou lans en lapel avek sa lazans pou revwar letan ki dimoun i fer laplikasyon e ler zot ganny asiste.

E osi revwar Lalwa Lasistans Sosyal pou sa Lazans pou vin azour avek realite. Mon pou osi demann Sekter Sosyal pou refer en letid pou lapovrete pou konn bezwen lasistans, baze lo levidans, sirtou *post-Covid*.

Mon kontan ki Gouvernman pe travay lo en reform dan Proteksyon Sosyal avek bi pou revwar sistenm proteksyon, pou asir soutenabilite e osi promot e protez lafors travayer Seselwa.

Mr Speaker, en sonm R3.4bilyon in ganny propoze pou *wages and salaries* pou 2023 dan servis piblik. Sa i en ogmantasyon 14poursan ouswa R428.3milyon. Ankor Mr

Speaker sa i montre ki sa ladministrasyon *LDS* in ekout Lepep pandan sa 2 dernyen lannen. Nou ti'n erit en kof vid avek en lekonomi non performan, sirtou dan sa kriz mondyal kot pri komodite in vremen ogmante.

Nou'n dir mersi. Nou dir mersi sa Gouvernman responsab pou aret sa bann gaspiyaz. Fer bon desizyon baze lo en bon plan stratezik. Se pou sela ki an 2023, sa ki nou'n met dekote pou ganny partaze avek nou pep Seselwa.

Mr speaker parey Minis Finans in anonse, premyerman anba sa re nimerasyon saler, 4 *allowances* pou ganny konsolide ansanm avek saler debaz. Sa se a 5poursan *allowance* siplemanter, *marketable skills allowance*, *graduate allowance* e sa *allowance* pou bon performans.

Adisyonnelman Mr Speaker, pou annan en logmantasyon 10poursan lo saler debaz, ler in ganny konsolide avek sa bann *allowance*. Alors Mr Speaker mon santi ki saler debaz pou sorti R5,485 pou vin R7,343. Mon asire sa ogmantasyon pou soulaz nou travayer piblik, vi ki pri lavi in ogmante apre diferan lobstak ki lemonn pe fer fas avek, enkli Sesel.

Mr Speaker, dan son larepons, Minis i a dir sa Lasanble, si sa *allowance* R1000 ki enn de travayer, sirtou bann travayer piblik, parey bann ners, bann ansenyan, Lapolis ki'n pran retret i pou ogmante osi.

Mon espere Mr Speaker ki sekter prive i a osi swiv Minis Finans pou zot osi revwar saler zot travayer. Sa logmantasyon i a osi vin en *wakeup call* pou travayer dan sekter piblik. Sa ki ankor pe trenn lipye, zot bezwen bouze, ou sed plas en lot ki annan sa lanmour pou travay dir.

Mr Speaker, sa gran lenflasyon lekonomi mondyal apre *Covid* e sirtou pandan sa lager *Ukraine* ek Larisi, in montre ki kou lavi in monte dan tou pei. Sa set aköz komodite esansyel, transportasyon pa'n fasil. Sirtou menm bann pti pei parey nou menm nou Sesel.

Me pou ed Seselwa ganny en meyer pri pou marsandiz, Gouvernman *LDS* atraver *STC*, in persiste pou kontinyen met pri kontrol pou komodite esansyel. Sa detrwa komodite esansyel ki'n met pri lo la, pou soulaz bann fanmir, sa se *RRP*.

Be Mr Speaker, malgre ki *US* pe fer nou krwar ki napa rediksyon dan pri komodite, mwan mon'n pran mon letan

mon'n pas dan tou le 12 sa laboutik Pointe Larue. Sa ki mon'n dekouver se ki i annan en kantite marsandiz ki pri in redwir. Mon pou donn zis 12 legzanp aköz mon'n pas dan 12 laboutik.

Aküz letan ki mon pe gannyen pa pou permet pou mwan fini mon diskour. Par Egzanp,

Nimero 1: *Pascual Yoghurt*. 1 Lit i sorti R58 pou vin R35, ki vin en rediksyon R23.

*Ayam Baked Beans* gro bwat sorti R25 in vin R20. Son pti bwat i sorti R17 in vin R12.

*Omo Comfort* 3Lit ki ti kout R175 in vin R129, en *savings* R46.

*Aromat* gro bwat sorti R30 in vin R23 ankor en *savings* R7.

Son pti bwat sorti R17 e in vin R10.

Dile *Lacnor* 1Lit sorti R27 in vin R21. E sa i vin en *savings* R6 lo sak bwat.

2 *item* ki'n fek ganny entrodwi ki son pri i tre ba se *Mara Baked Beans* gro bwat i zis R10.

En pake dile likid ki vann R15 sa i nouvo, pe vann R15 savedir son pri i ase ba.

Mr Speaker, lalis i long. Fodre *US* i pas en kou dan sa bann laboutik pou war larealite. Avek sa ogmantasyon dan

saler, sa i a osi ed lafanmir pou zot kapab fer 2 bout zwenn, malgre pri komodite, pri lavi i pa fasil. Tou pri *RRP* la mazorite marsan i respekte. Me pou bann ki ankor mal onnet, fodre *Fair Trading Commission* i vizilan e *monitor* zot de tanzantan.

Mr Speaker, mon pou al dan mon distrik kot mon reste Pointe Larue. Mon'n ekout *MNA* Pointe Larue koze lo baz proze ki pa ankor ganny devlope dan mon distrik. Sirtou proze lakaz *Nageon Estate* e semen segonder. Wi lontan depi lepok *SPUP*, *SPPF US*, zabitan Pointe Larue, zot ankor pe esper sa bann devlopman.

Be aköz son parti pa ti fer sa bann proze, pou asiste zabitan avek lakaz ek semen pli vit? Zabitan Pointe Larue, leve ekoute;- *SPUP*, *SPPF*, *US*, prezan *US*, ti zis bat zot latet pou ganny vot. Konbyen zot ki ankor pe espere ziska prezan? Me sa ki mon pou dir zot, pa perdi lespwar, pran pasyans, sa Gouvernman *LDS* in tann zot leokri. I pou fer son mye pou asiste zot byento.

Tou sa bann *housing estate*, Anse Francois, ex Albert, Joseph Estate, Mirabel in ganny konstrir san en bon planifikasyon. Ziska ozordi malpropte pe devid dan zot

lakaz, aköz napa en bon sistenm desarz pou zot. Sak fwa lapli i tonbe, *swimming pool* desarz i lo zot peron, ou dan zot lakwizin.

Pandan sa 2an Gouvernman *LDS* in fer son mye, pou enplimant proze dan Pointe Larue ki'n fer en diferans dan lavi preski en bon pe dimoun. E dan sa Bidze 2023 pou Sekter Lakaz, pou annan ogmantasyon e osi revizyon dan bann *scheme* ki egziste, pou donn plis dimoun lakaz. Par egzanp sa ki nou'n trouve devlopman ki'n arive, *Anonyme Housing Estate* in met 3 lo 24 zabitan an 2021.

Pandan sa 2an ler lapli i tonbe, napa inondasyon lo semen Pointe Larue. Ni menm kot lekol, aköz sa Gouvernman *LDS* in travay dir pou met bann debousman. Avek konstriksiyon sa 3enm *lane*, byento trafik pou nepli bloke. Sa bann proze swivan in konplete.

Konstriksiyon *ramp* pou mont kot *housing estate* lower Nageon, pou fer pas kot Ladministrasyon Distrik. *Railing* avek peron Anse Faure, pou sa madanm kapab al fer son tretman medikal dan en fason i kapab monte desann.

Rektifikasyon *maintenance bin site* larantre semen kot Nageon Estate, Anse

Francois, Anse Dejeuner ek Semen Mangousta. Akse semen pou *parking* transpor pou *housing estate* pre kot Ladministrasyon Distrik kot lower *Nageon Estate*.

Koreksyon e rektifikasyon drenaz pou en zabitan ki reste deryer lekòl Pointe Larue. Konstriksyon miray an ros ouswa *retaining wall Nageon Estate* Pointe Larue. Tousala in ganny fer pandan sa pti git letan pou 2022. Proze ki lo plan demars in fini ganny fer pou en proze semen pou en 12 fanmir Anse Francois, Pointe Larue santral. Demars in fini ganny fer pou konstriksyon *parking*.

Ankor mon pe dir *Nageon Estate*. Semen transpor *Nageon Estate* pou zwenn avek Karyol. I lo proze pou konmans fer *survey*. Semen Adela faz 3 osi i pou byento al konmanse. *Mini complex* sportif, pou bann zanfan ouswa bann zenn ki reste *ex Albert*, sa proze pou konmans 2023.

Mr Speaker lalis i long, sa et akòz mon travay byen avek mon *DA* Pointe Larue, Ms Vesna Gertrude. I en fanm debouryer. I annan en leker pour tou zabitan. Tou proze ki mon anmenn kot li nou diskite avan egzèkite. Konpare avek sa Onorab Pointe Larue, kot i fer

tou desizyon dan li menm avek son *clerk* san konsilte son *DA*.

*(Interruption)*

**MR SPEAKER**

Onorab-Onorab. Silvouple. Onorab *retract*. Mon pa oule okenn lakizasyon kont lezot Manm pou zot performans. *Retract* silvouple!

**HON ROSIE BISTOQUET**

Mon'n *retract* Mr Speaker.

**MR SPEAKER**

Ok.

**HON ROSIE BISTOQUET**

Mon kapab kontinyen Mr Speaker? Mon'n menm ganny 3 dimoun ki'n kontakte mwan. Kot zot in ganny dir pa anmenn okenn form pou konplete kot *DA*, akòz *DA* pa pou pran ka avek zot probleman. Menm ler bann Konsil ti vini, nou tou nou ti pe sey rod proze pou nou distrik. Olye rod proze pou nou zabitan Pointe Larue.

I annan enn nou bann konfrer ki ti al anmenn bann Konsil dan lofis kot pti annan 2 lofis i al demann Konsil ...

**MR SPEAKER**

Onorab eskize, eski ou ankor pe koz lo *MNA* la?

*(Interruption)*

**HON ROSIE BISTOQUET**

Non-non, Mr Speaker.

*(Interruption)*

**MR SPEAKER**

Non-non, *Sorry*. Onorab ...

*(Interruption)*

**MR SPEAKER**

... mon pa'n...

**HON ROSIE BISTOQUET**

Mon kontinyen Mr Speaker.  
Donn mwan ...

**MR SPEAKER**

En moman silvouple. Mon pa'n tro konpran. Me selman mon'n deza dir ou, les Onorab trankil. Ou pa la pou ziz son *performance*. Kontinyen avek ou repons lo Bidze.

**HON ROSIE BISTOQUET**

Mersi Mr Speaker. Mr Speaker mon asire ki lannen prosen tou Seselwa pou war en nouvo souf, sirtou bann dimoun Pointe Larue, dan zot lavi, aköz sa Bidze ki Minis Finans in prononse. Mon asire sa logmantasyon 10poursan dan saler ek sa 13enm mwan lapey baze lo performans, pou benefis tou travayer ki'n debourye. Ki'n

donn tou pou anmenn en meyer lavenir pou zot zanfan.

Mr Speaker ladministrasyon LDS pa pou zanmen les zot tonbe, aköz Sesel i pou tou son zanfan. Se Prezidan Ramkalawan ki depi 2020 i pe *run border* Pointe Larue avek en vot 51.1poursan.

Pou terminen Mr Speaker, mon remersi tou zabitan Pointe Larue ki'n ed mwan dan mwan travay, san get zot afilyasyon politik, zot kouler, zot larelizyon.

Mon remersi mon *clerk* Danielle Arissol pou son devosyon, travay dir pandan lannen 2022. Mon remersi DA Vesna Gertrude, Pointe Larue pou son bon korperasyon e ki Bondye i a beni zot tou. Nou pou kontinyen sa bon travay ansanm. Mersi Mr Speaker.

**MR SPEAKER**

Byen. Onorab Norbert Loizeau.

**HON NORBERT LOIZEAU**

Mersi Mr Speaker. Bonzour Minis. Bonzour tou Manm. Bonzour tou dimoun a lekout. Mr Speaker mon anvi dir ek bann oditer ki pe ekout mwan ozordi, lavwa pa tro bon. Konpran mon si ennler en pti latou i pas dan milye mon konversasyon ki mon pou al fer la. E osi mon anvi dir, Onorab

Bastienne i dir mwan, dir bann dimoun a lekout ki sa madanm in gannye son rob. Bannla in *call* li Lapos in dir li vin serse ti dan tirwar ater landmen.

**(APPLAUSE)**

**HON NORBERT LOIZEAU**

Mr Speaker pour konmanse, mon anvi felisit nou Gouvernman *LDS* pou sa bonn travay ki'n fer pandan sa 2 dernyen lannen ki nou'n vin o pouvwar. Avek nou *motto* 'Sesel pou tou son zanfan'. Malgre tou diferans politik. Tou Seselwa ti garanti zot travay dan sekter piblik. Zot ti garanti zot lanplwa, eksepte bann ki pa ti aksepte sa sanzman Gouvernman e zot, zot ti kite zot ti ale.

Ozordi Mr Speaker, lemonn pe felisit Sesel. Minis Finans Mr Naadir Hassan pe ganny gete konman enn bann Minis Finans ki'n fer pli byen lo nivo Lafrik e osi Sesel Mr Speaker. E mon anvi dir Minis Hassan, malgre tou sa bann latak zot pe fer lo ou, napa enn lo sa kote ki pou tous ni enn ou pti ledwa!

Mr Speaker le 24 Oktob 2020, nou ti rebran nou pei dan lanmen en group lisifer Mr Speaker, ki ti pe donn bal dan nou larzan. Ti pe fer disparet

nou larzan R50milyon, ganny disparet dan segonn;-4.5milyon lo proze Perseverance. *Irish, NDEA*, bann mersener *Irish*, tousala Mr Speaker, ti donn bal dan nou larzan. I ti kit nou pei an rin. E pou sa rezon Mr Speaker avek bokou lezot keksoz ki'n arive dan nou pei, nou Prezidan ti deklare ki nou pei i en "kales kase."

Prezan Mr Speaker se akoz kof ti vid. Zis R14.7milyon ki ti reste dan kof Leta. E sa ti anmenn bokou problem, bokou lenkyetid pou nou koman en nouvo Gouvernman, ki ti'n fek antre.

Me nou ti konnen Mr Speaker ki sa ti'n ganny fer par ekspre. Nou ti konnen ki sa ti en *act* malisye akoz zot ti konnen ki zot ti pe al perdi sa eleksyon. Alors donn bal, pran tou, partaze e kit nou pei lo son zenou.

Apre pou zot dir ek dimoun deor, "lala sanzman zot ti pe rode. Zot ti pe rod sanzman, *LDS* pe fer pei faid!" Mr Speaker sa ti zot plan depi lontan. Me nou koman en Gouvernman serye Mr Speaker avek en vizyon kler ki nou anvi fer pou Sesel - pou nou pti pei Sesel, nou ti troun nou lanmans semiz e komans travay dir. Akoz nou dan *LDS* Mr Speaker nou annan sa kiltir



travay dir. E nou anvi ki sa kiltir travay dir in renye parmi nou pep.

E sa Mr Speaker ti fer ki nou ti bezwen pran bokou bann desizyon drastik ki pa popilis. Pou nou kapab refer nou pei. Premye keksoz ki nou ti fer Mr Speaker, anmenn vaksen, malgre i annan ti dir ki vaksen pa bon. Me nou ti pran nou vaksen e pou lenformasyon bann ki pe dir vaksen i zis en fason Mr Speaker, pou anpes ou malad plis. Vaksen pa anpes ou ganny COVID. I en fason pou anpes ou malad plis.

Mr Speaker, atraver vaksen nou pep, nou ti vin premye pei dan lafrik ki son pep ti ganny vaksinen. E sa ti fer Mr Speaker, nou ti fer li, akoz nou ti anvi anmenn sa nivo *herd immunity* dan nou pep. Nou ti osi Mr Speaker envit zot lo bann *High Level Committee* pou sey donn zot kontribisyon. Me zot pa ti enterese. Me selman ozordi, nou tann en Onorab i dir, nou pa krwar dan konsiltasyon.

Me avek tou sa bann keksoz ki nou'n fer, vaksen pou nou pei ganny nou *herd immunity* Mr Speaker, sa ti fer ki nou ti re ouver nou lafrontyer avek lemond. E sa ti osi fer ki bokou bann vol enternasyonal ti antre dan nou pei. Akoz Sesel

ti ganny gete koman enn sa destinasyon ki *safe* pou bann viziter kapab vin pas zot vakans.

Avek sa Mr speaker, avek sa louvertir ti fer ki nou Lendistri Tourizm ti rebran kot bann gran lotel mwayen ek bann pti letablisman touristik ti re ouver zot laport avek bann touris. Avek bann viziter ki ti anvi vin Sesel.

Mr Speaker nou pa'n zis depan lo touris. Nou osi met lanfaz lo lezot sekter, parey lagrikiltir ek lapes. Kot larzan in ganny mete pou ki prodiksyon lokal i ogmante. Pa zis dan lagrikiltir me osi dan elevaz zannimo.

Dan Sekter Lekonomi Ble Mr Speaker, Gouvernman in met larzan pou ankouraz dimoun, pou antre dan biznes dan valer azoute a la baz bann prodwir lanmer. Sa in fer osi ede pou agrandi nou lekonomi e fer li vin pli performan.

Avek tou sa sakrifis e travay dir, Vandredi le 24 Oktob, Minis Finans Mr Naadir Hassan in kapab anmenn en Bidze en pe plis ki 10bilyon devan nou Lasanble. E osi in dir mwan ki dan kof i annan de milyon ankor ki reste. Sa Bidze in posib Mr Speaker, akoz nou annan en Gouvernman ki

responsab, disiplin e desiziv dan tou desizyon ki zot pran.

Avek sa travay dir ek bokou sakrifis, ozordi tou dimoun dan Sekter Piblik in kapab garanti en lapey. E la avek sa Bidze ki devan nou, tou travayer dan sekter piblik pou garanti en lapey, deplis 10poursan ogmantasyon ek en 13enm mwan saler lo baz performans.

Wi Mr Speaker lo baz performans akoz nou anvi ki dimoun i performen dan travay. E parey mon ti dir dernyen fwa, se sa ler nou get dan nou Manifesto. Se sa ki ler nou ti pe vizit dimoun, dimoun ti dir nou i annan pa kapab ganny menm lapey ek zot, menm si zot pa'n travay. E nou nou'n ekout nou dimoun e nou. nou pe fer li a la baz performans.

Baze lo performans Mr Speaker, akoz nou anvi en sekter piblik ki performen e ki efikas. E la Mr Speaker, larzan pe ganny mete pou en program *training* dan *young leaders*. Pou idantifye bann *young leaders* boner. Pou zot antre dan servis piblik pli tar e fer li vin efikas e performan.

Mr Speaker, sa Bidze i telman bon ki menm Onorab Ernesta in dir pou li menm, atraver en term ki'n servi ki sa Bidze i bon. Mr Speaker Onorab

Ernesta ti dir nou atraver ou, ki sa Bidze i en Bidze larkansyel.

Mr Speaker be larkansyel i vedir zoli kouler, i koloran, i anmenn lazwa. Parey mon zanmi Mr Govinden ti dir, larkansyel i vedir *the worst is over*, Onorab Ernesta, atraver ou Mr Speaker!

**(APPLAUSE)**

### **HON NORBERT LOIZEAU**

*The storm is over*, tanpet in pase. Pou napa deliz ankor. Se sa sinifikasyon larkansyel Mr Speaker. E larkansyel i vedir ki nou lo bon semen parey Sesel i lo bon semen. Sesel i lo bon semen e Sesel pe sorti dan sa kriz finansyel. Menm lemonn pe rekonnet sa.

Mr Speaker en keksoz ki mon'n tande e ki mon'n vwar lo *social media*, ki mon dakor avek Mr Speaker, kot en dimoun in dir ki *US* i parey en msye. Permet mwan servi sa mo Mr Speaker, ki ti galan avek en madanm ki apel Sesel. In bat sa madanm, in abiz sa madanm, in pran tou sa ki sa madanm ti annan. E fer li plere Mr Speaker. E in fer Sesel plere, sa madanm ki apel Sesel in plere.

Le 24 Oktob 2020 Mr Speaker, sa madanm ki apel Sesel ti zwenn en zoli msye ki apel *LDS*. I ti marye avek sa

msye Mr Speaker. Nou'n okip li, nou'n redonn li son dinyite, nou'n met li lo en oter. Konmdir mon zanmi Joe Samy dan son sanson, *LDS* ti'n met Sesel son pli zoli rob, pou fer vwayaze tou son bann zanfan.

E in dir avek Sesel, Mr Speaker, *LDS* in dir avek sa madanm ki apel Sesel parey ler 2 dimoun i marye, ki lanmor ki pou separ zot. Wi Sesel, wi Mr Speaker, se lanmor ki pou separ *LDS* avek Sesel.

Mr Speaker zot bezwen konpran ki *LDS* in met en bag dan ledwa sa madanm ki apel Sesel, e personn pa pou separ li ankor. Sa i fer Mr Speaker, i fer zot zalou. I fer zot gro ker. Zot menm sante, "gro leker pti leker!" Wi Mr Speaker. Zot pou sante - wi. Me sanmenm sa pti touf, sa pti touf vetiver ki pou reste zot balizaz ki zot pou mars avek partou.

Mr Speaker, apre zot le get dan binok pou rod sa zoli madanm ki apel Sesel, me zot pa ti war li Mr Speaker. Zot ti war dan en pti *video* ti annan en zafer ki ti montre ki zot ti war Mr Speaker, zot pa ti war Sesel.

Mr Speaker, ozordi parey mon'n dir, Sesel in met son pli zoli rob pou fer vwayaze son bann zanfan. Mon pe dir sa akoz ozordi tou bann zanfan Seselwa ki ti ganny dir zot pa

pou al zot *scholarship* deor, pou napa larzan pou pei e pou zot al zot *scholarship*, ozordi Gouvernman *LDS* Mr Speaker pe fer vwayaze tou son bann etidyan, partou dan lemonn, pou zot al etidye!

E an plis ki sa Mr Speaker, nou'n fer sir ki sa voyaz zot *stipend* pou ganny ogmante, pou zot kapab soutenir zot lekor pandan zot letid aletranze. Avek kriz lemonn ki pe fer li difisil pou zot kapab soutenir zot lekor laba.

Dan en Bidze larkansyel Mr Speaker, *127 unit* lakaz pou ganny konstrir dan diferan distrik partou dan Sesel. Nou koman en Gouvernman serye e responsab Mr Speaker, nou pa pe fer parey Gouvernman *US* kot nou dir nou pou fer 500 nou pou fer 1,000 apre nou pa fer naryen. Nou fer keksoz dapre nou mwayen.

E la Mr Speaker, mwan dan distrik Bel Air mon'n ganny *6 unit* pe konmans konstrir. Mon dir Minis mersi pou sa pti larzan akoz vi ki Bel Air son topografi i en pti pe difisil. Teren i difil napa later pou konstrir plis lakaz, mon dir li mersi pou sa 7. Me mon konnen demars pe fer pou ki lezot landrwa dan bann *forest reserve*, petet en zour ava ganny tire pou nou kapab konstrir plis lakaz, pou

donn nou bann zabitan dan distrik Bel Air.

Parmi pou annan Mr Speaker, bann *mid-range condo* anba *self-financing*, ki Minis in koz lo la. E Bel Air Mr Speaker, dapre ki mon pe konpran avek Administrater, posibleman nou pou annan anviron 14 a 16 *unit* ki pou ganny konstri kot vye *day care*. Mon dir zot mersi davans.

Mr Speaker, nou dan Bel Air, nou anvi ki dimoun i serye. Ki zabitan Bel Air i kapab finans zot keksoz zot menm. Pa depan lo Gouvernman pou donn zot *social housing*. Me travay dir pou zot kapab finans zot bann proze zot menm. Dan sa Bidze larkansyel Mr Speaker, i annan larzan pou nou refer bann lenfrastruktir sportif, ki'n tonm an rin anba ansyen Gouvernman.

Mr Speaker, sa bann travay pe kout nou en ta larzan pou fer. Kan sa bann larzan ti a kapab ganny servi pou fer lezot keksoz pou bann zenn. Parey ozordi i annan 17milyon pou *High Level Sport*, pou bann konpetisyon enternasyonal ki a pe vini Mr Speaker. Si ti napa bann renovasyon, posibleman Gouvernman *LDS* ti a kapab met plis ki 17milyon, menm 25, 30 ek 40milyon pou bann *High Level Sports*.

E byento Mr Speaker, bann paran La Digue, pou kapab vin get zot bann zanfan kot pe *perform*. La Digue menm Mr Speaker, sa se gras a sa Gouvernman *LDS*. Sa pou posib apre ki tou sa bann renovasyon lo bann *sports complex* lo Mahe, enkli La Digue Mr Speaker ki'n tonm an rin, pou'n fini.

Ankor lo La Digue Mr Speaker, larzan in ganny mete pou diferan proze. Bann proze kapital parey nouvo lekol primer ek segonder. Pou fer sir ki bann zanfan La Digue i ganny landrwa *conducive* pou zot kapab etidye e fer byen, e fer pli byen. Parey nou Prezidan i kontan dir, nou pou met divan anba zot lezel.

Nou pou agrandi por Mr Speaker, pou fer li vin en pe pli sofistike pou bann Digwa, pou bann Digwa ki servi por. I annan Lopital Mr Speaker ki pe ganny fer menm pe *partly funded* avek par Gouvernman *Grant* sorti *UAE*.

Mr Speaker, tousala nou pe fer. I annan larzan pou repar lakaz dimoun aze Mr Speaker, ki pandan tou sa bann lannen anba *US* pa'n ganny fer. Pou annan larzan Mr Speaker pou repar *day care* ankor lo La Digue Mr Speaker. Pou bann pti zanfan kapab fer zot laprantisaz

dan en landrwa byen prop e *conducive* Mr Speaker.

E pli enportan Mr Speaker, Gouvernman *LDS* pou fer sir ki La Digue pa pou zanmen vin sa gran pi perdi, ki en msye ti dir en fwa dan *interview* lo televizyon. Ki si nou pa fer atansyon, La Digue ek son bann sistenm desarz, La Digue pou vin en gran pi perdi.

Nouvo sistenm *STP* Mr Speaker, pou ganny fer Mr Speaker. E ladan menm Mr Speaker, Onorab La Digue i dir nou, ki nou, nou pa'n vin vakans, nou'n vin travay. Wi Mr Speaker, nou, nou vin travay. Ler nou Prezidan, ler Minis ek son bann zofisye i mont La Digue Mr Speaker, zot al travay. Tandis ki *US* lontan, zot ti al *holiday* La Digue Mr Speaker zot. E sanmenm ki ou trouve ki La Digue i dan sa leta ozordi.

Mr Speaker permet mwan pou koz lo La Digue, aköz ozordi

La Digue napa en lavwa for. Alors nou bezwen siport La Digue. E nou pe fer li Mr Speaker, pa pou en vot. Nou pe fer li aköz La Digue i bezwen ganny sa ki meyer zot osi.

**(APPLAUSE)**

**HON NORBERT LOIZEAU**

An konklizyon Mr Speaker, mon anvi dir avek tou Seselwa, konnen ki kalite Lopoziyon ki nou pe dil avek. Nou annan en Lopoziyon ki anvi anmenn vyolans dan nou pei. E la mon anvi kondann, Mr Speaker, sa latak personnel ki'n ganny fer lo mon frer, Onorab Naddy Zialor, ki otreman kapab Mr Speaker, avek son dezabilite.

E sa pe ganny fer Mr Speaker, i *sad*. Mon pa anvi koz lo la me selman mon bezwen dir Mr Speaker, aköz mon leker ti fermal. Ti fermal ler mon ti vwar lo *social media* ki bann siporter *US* pros avek bann dirizan, Mr Speaker ti pe fer bann latak personnel. Sa ki ti mal Mr Speaker, se fanmir serten bann pros dan Lopoziyon, e menm bann ki ti deza en kandida Mr Speaker, ki pe fer sa bann latak personnel, e ki anvi aras li son bekir, e tir son ledan Mr Speaker.!

Sa i mal. I mal, i terib pou fer sa avek en frer, ki pa kapab debout lo son lipye, me ki bezwen servi son bekir pou debout lo la Mr Speaker. Mr Speaker i mal par bann siporter *US* pou antisipe pou fer ditor en frer ki otreman kapab. Zis aköz son lopinyon politik. Selman *Leader* Lopoziyon in koz lo laliberte lekspresyon, me ler en

frer i eksprimen, zot pa kontan, zot maltret li.

Mr Speaker, sa ki'n arive se 11/22 - *The New Era* Mr Speaker. Parey ti fer resorti, parey gran santer popiler Julia dan en *interview*, lo *Paradise FM*. Ozordi anba sa nouvo Gouvernman Mr Speaker, pa pou egziste en loto avek nimero 11/22, ki pou anmas dimoun, bate, torture parey ti arive avek mon frer, Sony Elizabeth e Brian Victor Mr Speaker e Hoffman. Mon 3 zanmi dan Bel Air Mr Speaker.

Pou sa pa ariv ankor Mr Speaker, an 2025 Seselwa pa fer sa fot, pou met *US* o pouwar. 11/22 - *The New Era*, nou pou war li zis lo *Facebook* e dan Kongre *US*. Parey dimoun in vwar, kan zot *Leader* ti dir okenn dimoun ki pou anpes nou tras sa larout ki nou frer fondater Mr France Albert Rene in trase, pou ganny zete Mr Speaker, dan en rigol, anba en pon. Mr Speaker sa se 11/22 - *The New Era*.

En leopar pou toultan reste en leopar Mr Speaker. I pa pou zanmen sanz son tas, alors Lepep Seselwa, fer nou atansyon 2025 ler nou al vote. Siporter *LDS*, akoz *LDS* se sa lavwa pou Sesel. Se *LDS* ki sa msye ki pa'n anvi vin galan avek sa madanm ki apel Sesel. *LDS* i

sa msye ki'n marye avek Sesel e ki'n met en bag dan ledwa Sesel, Mr Speaker, e in met li sa pli zoli rob.

Pou terminen Mr Speaker, mon anvi remerci Bondye pou gid mwan dan mon parkour politik. Mon fanmir byen sir ki'n akonpany mwan. Mon madanm, mon bann zanfan. Tou zabitan mon distrik Bel Air ki'n siport mwan. Mon bann aktivis. Bann ki ankor la ek bann ki'n kite in ale. Mon dir zot mersi zot osi.

Mon clerk Agnes Gerry ki pandan mon labsans ler mon dan Lasanble, li pe okip mon biro. Mon anvi dir li mersi. Mon nouvo *DA* Christopher e tou bann travayer Ladministrasyon Distrik, pou zot sipor pandan sa lannen. Travay pli dir. Travay nou pou travay pli dir lannen prosen. Mr Speaker, mersi pou permet mwan sa detrwa pti letan. Mersi.

**(APPLAUSE)**

**MR SPEAKER**

Mersi Onorab. Onorab John Hoareau.

**HON JOHN HOAREAU**

Mersi Mr Speaker. Bonn apre midi tou dimoun ki pe ekout mwan apre midi. Mr Speaker,

sa lemond ki nou form parti, pe pas dan en moman pli tirbilan, avek bokou plis lensertitid ki zanmen avan dan son listwar apre lager mondyal.

Menm si nou detrwa pti zil eparpiye dan Losean Endyen, tou sa ki arive otour nou, i kapab kre en lenpak lo nou. Ki swa i en lenpak lanvironnmanal, sosyoekonomik oubyen politik.

Sa i fer nou rapel ki nou pa pe viv an izolasyon menm si nou lwen ek bokou lezot pei. Dan en lot mo nou form parti sa ekosistenm global, e nou bezwen navig nou bato atraver bann laroul zeopolitik.

Sa travay i en ki difisil, me a tou pri nou dirizan pe toultan rod plis e le meyer pou son pep, san konpromiz nou souverente e nou lafyerte. Avek larive Covid-19, en pe plis ki 2an pase, ki pa'n konmans Sesel, me ler in apoz isi in met son lipye isi Sesel, son lefe in fors nou pou revwar nou fason pou viv e lafason ki nou zer nou resours ki deza tre limite.

Nou'n bezwen rod fason pou anmenn plis lefikasite dan bann striktir governans e servis piblik pou nou servi o *maximum* sa pti git resours ki a nou dispozisyon.

Pandan sa 2an, nou'n war bokou Lalwa ki'n vin devan nou

Lasanble ki zisteman reflekte sa transformasyon. Par egzanp kot bann *Board* ki zot travay ti *overlap* lo fonksyon bann *CEO*, in ganny aboli. Oubyen lakantite bann Manm *Board* in ganny redwir pou koup depans.

Bann departman ki pe mars lo lipye kanmarad, in osi ganny aboli. Nou'n vin ek lide diferan akoz nou le vwar en rezilta diferan menm ki sa prensip in pran bokou letan pou Lopozisyon dizere.

COVID in fer nou egalman reget distribisyon larzan ki nou anmanse atraver *tax* e *dividends*. Sa ki nou apel dan en lot mo larises nou pei. Kot fodre fer en pe plis lekonomi e retir labi, nou Gouvernman in pran bann desizyon brav pou ferm tiyo. Ler ti neser pou anmas en pe pou met de kote pou letan dir, nou Gouvernman in fer li.

Kot fodre edik nou pep lo zot responsabilite e zot kontribisyon dan devlopman pei, nou pa'n rat loportinite pou fer li. Tandis ki parti *US*, li in profit sa loportinite pou fer politik bonmarse e senm mesaz negativ e iresponsab.

Zot prensip se kre depandans depi nesans ziska lanmor. Atraver sa prensip zot kapab etabli kontrol total lo lespri e fason panse sa pep.

Akoz zot konnen si ou, ou pa pou santi ou oblize pou rann zot faver sansan zot pa pou donn ou sa ki zot in promet ou.

Pou zot Leta i pou zis donn larzan partou kote, ziska ler kof i vid. Tanpi konnen ki arive demen. En politik parey nou dir en politik lasos tomat, ki Seselwa ti rezete le 24 Oktob 2020.

Sa i tipikman zot, akoz ler zot donn bal dan larzan lepep san kontrol e rann kont sakenn sa bann dirizan i profite pou tir son gob. Se sa gran diferans ant prensip *LDS* e *US*.

Mr Speaker sa Bidze ki Minis Finans in anmennen, i montre klerman kot travayer i bezwen pran son responsabilite, kot Sekter Biznes i bezwen pran son responsabilite. E kot nou depans avek pridans e a lafen nou rann kont larzan piblik ki ganny depanse.

Mr Speaker, keksoz ki pli trakasan se ki ler lepidemi *Covid-19* in konmans desann en pe, lemon in vwar en lager konmanse an Lerop ant *Ukraine* ek Larisi. Sa lager in toudswit relans en defi mondyal kot pri manze, petrol e gas in monte.

Sa lenflasyon enternasyonal in osi enpakte lo nou dan diferan fason. Tel konman nou'n bezwen travay

pli dir pou ankouraz prodiksyon lokal vize ver sekirite alimanter. Nou'n bezwen eksplor fason pou nou kit prodwi petrol abordab pou nou peser kontinyen al lapes, pou *PUC* kapab zener e vann elektrisite a en pri pli ba posibil.

E pou lezot akter dan lekonomi ki depan lo petrol kapab kit zot servis a en pri abordab. Vi ki biznes i moter lekonomi, sa in ede pou pei kontinyen war en krwasans dan devlopman.

Malgre tou sa defi, apre zis 2an ki *LDS* in vin o pouvwar, nou'n kapab dir avek lafyerte ki nou'n kapab stabiliz lekonomi e diriz sa bato ver plis progre e prosperite. Nou'n kapab navige menm si lanmer i reste move.

Bokou zot lo lot kote latab zot zalou sa sikse, *but just too bad*. Sa ki anvi tonm kriz dan labou, tonbe. Sa ki anvi kriy son manman, akoz i dan douler ler i get en laplenn i vid, kontinyen kriye lasasen.

Sa i zot problem. Ki mannyer mon war zot pou bezwen kontinyen benny dan labou pou bokou plis letan ankor, e sipliy zot manman pou led ankor.

Mon ti ava kontan dir pep Seselwa reflesi seryezman e dir mwan, si sa lekip ki'n pran labar 2an pase ler kof ti annan



zis R14 milyon pou pey saler zis pou 4 mwan. Kot nou ti bezwen donn lasistans tou biznes pou zot kapab donn en saler zot travayer. Kot laplipar pti biznes ti pe fermen. Kot lekonomi pei ti'n tonm lo son zenou e pei ti pe faid.

Zis 2an pli tar, wi selman 2an pli tar, nou pe donn en logmantasyon lapey. Nou pe donn en 13enm mwan saler. Tou biznes in rebran, menm nouvo biznes in konmanse. *Tourism arrival* pe kas rikord. Larzan pe rantre dan pei atraver *foreign direct investment*. Loportinite lanplwa in ganny kree. Devlopman in rebran lelan tel konman lekol e lakaz ki pe ganny konstri.

Bann etidyan in rebran zot letid iniversiter aletranze. Marmay lekol pe ganny goute avek dezennen. *Fitch rating* ki montre abilite en pei pou li onor lobligasyon son det, pe mont pli o.

Eski ler ou fer sa konparezon, ou vwar bann amater ki pe diriz sa pei parey *US* i dir? Oubyen bann profesyonnel e bann dimoun ki tre konpetan, ki ou kapab kont lo la avek ou lavenir.

Mr Speaker, pou bann ki bezwen lasistans sosyal e envalidite, ozordi tou bann *weights* in ganny revize e zot pe

ganny plis larzan. Zot ki dan bezwen zot pa'n ganny kit ater.

Se sa ki nou apel progre. Se sa ki nou apel bonn gouvrenans. E se sa ki nou apel en Gouvernman ki responsab. Si pa *LDS* dir mwan lekel? E ladan menm, si ou otreman kapab e ou mars avek en bekir, siporter *US* i promet pou bat ou ek sa bekir si ou pa siport zot. Sey dir mwan, ki kalite sosyete zot le fer retournen?

En parti ki'n senm vyolans dan le pase, oprim son pep, napa respe pou drwa imen pa pou zanmen arete. Parey dikton i dir en leopard pa sanz son pwal. Mon asire ki Seselwa pa pou tonm dan sa latrap e Seselwa pa pou zanmen retourn an aryer.

Mr Speaker, lo kote pri lavi, Gouvernman in pran sa size o serye apre ki nou'n anmenn plizyer Mosyon dan Lasanble lo sa size. Nou Gouvernman in ekoute.

*STC* pe touzour rod meyer fason pou anmenn komodite debaz a en pri abordab. Avek *MRP* pou napa fason ki bann komodite de baz ki *STC* i enporte i ganny vann pli ser ki pri *STC*.

La mon le lans en lapel avek bann marsan ki dezonnnet, fodre dir ki pa tou ki dezonnnet. Pou zot respekte Lalwa e aret fer

profi larz lo nou pep. Donn Gouvernman en koudmen pou fer desann pri lavi. An menm tan pey zot *tax* parey zot devret. Sa zafer pa deklar profi pou zot pa pey *business tax* in ler pou Gouvernman met en lord serye ladan.

Si en biznes i fer fo deklarasyon Lalwa pinisyon i devret serye a en nivo ki zot a ganny fer en legzanp pou leres. I pa normal ki Gouvernman i pran tou responsabilite pou fer desann pri lavi e marsan senpleman li i ouver plizyer laboutik enn apre lot, e zanmen deklar profit.

Menm zistwar pou lotel. La ki *tourism arrival* in kas rikord, eski ou le dir mwan poudir zot pa pe fer profi menm? In plis ki ler pou zot konmans bers sa pei ki bers zot. Ed nou donn nou pep en meyer lavi.

Mr Speaker, an dizan tousala, i pa vedir ki tou keksoz in mars toutafe byen pandan sa 2an.

Malerezman in annan bokou trenn lipye dan servis piblik, ki nou tou nou rekonnet. Menm si Prezidan in fer bokou zefor pou re-ini sa pep anba moto “Sesel pou tou son zanfan” e demann tou dimoun pou met pei avan tou e bos dan menm direksyon.

In annan dimoun ki ankor pe kre bokou fristrasyon pou lezot dimoun dan servis piblik. Dan domenn lasante, mon lofis i ganny bokou konplent malgre laplipar travayer lasante i met tou zefor posib. Serten travayer pe fer sabotaz.

Alor mon le akerr lanons Minis Finans ki in fer, kot in dir ki dezormen pou annan en *Unit* pou etabli standar dan lasante. Tro souvan sa bann ki kre en pti lanpir e kontinyelman pe fer faver pou serten e anmenn pinisyon pou lezot, pe ganny les pase.

Lo lot kote, *overseas treatment* i annan bokou konplent lo sa diferan standar ki ganny aplike. Alor bann ki pa pe travay avek lonnekte, i bezwen *shape-up* oubyen donn plas lezot.

Mr Speaker, lo size proze anba vot Gouvernman Lokal dan mon distrik, mon eksprim mon dezapwentman, akoz sa 4 proze ki Lotorite Distrik in soumet byen boner sa lannen pa ankor ganny materialize.

Bann proze parey *bus shelters* ki nou’n demande ti pou soulaz en kantite bann dimoun ki vin esper bis dan lapli, dan soley ant *Boat House* ek *Savoy*.

Ler mon demann akoz ki sa bann proze pa ankor ganny

materialize, mon ganny dir ki i annan bokou retar kot *Planning*.

Mon le demann Lotorite Plan silvouple fer le neserer ki sa proze i kapab ganny materialize avan sa lannen i fini.

I pa akseptab pou proze Gouvernman pran tou sa kantite letan pou ganny konsidere, tandis ki proze prive i pas bokou pli vit. In plis ki ler pou annan en sistenm *fast track* ki ganny met an plas pou proze Gouvernman dan en fason i ava kre mwens fristrasyon.

Egalman Mr Speaker, proze redevlopman *Regatta site* i enn ki bann zabitan pe sivre de pre e pa pe war okenn lavansman. Malgre mon konnen i annan serten difikilte legal lo sa size, mon ti ava apresye si Gouvernman an traver Minis Finans i kapab konsider en Bidze dan le fitir pou en *Management Company* pou zer e akseler sa bann devlopman dan sa landrwa.

I senpleman annan tro bokou retar e dezord e sakenn pe fer sa ki anvi lo sa propriyete. Par kont, mon santi mon tre fyer ler mon get labote e lavansman sa proze pou konstri sa *climate mitigation wall* vizavi Restoran *Boat House*. Malgre o

komansman ti annan bokou kritik lo sa size.

Ozordi sa bann menm dimoun ki ti pe kritike, pe admir labote sa travay e zot pe menm annan lodas pou demande pou servi sa landrwa pou zot prop benefis.

Sa travay pou permet nou kontinyen sa *walkway* ziska laboutik kot Mr Mike Bamboche Mare Anglaise, parey ti'n ganny programmen. Sa pou permet bann zabitan e bann touris ganny plis sekirite lo sa morso semen ler zot servi.

Mr Speaker an terminan, mon ti ava kontan dir Minis Finans ki mon pou donn li mon siport pou merit sa Bidze nasyonal. Akoz mon vwar ki sa Bidze i enn ki'n anmenn bokou soulazman pou tou dimoun dan Sesel. I enn ki'n tous tou bann laspe devlopman dan pei e met Sesel lo en semen plis progre.

I enn ki'n donn lespwar tou zenn, tou bann zenes e kre lespas pou zot epanouir e fer zot kontribisyon dan pei.

Mr Speaker, ozordi napa rezon pou en zanfana pa pran son letid o serye. Gouvernman i donn li nouritir, *teachers*, lekol e bann program letid.

Sel keksoz ki Gouvernman pe demann li an retour se aprann, aprann e aprann. *The sky is the limit!* Vin sa dimoun

ki ou anvi vini. Nou fitir i depan lo zot.

Tou travayer Gouvernman i vwar zot ladan dan sa Bidze. Anplwayer sekter prive pou bezwen rod fason pou valoriz zefor zot travayer. La ki lekonomi pe performen, e zot pe fer plis biznes zot merit sivre legzanp ki Gouvernman pe donnen.

Mr Speaker, sa Bidze in osi tret sekirite nasyonal dan en fason tre aplike e konpreansiv. An rekonesan ki pa selman lord ek larme ki form sekirite nasyonal. En pei i pa an sekirite si enn son dimoun pa an sekirite.

Se pou sela ki sa Bidze in konsider tou form sekirite tel konman sekirite alimanter, sekirite lamarin, sekirite finansyel, sekirite ekonomik, sekirite lanvironnmental e sekirite lespas *internet*, ki trez enportan.

Alor avek sa Bidze ler mon pe gete i en Bidze ki bon dan son totalite.

Mr Speaker si pa *LDS* dir mwan lekel? Mon remerisi ou.

**(APPLAUSE)**

**MR SPEAKER**

Mersi Onorab. Mon a propoz zot en poz la, me selman mon pa ti ava kontan perdi sa lekonomi

letan ki nou'n fer, alor mon ava demann Madanm Clerk si nou kapab rezwenn i ava vin 4er mwen en kar. 3er 45. Tre byen, nou a pran poz.

**(BREAK)**

**MR SPEAKER**

Onorab Francois Adelaide ou annan laparol.

**HON FRANCOIS ADELAIDE**

Mersi Mr Speaker. Bonswar Mr Speaker, bonswar tou Manm Onorab e tou bann dimoun ki a lekout.

Mr Speaker, ozordi i ankor en lot kado, en lot benediksyon ki sakenn de nou lo later nou'n gannyen pou viv e fer en diferans dan nou lavi, lavi nou bann frer e ser, lavi nou kominote, lavi nou pei e lavi nou planet.

Mon oule premyerman remerisi nou kreater ki'n akord nou sa loportinite ankor sa sans pou fer e viv sa loportinite.

Mon oule remerisi tou bann zanmi Sesel ki'n asiste nou dan en fason ou en lot, pou soutenir nou lekonomi e nou pep, par bann kado materyel, lasistans finansyel menm bann led teknik bann konsey e gidans ki'n ed nou pou ariv kot nou ete ozordi.

Mon pli gran remersiman i al pour Lepep Seselwa, ki'n fer zot mye pou konpran, aziste, kontribye dan nenport ki fason pou ki Sesel ariv kot i ete ozordi. Mersi e mersi bokou.

Mon remersiman spesyal i al pou ou Minis Hassan avek tou ou lekip, ki'n travay tre dir e entelizaman. Menm dan bann kondisyon difisil pou ki lekonomi Sesel i reste stab e an bonn sante.

Mon kapab konpran zot bann dilenm parfwa pou balans bann pozisyon finansyel avek stratezi Gouvernman avek bezwen pei. Me sa ki mon osi konnen se ki ler ti'n ler pou pran bann bon desizyon, zot pa'n per pou met zot sapo profesyonnel. Zot in azir brav, konsyansye, balans tou risk dan en fason tre profesyonnel e zot in delivre.

Mon anvi an menm tan lo lapar mazorite zabitan Baie Lazare e 90 pousan Seselwa, ankor enn fwa salye zot pou sa, pou tou zot bann bon travay. Sirman zot in ede pou antre dan rikord Sesel koman sa lekip ki'n fer tou byen, pou asir nou stabilite finansyel pou ki Sesel i kontinyen devlope e progrese dan en fason byen kalkile.

Bokou bann program e proze kominoter ouswa kapital ki ti'n arete in kapab re demare.

Serten in fini e serten ankor pe kontinyen. Lavi pa'n fasil, me Gouvernman *LDS* in persevere.

Anmezir ki bann proze i terminen, byensir nou ava kontinyen koup riban e met li a laporte nou bann sitwayen.

Sa zafer koup riban i paret mwan pe donn dimoun latak. Kote ki fermal avek parti *US* ler en proze i fini e nou koup riban? Gele, plennyen, roul ater avek laraz. *LDS* pou kontinyen koup riban!

**(APPLAUSE)**

### **HON FRANCOIS ADELAIDE**

I reste 3an ankor pou nou kontinyen koup riban. Apre sa 3an, sirman Lepep Seselwa pou donn nou ankor 5an pou nou kontinyen koup riban. Apre 5an en lot 5an ankor. Oli problem?

Mr Speaker, mazorite Seselwa in pli entelizan ki bann politisyen parti *US*. E la zot stratezi se sey anbet bann trwazyenm-az ki mon konstate zot pa pou tro kapab. Nou bann sitwayen trwazyenm-az pe ganny zwe lo zot moral. En Gouvernman responsab pa zis vin donn larzan san en bon plan.

Zot ava dakor ki pou lemoman se bann dimoun ki leve desann pou al travay ki pe

sibir plis le konsekans. Pri bis swa met bennzin. Liniform swa lenz pou travay. Soulye, swa savat. Manze swa *take away*. Zanfán, *loan*, litilite e lezot det konpare avek en sitwayen aze.

O fir e amezir byensir nou bann sitwayen sinyor zot osi zot ava benefisyé. Politik larzan se politik popilis. Tou dimoun i met zorey apik ler nou tann nonm larzan, me koman en Gouvernman responsab, nou bezwen fer byen bann matematik pou ki nou kontinyen annan en lekonomi ki performan.

Vwala panse sa Gouvernman responsab e rezilyan. Konpare avek zot, ki irresponsab, malonnet e visye. Nou bann pansyoner *LDS*, zot entelizan e zot osi annan sa bon sans responsabilite. Zot pa pou manze sa labwet pou ki Lopoziyon pe donn zot.

I pa vedir ki nou'n met nou sitwayen aze dan en sityasyon de favorab. I toutafe korek pou soulaz sa group travayer ki pe pli ganny afekte e o fir e amezir keksoz i amelyore, la i ava tour bann pansyoner e lezot group ki dan bezwen pou benefisyé.

Mr Speaker, mon pa zis koze pou fer krwar ki mon entelizan, mon konn ekoute, analize, reflesir e byensir fer bann bon rezonnman pou

aksyon apropiye. Tou dimoun ki get mon bann aksyon e travay dir, otomatikman zot konnen ki mon *LDS*.

Konpare avek bann *MNA US* pares ki zis koze, fer tapaz, napa prensip, san bon rezonnman ki fer ki par ler zot prop ledan i asasin zot lalang. Swa lalang i pri dan zot pale apre tay kot *SBC* pou dir *LDS* pe anpes zot koze.

Mr Speaker, la mon pou zwen tou mon bann koleg Onorab pou solider avek nou koleg Naddy Zialor. Kontrerman avek sa ki *Leader* Lopoziyon i dir bomaten, si ou get sa size i en size spesyal.

Nou tou nou ganny takinen lo *Facebook*. Me Naddy i en dimoun ki otreman kapab e i bezwen nou led pou nou siport li. Pa aköz i mars lo bekir ki ou kapab pil lo li. E avek *LDS* napa person lo lot kote latab e ni zot siporter ki pou pil lo Naddy!

**(APPLAUSE)**

**HON FRANCOIS ADELAIDE**

Koman en Gouvernman responsab, i nou devwar pou menm donn zot menm lot kote laba tou proteksyon pou zot pa detri zot lekor.

Zis gete ou menm Onorab Pillay, ou ti'n bliye ki ou siny

Pillay. Gran mersi Ras Ricky ek LDS tou sa letan pe sante e li i ti krwar i apel Sebastien “PNQ.”

*(laughter)*

**HON FRANCOIS ADELAIDE**

Aprè ki in anvole dan *jeep* prive, petet in met en lapay ki Onorab Aglae ti pe dir, i tay lo *stage* e dir se li ki siny “Pillay!” Tou sa letan i pa ti mazinèn ki son vre sinyatir sete “Pillay”.

Mr Speaker sa zafer LDS i ankoler avèk laplenn Anse Boileau i sirman en lot mansonz. Si laplenn ti kapab koze i ti pou dir li menm, ki in dezapwente. Me mansonz, politik laenn, parol san kalkile, sa wi ti annan. Menm kanmarad i riy kanmarad aprè ki nou fer bann prononsyasyon “*jeep* prive.”

Mr Speaker ankòr en lot mansonz par Onorab Ernesta lo size semen Dan Penpen. Preske 4an in dan Lasanble Nasyonal e sete mwan ki ti premye pou met presyon lo Gouvernman sortan, pou ki sa bann dimoun dan sa rezyon ganny akse avèk en pli bon semen.

***(APPLAUSE)***

**HON FRANCOIS ADELAIDE**

Mon pa ti pe rod vot, mon ti pe fer sa pou rod devlopman dan mon distrik.

Aprè disolisyon Lasanble an 2020 travay ti imedyatman konmense pou konstrir sa semen, akòz Komite Santral US ti konstate ki popilarite Onorab Ernesta ti dan problem. Deswit san okenn plan, san okenn konsiltasyon avèk distrik Baie Lazare semen Dan Penpen ti demare. Sa ki krwar mon pe manti al fer en visit pou zot menm. Kot zot ava trouv de gros dan milye semen.

Onorab Ernesta in kapab fer 2 *roundabout* dan Baie Lazare.

***(APPLAUSE)***

**HON FRANCOIS ADELAIDE**

Sa i laprev ki ti napa okenn plan. Kot montanny i vreman apik menm drenaz konvenab napa. Sa ki pli enteresan, pli gran parti semen i sitye dan Distrik Baie Lazare e bann dimoun dan sa rezyon i pli abitye servi servis dan Baie lazare.

Si vreman i ti pe devlop Takamaka, akòz ki ziska prezan sa bann bout later ki sitye dan distrik Takamaka pa ankòr ganny devlope? Ki ti pou sirman anmenn devlopman dan son distrik. *Well done* bann

dimoun Takamaka pou sa desizyon entelizan dan dernyen eleksyon!

**(APPLAUSE)**

**HON FRANCOIS ADELAIDE**

Onorab Ernesta ti nepli konnen kote son balizaz distrik ti pase. Dan plas fer semen Takamaka i vin fer Baie Lazare.

Mr Speaker, sa ki mannyer ou apele?

Ozordi, mon pa pou vin rod laglwar ouswa popilarite lo okenn proze ki mwan mon'n fer, e pou fer a lavenir pou mon distrik e pei an zeneral. Mon satisfaksyon i vin atraver zefor kontinyel pou kontinyen anmenn sa transformasyon e loportinite pou mon distrik, zabitan e pei an zeneral.

Mon sikse ek lakonplisman se pa mwan ki pour ziz-e. Parey mon kontan dir, akfer gat letan fer vantar pou eksplik mon lakonplisman e sikse? Kan tou sa bann keksoz in deza e pou kontinyen eksplik son lekor. *Qui vivra verra* Mr Speaker.

Mon napa problemm avek Onorab Ernesta mwan. Mon get li koman en koleg ki si i ganny gide, i kapab fer en gran diferans. Aret kontan kasyet deryer rido Onorab Ernesta. Annou mont lo *stage* annou rod

en tanbour moutya. Dan plas takin kanmarad nou tou lede nou a sante, "mon annan par ladan, mon annan par ladan, mon annan par ladan!"

**(APPLAUSE)**

**HON FRANCOIS ADELAIDE**

Mr Speaker dan tou sa manev pou anbet dimoun san ki zot in realize, zot in dir en keksoz ki vre. Sa Bidze i en Bidze larkansyel. Sa i vre. Totalman vre. Eski zot pa ti'n enform zot lekor lo ki siny larkansyel i reprezante?

Seselwa petet mon en pe bet, bet. Al fer zot resers e rod vre sinifikasyon en larkansyel. En siny lespwar parey mon koleg Loizeau in dir, ki finalman movetan in fini ale.

Sete sa siny ki Bondye ti anvoy pour Noah koman sa siny botan finalman in arive e deliz in pase. Lanmod Onorab Simon Gill, *Isn't that so beautiful* Mr Speaker? *So beautiful*.

**(APPLAUSE)**

**HON FRANCOIS ADELAIDE**

Bann Onorab dan sid was, annou lev nou standar koman bann *Leaders* nou distrik. Lontan manrmay anvil in asosye nou koman bann



dimoun sorti dan bwa ouswa dan zete. Kot nou ti ganny *bully* akoz landrwa ki nou ti sorti. Pa kontinyen fer nou tonm ba bann Onorab.

Ozordi transformasyon pe pran plas e dezormen nou fyer nou lidantite e nou fyer pou nou vin lanbasader nou distrik. Ler nou ganny sa sans pou ariv o-bor manrmay anvil, annou frot zepol avek zot. E fer zot tranble e fors zot pou devlop respe pou nou e menm montre zot ki nou osi bon ki zot.

Pran legzanp ki la devan nou Mr Speaker, Mr Hassan, Mr Valentin, *Minister* Devika, *Minister* Zialor, eksetera.

Bann zanfan dan leo, wi, me serye, responsab, travayan ki pe fer bann bon kontribisyon enportan pou nou pei. Vwala akoz nou zanfan dan leo ozordi nou annan tou rezon pou nou selebre. E nou pa pou les okenn katar derout nou lo nou semen prosperite.

**(APPLAUSE)**

**HON FRANCOIS ADELAIDE**

Mon mesaz pou bann *MNA* ki reste dan sid was i koumsa, annou met sa bar o pli o posib ki zanmen in deza arive. Kot i bon annou mont par lao politik partisan. Lenportans se nou

distrik e nou dimoun. Se pa parti politik *or Leaders* politik. Politisyen i ale vini me dinyite pa aste dan bazar.

Annou vreman vin bann dirizan ki nou zanfan e pep ava pran legzanp lo nou. Pou en pei normal kot prosperite ava kontinyen renye.

En lot largiman pa fonde M Speaker, se ki bennzin in desann fodre fer desann pri bis. Ankor en fwa, vreman sa Bidze in demont zot e paraliz abilite pou zot analize. E koz keksoz ki fer sans e relevan.

Ekoute zot nepli konn fer. O kontrer zot in vin parey bann *US* bann *unpleasant soul* ki bezwen moultou sa zot bann swadizan *Leaders* i bour dan zot labous. Zot lespri in anzandre dan senm propagann, koz mansonz. Zot sel bi se destabilize ouswa paraliz lekonomi Sesel. Oli sa bis *SPTC* ki ozordi pe roul avek bennzin?

Sa Bidze in vreman demont zot, alala zot deside lamars pou kontinyen senm propagann. Finalman, le 26 Novanm Sesel pou reviv ankor sa famez lezann “Lanperer Touni!”

Nanryen zot napa, lide zot napa, latolerans zot napa, lendirans zot napa. Sa i ganny konfirmen dan zot *battle cry*,

“Nou a pouse, nou a bouse, sey fer red, pou fer li monte!”

*(laughter)*

**(APPLAUSE)**

**HON FRANCOIS ADELAIDE**

Me solman ler mon pe gete zanmen zot pou monte.

Mr Speaker, kote dan Sesel nou ti pe mazinen pou war Dokter Herminie pe marse dan lavil? Kote nou pe mazinen pou war Onorab Minis pou marse dan lavil? Kote nou pe mazinen pou war Onorab Pillay pe marse dan lavil? Mr Speaker sa nou ti zis reve.

E ozordi nou fyer LDS in fer zot marse dan lavil!

*(laughter)*

**HON FRANCOIS ADELAIDE**

Pran kouraz marse *you want*, marse *you will get*. Fer sir zot annan ase lendirans ek pasyans akoz zot pou kontinyen marse pou bokou, bokou letan.

Mr Speaker sa Bidze in preski fini eksplik son lekor. Donn kredi kot i fodre. Wi Minis, ou lekup in fer mazik. Menm bann eksper pa ti pe espekte sa ki zot in vwar. Tou bann dimoun serye e responsab i reste ebete la fason ki Sesel in

rebondir dan sa lepok lensertitid mondyal.

Nou bann MNA LDS sak fwa nou ti zwenn Prezidan, Cabinet Minis e bann teknisyen, mon admet, wi nou pa ti tro bet pou vwar bann siny lenkyetid e lensertitid lo zot figir. Sa pei i sorti lwen, tre lwen!

E la mon oule osi profite pour remersi Prezidan Wavel Ramkalawan, Vis Prezidan Ahmed Afif, tou bann Minis ek zot tim. Mersi pou tou sa bann risk byen kalkile, bann desizyon brav e sipor ki zot in donn tou sa ki ti bezwen pou soutenir nou lekonomi.

Sa ki mon'n vremen apresye parmi tou sa tapaz, tou sa manev dekourazman, tou sa bann latitid *boycott*, tou sa bann latak personnel e bann lesey pou trenn nou bann lenstitisyon dan labou. Menm dan bann lezot lenstitisyon aletranze avek bi pou destabilize nou Gouvernman.

Egzekitiv in *rise above* dan tou sa bann manipilasyon. Zot pa'n ezit-e pou solider e siport zot bann koleg Minis ki ti pe ganny trennen dan bann latanta malisye, par bann PNQ sal e degoutan zis pou sey diviz zot.

Sa prensip “*as strong as its weakest link*” in parfetman

ganny demontre dan tou son solidarite. *“It always seems impossible until it’s done.”*

Vwala ki kalite *Leader* Ki LDS in elekte koman nou Prezidan Le 24 Oktob 2020 - Wavel John Charles Ramkalawan!

**(APPLAUSE)**

**HON FRANCOIS ADELAIDE**

E mwan mon konsey pou li avek son bann Minis *“let the dead bury the dead”*. LDS i bezwen kontinyen ver semen prosperite. Akoz ki Bondye in enspir Seselwa pou swazir li dan sa letan difisil pou diriz sa Nasyon? Mr Speaker, mon poz sa la.

*“No dream is too big, no dreamer too small, no challenge too great.”*

Parey nou premye Lim Nasyonal ti endike *“Seselwa fidel partou an avan”*.

Mr Speaker, sa Bidze i enn ki fransman dan mon lavi antye zanmen mon’n deza temwannyen.

Kot lanfaz pe ganny mete dan en fason pou ki Seselwa i reganny son dinyite, fyer son lidantite e reganny son lazwa de viv. Ki ti’n preski disparet parmi nou popilasyon.

Kot Seselwa pe ganny tou posibilite pou li epanouir, vin responsab, disiplin e konsyansye dan tou sa ki i fer e mazine sak fwa pou fer, fer li byen.

Kot Seselwa pe ganny ankouraze pou rebran son desten ankor enn fwa dan son prop lanmen. Kot Seselwa pe ganny ankouraze pou retourn dan sa realite lavi, ekoute pou ou menm, analize pou ou menm, eksperyanse pou ou menm. Viv pou ou menm e deside pou ou menm kwa ki bon pou ou.

Tro bokou letan mazorite Seselwa in ganny forse anferm son lespri, restrikte zot panse atraver bann retorik diktater, revanz, malisye avek bi *divide and rule* sa Nasyon.

Kot tou desizyon ti ganny fer pran par en sel dimoun *State House* e ganny andoktrinen dan nou latet. Enzekte dan nou sistenm, menm ganny forse dan nou lagorz par bann swadizan dirizan swa aktivis. Zis parey bann Manm lo lot kote latab.

Mr Speaker repons dan lakoler, byensir pe kontinyelman demaske zot vre lentansyon. Eski i mal pou en dimoun viv ek en *loan*? Mwan mon pe pey *loan*, mon pa pe konplent. Bokou nou, nou pe pey *loan*. Ki annan ki mal avek

sa? Eski zot ankor krwar dan *FA4JR*?

Kot lekonomi en pei ti'n ganny defrise e sa ki pli tris mazorite ki'n kontribye pa'n benefisyè. Me serten biznes ki'n kale, pa'n deklar zot *tax* vin premye pou naze e abiz lo lasyer bann larzan *tax payers*.

Si zot konsider sa byen e sant leloz dan zot *rally* par servi zenes ki pli feb pou vin eksplik *FA4JR*. Sirman sete en labi lo kapasite entelektyel lo en zenn, ki menm pa'n ganny sans pou li vwar sa rapor pou li menm.

Bann labi terib ki'n preski faid en pei e met son lavenir dan lensertitid. Dir mwan, eski zot annan en leker imen? Eski zot konsyans pa sarze pou kasyet sa pep laverite?

Eski koman bann *MNA* ki pe ganny sa sans pou reprezant zot piblik, pa santi ki enn fwa sa lannen sa pep i merit byen enstrir lo laverite ki sa Bidze i annan?

Ozordi nek zot konplent akoz dimoun i vin kot zot lofis pou vin rod lasistans. Be pa ti zot fason elve dimoun avek prensip *from cradle to the grave*?

Eski se pa zot menm ki ti ankouraz dimoun pou depan lo *welfare*, pa al travay, *spy* lo debrouyer, anrezistre lo *Scheme*

Ek nou pa ek nou" konsider zot koman vilnerab.

Mr Speaker, sa Bidze sirman in paraliz zot e demantibil zot. E ler *US* pe fer politik regresyon, *LDS* nou kontinyen akseler-e. Sa ki vwar nou pe debrouye, byensir zot satisfè.

Mr Speaker, atraver sa 3 zour deba, byensir Seselwa menm bann dimoun dan nou bann pei vwazen e atraver lemonn, zot pe kapab vwar ki parti *US* i ankor enfekte e pri dan sa lesklavaz mantal ki pe kit zot dan sa leta dezoryante e dezespere.

Atraver sa bann fo rimer, propagann, e retorik iresponsab, mon reste konfidan. Konfidan aköz? Seselwa atraver tou sa bann manipilasyon ki zot in gannyen, zot in devlop sa sans responsabilite. Atraver sa bann manipilasyon e senm lafreyer, Seselwa in devlop sa sans Rezilyans. "Plito lanmor ki viv dan lesklavaz."

Atraver sa bann mansonz, Seselwa in devlop sa abilite pou reflesir otreman. Seselwa in vin en nasyon entelizan, proaktiv, ki annan tou son pasyans pou ekout zot. Fer krwar zot bet pou kapab konpran zot e menm balans zot.

Get rezilta dernyen eleksyon, kot menm apre pres pou faid en pei pou ganny eleksyon, Seselwa ti demantibil zot bout par bout, distrik par distrik. Prezidansyel menm Lasanble Nasyonal.

E 2025 avek sa kalite latitud kantmenm zot pe kriye “Port Glaud pa seye”, mon trouve ki zot Onorab i dan leral. Ni *canabi oil*, ni lapay pa pou resisit li.

Mr Speaker, ki nou annan pou Baie Lazare dan sa Bidze? Baie Lazare konmela partou kot ou pase malen ek lentelizans i remarkab e aparan dan mazorite lakour. Nou pou akey zot byen, donn zou tou sa lospitalite, me tasyon, vwala sa transformasyon ki’n arive e pe arive dan Baie Lazare.

Me mon mesaz pou le moman se Baie Lazare *LDS* i ankor for e vreman tre for! So, zot kapab vini me solman fer zot byen atansyon.

Mr Speaker pou Baie Lazare mon konnen letan pe fini, me in enportan pou mwan dir zot detrwa pti keksoz ki nou annan. Nou annan apepre 5 kare later dan Baie Lazare pou nou met a dispozisyon nou zabitan pou anmenn plis servis dan nou distrik. Pa ezit-e apros distrik e nou ava met keksoz ater.

Minis atraver ou Mr Speaker, pa bliye pou ede akseler sa prosedir pou rebran tou sa bann later *US* pou remet a la porte distrik pou devlopman.

Baie Lazare nou annan en gran kare e nou pe espere pou met li a la porte zabitan pou devlopman. Sitwayen Baie Lazare sirtou bann *ex-Pool*, Anse Gaulette dan plato pou tre prosennman benefisy e avek en *system sewage treatment plant* ki an se moman i dan prosedir *tender*.

Sa pou sirman ed bann zabitan ki ganny problem desarz dan sa rezyon. Mersi pou zot pasyans, proze pou ganny demare tre byento.

Nou annan R1milyon pou dezyenm faz lagrandisman semen Val Den Dor.

R9milyon pou konstriksyon Sant Lasante Baie Lazare.

R269mil pou premye faz reabilitasyon Anse Gaulette. Ankor R3.3milyon pou dezyenm faz reabilitasyon sa menm lakot.

La mon pe lans en lapel avek kominote pou nou pran nou responsabilite e respekte sa landrwa.

R1.115milyon pou reparasyon lakres Baie Lazare.

R9milyon konstriksyon Lekol Lagrikiltir ek Ortikiltir.

R19.5milyon pou dezyenm faz konstriksyon pou konpri 16 *unit* lakaz Anse Poules Bleues kontinyasyon *ex* Hunt.

R43.7milyon pou konstriksyon 32 *housing unit* Dame Le Roi. Pa bliye ki nou annan pre 100 ekek lakaz pou nou fer Baie Lazare. Zis pou azoute ki i annan en program parey mon'n dir, pou akseler proze lakaz dan nou distrik.

Plis ki R700mil pou fer bann pti proze distrik. Distrik osi pe met lanfaz lo konstriksyon bann *bus shelters* kot bann zabitan e viziter ava pli konfortab ler zot pe akse servis transpor dan nou distrik.

Mr Speaker sa ki pe pas Baie Lazare zot pou trouve poudir i annan en proze ki'n demare. E sa se *West Coast Development Project*.

Mr Speaker depi ler nou'n pran Gouvernman nou'n akseler-e. Se pou sa ki zabitan ti swazir en zonm red. Avek en Prezidan ki sitan red. Apre tou sa letan finalman proze *West Coast Development* in komanse.

Mr Speaker Baie Lazare *is the place of great and tremendous opportunities*. Baie Lazare pou tre prosennman lans en lapel avek tou zabitan ki kapab e piblik an zeneral pou

kontribye dan en fon ki nou pou apel li *Baie Lazare Citizens Engagement Fund*.

Nou pe egalman kree en nouvo *NGO* kot bann zenn Baie Lazare en tim tre profesyonnel byen repite dan lasosyete pou zer sa fon. Pou ki nou ava kapab asiste nou bann dimoun tel ki etidyan, *sportsmen*, otreman kapab sitwayen aze eksetera.

Menm osi ede avek bann pti proze distrik pou kontinyen elev nivo nou distrik.

Nou bann zanfan Baie Lazare ki'n ganny berse dan sa zoli distrik. Ki'n ganny ledikasyon dan nou distrik. Ki'n ganny lentelizans e aprann kondwir lavi dan Baie Lazare. Ki'n ganny tou sa loportinite ki nou gran paran in reserve pou nou.

Kot nou leritaz in ganny tou sa proteksyon e ozordi nou pe zwir sa larsiv vivan. Le moman in arive pou nou met lanmen ansanm, e ede mannyer nou kapab pou kontinyen prezerv nou leritaz pou fitir nou zenerasyon.

Pa toultan mazine ki ou distrik i kapab fer pou ou, me ou koman en zabitan ouswa en zanmi Baie lazare tou kou mazine ki ou kapab fer pou Baie Lazare.

Finalman, mon oule remerci tou bann *Leaders* avek tou bann lekip dan distrik Baie Lazare. Tou zabitan e osi tou bann zanmi Baie Lazare, mon *DA Fatima Marie*. Mon *clerk Juliette Esparon*. *Head Teacher Baie Lazare Ms Monthly*, Per *Laparwas Per Yves*. E tou bann delegasyon ki pe ede pou met Baie Lazare lo sa pli o nivo.

Esperon ki nou kontinyen met lanmen ansanm pou fer nou distrik kontinyen briye.

Ozordi Sesel ou lib. 2025 byensir pou bezwen annan eleksyon. Bokou dimoun pe dir ki pa fodre fer eleksyon aköz sa Gouvernman pe travay. I kler ki zot manda i garanti ankor pour 15an. Me Mr Speaker, koman en parti ki responsab, nou dir non.

Nou en parti respektab e responsab, byensir nou pou kontinyen respekté tou kad ki permet nou Nasyon avanse. Si Seselwa i vwar ki nou'n mal travay, zot ava deside. Si zot krwar nou'n byen travay gard nou. Osi senp ki sa.

Nou'n fer nou mye. Nou reste angaze pou fer pli byen. Nou, nou krwar dan les dimoun ekoute, analize e deside. Ou Lepase i deryer ou. Ou rev i la avek ou. Ou lavenir i devan ou. Ou desten i dan ou lanmen.

Nou'n debrouye par edik nou pep lo en politik Laverite, Rekonsilyasyon e Linite Nasyonal, kot tou bann douler, sagrafasyon, laenn e vanzans i sorti dan nou pep. Nou'n tenir nou prensip kot Sesel i kontinyen annan loportinite pou tou son zanfán responsab san bezwen get ou kouler politik, relizyon e rasyal.

En lekonomi kot ou annan par ladan e ou sirman erit sa ki ou merite. Nou pe kree bann lenstitisyon kot tou zanfán Sesel ki bezwen bann program e swen reabilitasyon i ava kapab geri e kontribye dan devlopman son pei.

Nou pe met lanfaz lo en Lafors Lapolis ki vin bann zanmi lakominote kot nou tou nou ava annan respe pou kanmarad. E fer ki dan nou pei i ava stabilite politik, ekonomik ek sosyal e nou pei i ava kontinyen bouz devan.

Nou bezwen tou lokazyon donn nou pep sa bann bon lenformasyon. Nou lapriyer i reste parey. Laverite pou liber ou.

Mr Speaker koman en Manm *LDS* mon dir "*Lord deliver Seychelles!*" E koman bann zanfán ki pe met nou zefor e nou lavi o servis son pei. Nou dir for dan en sel lavwa, "Nou

pa pou zanmen les tonbe Sesel!”

Mersi Mr Speaker.

**(APPLAUSE)**

**MR SPEAKER**

Mersi Onorab. Onorab Sandy Arissol ou annan laparol.

**HON SANDY ARISSOL**

Mersi Mr Speaker. Mr Speaker, nou 2 *Leaders* dan Lasanble Nasyonal, Minis, manm Sekretarya, tou bann Manm Lasanble Nasyonal, tou dimoun ki pe ekout nou. Sa Seselwa isi swa ou ki reste aletranze mon dir zot tou Bonswar.

Mr Speaker Sandy John Arissol ti ne le 8 Me 1977 Lopital Sesel. Sorti dan en fanmir 6 zanfan, Sandy li menm, Betty Boodna ne Arissol. Son gran ser Amanda Volcere ne Arissol, Ted ek Marcus Arissol e nou defen frer Sevyenn Arissol.

Grandi dan en fanmir senp, travayan e onnet. Paran Jean-Baptiste Arissol e son madanm Nancy Arissol ne Uzice. 45an maryaz le 22 Novanm sa lannen.

Papa ek manman ti de dimoun serye e ti debourye pou zot lakour e fer grandi zot 6 zanfan. Papa ti en mason par profesyon e manman ti en

*waitress* kalifye *Seychelles Hotel* sa letan. Pandan letan ki nou ti pe grandi nou papa ti konstate ki larzan ki pe vin dan lakour pa ti ase, alor i ti kite kot *Seybrew* apre 22an servis, pou li fer bokou plis par anploy lo li menm.

Manman ki ti pe travay de *shift* ti arete travay lotel akoz i ti bezwen pas plis letan avek nou ki ti pe grandi e pou ed nou avek nou lesen. E pou sa nou dir zot mersi e nou kontan zot bokou letan ki zot ankor vivan pou sa ki zot in fer pou nou.

Nou koman zanfan nou ti obeisan, edan kot lakour e fer sir nou fer nou paran fyer, menm ti annan lezot fleo sa letan. Zot in reisi fer nou tou grandi, menm si zot pa ti ganny gran larzan sa letan.

Gran frer ti okip pti frer e gran ser ti fer parey. Nou ti partaz sa ki nou ti annan e aksepte sa ki nou paran pa ti kapab donn nou dan sa letan. Ozordi nou tou nou'n gran sakenn son fanmir, sakenn son fwaye e nou ankor pe travay pou sonny nou prop fanmir e kontinyen okip nou zoli paran.

Nou pa'n met zot kazern, nou pa'n met zot *Old People's Home* e nou ankor pe pran ka avek zot akoz nou kontan zot. E mon konnen ki annan plizyer Seselwa ki'n fer egzaktaman



sa;- okip zot lakour, sonny zot zanfan e travay pou zot ganny sa ki zot anvi dan lavi.

Mr Speaker mon'n konmans koumsa akoz ou a krwar si ou bezwen al travay ozordi dan sa pei i en krim! Si Seselwa pe trimouse ozordi i en pese! Ou a krwar depi 2020 ki Seselwa in konmans travay dan sa pei.

E ki Seselwa pe soufer. Ki marsandiz in ogmante ki napa in vin en komodite lo letazer *STC*. Tousala fek debarke 2020. Sa zafer travay pou *US* pa dir zot sa, desann kot biro brans vin sers en pti lanvlop, desann kot Sosyal, sa ki zot oule! Vre letan botan in fini, bonit nepli morde dan lesplanad. Ou bezwen al deryer Saint Anne prezan. *Ce qui vivra verra*.

Zoli deliberasyon lo repons Bidze, se zot deliberasyon lo repons Bidze Mr Speaker. Se zis pou zot sey *distort* tou lenformasyon. Fer krwar Anse Boileau ti en sikse kan ti en gaf dan li menm!

*Advert* lo televizyon sete montre nou ki mannyer pou ranpli en tren. Ler zot tren pa'n zanmen arive, soudan *rally* in sipoze vin en *rally* rezyonal prezan. E zot in *fail!*

Pou zot pa dekouraz sa dernyen pti group dimoun ki ti vini, zot ankouraz dimoun pou

desann lamars. Sa voyaz pou vin en manman lamars ki tou lamars.

Sa pou swadizan fatig *LDS. Fail, fail e ankor failure!* Letan zot pe desann pou lamars nou anvi dir avek zot annan kouraz dir bonzour msye madanm e debout en kou dan eleksyon, zot ava vin en vre *Leader* dan nou pei.

Zot lenformasyon se konfiz bann ki anvi ganny konfize, me pa'n marse. Zot in pran zis nerve, lakoler ler zot in ekout nou. E i reste ankor 2an edmi parey Onorab Adelaide in dir pou zot ganny kadik, avan nou met zot dan bin listwar!

Mr Speaker sa detrwa dernyen lannen pei in fer plizyer listwar; Premyerman nou'n defet *US* dan dernyen eleksyon. Byento dan bin listwar.

Dezyenmman zot in selebre lafet de mor de repriz. Le 2 Novanm ki ofisyel e zot in fer li ankor le 6 Novanm. Ki zot menm zot, zot in kree sa voyaz.

Trwazyenmman zot in sez kasyet zot lekor par sanz zot non, a plizyer fwa. Menm lo *stage* i annan sanzman konmela. Konmela dan zot *rally* konpare ek lontan ou war, planter, fimer, aboyer ek drayver manze koson.

Zot swazir en non zot al kot *Civil Status* ek zot marenn

ek zot paren pou al deklar zot piti. Ler non in ganny anrezistre i ganny kart idantite, ler ou kriy piti par son non fanmir zot ofanse zot gonfle, zot ronfle, zot ganny lopresyon.

Nou ava rapel Mr Speaker, nou ava apel zot prezan Parti Pa Nonmen. Akoz si nou apel zot, zot non ki zot in deklare zot tou zot ganny lopresyon. Selman zot anvi eleksyon pou zot retourn *State House*. Zot in dizourd Lasanble avan son ler, ganny defet dan dernyen eleksyon, la zot sitan lafen pou retourn *State House*. Sel landrwa ki zot pou retournen se dan sa menm non ki zot in deklar Zot lekor kot *Civil Status!*

Letan zot ankor pe anter zot parti, Prezidan John Charles Ramkalawan, sa zonm ki sa pti poursantaz pa oule, sa zonm ki zanmen dapre zot Boul Kristal pa ti pou zanmen war *State House*. E zot ti dir e zot ti sante “personn pa pou sanz sa vye rezim bannann pouri!”

Sa zonm ki’n met Sesel lo en direksyon kler, redress nou lekonomi, remet divan anba lezel nou pep, asir en saler, gratwite, 13enm mwan, sekirite, pansyon, *allowance* e tou lezot benefis en travayer e asire ki Sesel i retourn lo bon semen.

Prezidan Ramkalawan nou lo sa kote latab ek Lepep Seselwa, nou anvi dir ou mersi bokou ek tou bann Minis ...

**(APPLAUSE)**

**HON SANDY ARISSOL**

... dan bann Minister ki pe asire, mon repete, ki pe asire ki Sesel i reste pou tou son zanfani!

Ankor enn fwa mersi bokou pou sa travay ekselan pandan sa 2an ki nou’n pran nou pei ek bann triker, fimer, atoufer ek en bann planter ek drayver manze koson.

Mr Speaker nou dan *LDS* nou annan tou rezon pou nou selebre ozordi. E pou sa nou felisit nou Gouvernman atraver nou Minis Finans ki asiz la devan ki’n prezant Bidze pei. Prezant bann sikse - mon repete bann sikse, zis pandan 2an konpare avek 43an trou partou kote.

Nou’n fer rikord koman en Gouvernman Mr Speaker, e nou’n annan tou rezon pou nou selebre, ankor enn fwa. Kestyon ki nou bezwen demande, akoz se Minis Hassan ki’n prezant Bidze avek Lasanble Nasyonal?

Rezon i senp, *SPPF* oubyen sa Parti Pa Nonmen in ganny defet dan dernyen

eleksyon, e zot ankor pe pran e asimil sa sok. E se Lepep Seselwa ki'n donn nou sa manda pou servi Lepep Seselwa.

E se sa ki Gouvernman Prezidan Ramkalawan pe fer delivre, delivre, e delivre! *US* zot ki zot pe fer, kale, kale, e kale ziska zot vin - dimoun i konnen.

Si pei pa ti sanze Seselwa ti pou mor an trwa manner, mor par laswaf, mor par lafen, swa devore par bann grenwir zot menm. Seselwa ti annan en swa ant parti *US* ek parti *LDS* le 24 Oktob 2020.

Ki swa ki zot ti annan? En parti ki ti apel son lekor *United Seychelles* sa letan, zot moto sete "*Together!*" Konmdi Onorab Gill. Kontrer oli li Onorab Gill mon pa ti war li lo *stage*?

"Koste pou Sesel", en parti iresponsab ki ti pe vann nou paspor ek zot bann dalon kriminel, vann nou later antre zot. E zot ti tonm dakor zot tou lo lot kote latab ki laz pansyon pou monte 65an.

Sa ti ganny anonse par zot Prezidan, e si zot ti dakor e zot tou zot ti dakor. Personn pa ti desann lo semen sa letan Mr Speaker!

Ler pri bis ti ogmante personn pa ti desann dan semen. Selman zot sorti Sesel al

tir petar Moris apre ki zot ti pas Bidze dan en demi zournen, pran bis R22 Moris, pran bis R33 Moris, pran bis R44 Moris pou zot al Rose Hill al lafwar *Quatre Bornes* e al *Curepipe*. Sa i *ok* pou zot peye. La isi zot dir ek dimoun desann pou fer lamars.

Donn tou kontra zot dalon ek fanmir. Donn bal dan larzan Fon Pansyon, larzan Sekirite Sosyal, e pa bliy sa fame "*larzan forgo*" ki ti antre dan en laport sorti par lot kote laport. E ozordi i ganny lodas vin donn nou leson manner nou bann Minis pe konport zot.

Bal dan simityer; sak fwa eleksyon *write-off loan* lakaz, e *CEO* i monte i sey vin eksplike, *fridge*, *cooker* bato i monte La Digue; partaz dibwa ek tol, apre les bann *Irish* vol zot dan gran kler degre zot ti en Parti Trou Kler.

Bal dan *SBFA*: Get ser, frer get kouzin pe pran pou li, tantin in ganny ankor, tonton i monte i desann e osi dimoun, pa bliye dimoun ki ti'n mor ki pa egziste lo rezis voter ti pe ganny *loan* kot *SBFA*! Non, be zot *what* zot *State House 2025*? Mon manman mon pa war zot!

Mr Speaker, menm pti fir madanm Rose ti ganny *loan* zanmen in peye, akoz i ti annan

kontak avek Papa Disik sa letan!

*(laughter)*

**HON SANDY ARISSOL**

Menm torti madanm Marie-Joleen in benefisyek larzan pou ganny en nouvo park. Sa ou ava *tell me* anba US!

Vann nou pou 2 boutey *whiskey*. Si zot pa ti iresponsab nou ti avar ganny larzan zisteman pou nou donn *payback* ki zot pe rode, ki zot ti pe reve; donn tou dimoun aze en logmantasyon, donn tou travayer dan sekter prive en logmantasyon.

Aste bis pou sak distrik pou ki personn pa pey tiket bis; Papa Disik avar finalman ganny son *jeep* prive. Zot fer riye bann Parti Pa Nonmen. E deplis zot anviretoun *State House*. Nou pa war zot Mr Speaker!

Sa menm parti politik ki letan ou napa menm pwennvi avek zot, zot anviretoun ou. Zet ou par lafnet pou pa ganny tolere ankor dan sa pei Mr Speaker! Mwan lo mon kote tou mon bann Manm nou pe *stand strong* avek nou frer Onorab Naddy Zialor!

***(APPLAUSE)***

**HON SANDY ARISSOL**

E mon siport Onorab Georges e demann zot pou disosye zot avek sa kalite menas ki'n ganny fer lo Onorab Naddy.

Li koman en imen i annan son pwennvi lo Bidze prezante par Minis Finans. Koman en Seselwa e i pa ti demande pou li ne dan sa fason. Nou swet li tou kouraz nou frer Naddy. Zot anviretoun *State House* pou zot refer vyolans dan nou pei. Sa ki zot anviretoun Mr Speaker.

E ki sa parti politik ki anviretoun o pouvwar? Se zot ki anviretoun o pouvwar? Mon manman nou pa war zot!

Sa menm parti ki responsab pou fer disparet nou frer ek nou ser. Fer soufer nou bann ser. Viktimiz nou zanfan e entimid nou bann dimoun aze. Sa menm group dimoun ki rebatize e apel zot lekor Parti Pa Nonmen. E zot oule reganny pouvwar. Dan zot rev sa Mr Speaker!

Me Seselwa in met zot dan bin listwar, pa pou war drol si zot pa vot lo nou Bidze prezante par Minis Hassan. Zot in sey lager pou montre zot lafors par fors *Tinky Winky* sou pou desann anviretoun fer krwar i pe mor lafen. Pa'n marse.

Bidze in fer kler ki tou sa ki bezwen lasistans pou gannyen, e pe gannyen

R61.8milyon nou Gouvernman in garanti fodre get dan binok sa? Eski lasos tomat sa Onorab Uranie?

Mr Speaker, si *LDS* pa ti sov Sesel and 2020 Seselwa ti pou mor an trwa manner;- mor par laswaf, mor par lafen, swa ganny devore par bann lera zot menm. Fors Seselwa pou kriy napa lanplwa. Ozordi tou sa ki anvi travay dan nou pei pe travay. E tou zot benefis anba sa Bidze i garanti. Alor mon pe demann tou Seselwa ki'n leve e pe travay, pou zot pran tou sa ki pou zot Mr Speaker koman bann travayer. E servi li byen.

Re pey zot *loan*, sonny zot zanfan, soutenir zot lakour, okip zot lasante anmezir laz i monte. Sa Bidze ki *LDS* i garanti ozordi prezante par nou Minis Finans ki la devan nou.

Travayer dan prive pa'n ganny kit ater zot. Tou travayer ki swa dan prive swa piblik ki ganny en saler pli ba ki 8500 pe ganny en lasistans finansyel tanporer R500.

Si ou dan sekter prive ou reveni i mwens ki R9 mil ek en *Bill* ki lo ou non, ou pe ganny en sipor adisyonnal R300 lo zot *Bill* elektrisite.

Menm ou travay dan sekter prive ou zanfan i benefisye ek en goute ek dezennen pou nanryen. *Wifi*

pou nanryen pou son leson. E sa i redwir en kou an plis lo sa paran Mr Speaker.

Letan Gouvernman ti entrodwi *maximum retail price* lo 14 komodite pou asire ki pri pa sanze lo Mahe, Praslin ek La Digue, sa dimoun dan prive li i pa pou benefisye li? E sa i aplik pou tou zabitan Bel Ombre. Eski lasos tomat Onorab Ernesta? Swa bann plan konkret en Gouvernman serye ki kapab ganny pran desizyon e pe pran desizyon Mr Speaker?

Zot in sey fors bann zanfan pou mor lafen akoz swadizan zot napa goute. Parti Pa Nonmen in *fail!* Papa Disik in donn goute ek son stiker lo la, apre rod rezon pou pa donner, napa. ki rezon? Napa transpor.

Transpor pou anmenn manze koson kot li ti annan! Degre zanfan ti sitan lafen dapre Onorab Loze, zot ti rod rezon pou zot pa kontinyen. Gro goute donn sa goute!

Sa Bidze i fer provizyon ki tou zanfan dan lekol Leta i garanti en goute ek dezennen, *plus* zot ganny *Wifi* ankor pou konekte ek lezot, e pou zot kapab fer zot leson. E pou pli konsantre dan zot letid. *Data* dan *Tata*, Norma zanmen in gannyen!

Me Gouvernman *LDS* in garanti tou zanfan enkli zanfan

Bel Ombre goute ek dezennen. *LDS* i en Gouvernman ki pe delivre pou son pep.

R20milyon in ganny *allocate* dan Bidze pou bann *US* vote Mr Speaker. Zot in sey fors Seselwa pou pa pran vaksen pa'n marse menm.

Ti dir vaksen pa tro lo standar, *WHO*, bann profesyonnel lasante ti pe ganny entimide an dizan ki zot pe ganny forse pou administre sa vaksen. Vaksen selman parey nou konnen pa donn lavi eternal li Onorab Loze atraver ou Mr Speaker. Me i protez ou o mwen.

Mon dir merci lo non zabitan Bel Ombre pou sa vaksen. Si nou ti'n ekout zot kote pei ti pou ete ozordi Mr Speaker. Mon mazine dan sa menm labou kot zot ti ete Anse Boileau.

Sa ki enteresan Mr Speaker sa ki'n tret Seselwa koman koson denn, pa'n zanmen fer letour *cone* li. Oubyen fer legzanmen pou li ganny son lasante. In pas devan tou dimoun e in al aletranze.

Kestyon ki nou devret demande, konbyen ti koute pou son tretman li? Zot pa koz lo la sa enn? Les mwan dir merci lo son plas Mr Speaker pou sa bon swen ki nou Gouvernman in

akord li pou li kapab pa pas dan *cone*,

**(APPLAUSE)**

**HON SANDY ARISSOL**

... oubyen pou li pa met laliny, oubyen fer legzanmen pou li ganny son tretman medikal.

Olye dir merci i vini sant nou patati patata! Sanmenm sa ki Onorab Ernesta ti pe dir engra. Sanmenm sa engra sa!

Pa rekonesan olye dir merci montre lapresyasyon vin koz lo sa ki benefis in gannyen, si zot santi ki bann benefis ki zot gannyen Mr Speaker ki Onorab Loze in koz lo la bomaten i ilegal, i annan senp pa pran, oubyen anmenn en *case* Ankour, oubyen fer en lamars. Me pa vin zwe senpatik, apre ou pas par dernyen ou pran tou sa ki pou ou trankil Onorab Loze. Atraver ou Mr Speaker.

Oubyen nou ti pou parey Lanperer Nero ek son lakordeon. Ennler zot dir gitar, ennler zot dir tanbour Dan Matata anler Pointe Larue. Sa menm Lanperer ki'n vini e demande akoz Minis in al soufle dan biro?

Be sa ki Lanperer i devret konnen se dan son distrik i annan enn son Minis ki ti touy en zabitan. Be kote i ti al soufle

li sa Minis? Mr Speaker i pa pou konnen akoz sa letan i ti ankor dan *SNP* li.

Me par kont *LDS* i kontinyen met lanfaz lo lasante son pep, plis larzan pou latizann, tretman dyaliz, materyo medikal, manze pou tou pasyan, tretman medikal spesyalize parey nou'n donn en Onorab. Konstriksyon diferan lenfrastruktir, konstriksyon nouvo sant lasante, kontinyasyon proze Lopital La Digue Mr Speaker.

Felisitasyon tou Digwa e felisitasyon Mr Loncy Micock kontinyen fer zot travay lo sa zil.

**(APPLAUSE)**

### **HON SANDY ARISSOL**

Ziska ou nennen i fatig Onorab Uranie. Finalman apre ki zot bann *Leaders SPPF* ti al vakans lo La Digue parey zot *MNA* Onorab Uranie ti *remind* nou Mr Speaker, in fer nou rapel, tou keksoz ti ganny inyore pou bann Digwa. Gran mersi Prezidan Ramkalawan, La Digue pe ganny son vre souf ozordi. Prezan ou ganny Onorab Uranie Mr Speaker ki vini ek en pti lavwa feb, feb e i apel son lekore en Bonnonm Presyon, e i dir nou in met presyon.

“Gran mersi mon'n met presyon.” Ki presyon ki in mete? Sel keksoz ki in fer se fors Digwa e met presyon lo zot pou siny en petisyon! Sel presyon ki in mete. Me pa'n met okenn presyon lo nou Gouvernman, parske Lopital pe fer e Lopital pou ouver e nou pou koup ankor riban!

**(APPLAUSE)**

### **HON SANDY ARISSOL**

Si larzan in antre dan lekonomi pe fer byen i senp Mr Speaker, se gras a Prezidan Ramkalawan ek Minis Finans zot in byen travay. Eski nou'n dekouver sa min lor Dan Penpen ki Onorab Ernesta ti'n antere, e ki'n soudennman nou'n war li?

Non Mr Speaker, travay dir en Prezidan ek son Gouvernman. Prezan al dir e zot ava esper mwan ek son bekir deor laport.

Pep in vaksinen Mr Speaker. *Airport* re ouver menm si Parti Pa Nonmen ti kriye byen for “ferm *Airport!*” Riy nou ki zot ti oule zot! Be pa'n marse Mr Speaker. Sel rekour se fer lamars le 26. Lamars, manman tou lamars.

Touris kas rikord dan Sesel, bato krwazyer pe debord

por. Non, be lasos tomat sa eksplik mon lasos zonnyon sa?

Non Mr Speaker siksesyon en Gouvernman serye, responsab. Gouvernman ki pran desizyon, sel opsyon pou Sesel a lavenir se parti *LDS!* Sa transformasyon ki Seselwa ti vote an 2020.

Seselwa pa ti vot pou parti lasos tomat li. Eski Parti Pa Nonmen i ankor konfize? Akoz Sesel pe fer sitan byen? Sa osi i konfiz zot. Ler nou fer byen i konfiz zot. Sel konfizyon ki i annan se zot in elekte, zot in ganny elekte lo tiket Mr Danny Faure avek Mr Loustau-Lalanne - 'Koste pou Sesel'. Me tou lede in ganny kit ater! Mon pa war zot Mr Speaker. Oli sa "Koste Seselwa"? Kote i ete sa 2 dirizan la, ki zot in elekte zot tou lo la lo lot kote latab?

Ozordi sa parti ki pli konfize e divize, ni Sekreter Zeneral zot napa. Ni trezorye mon tande in sote, zot napa menm! Seselwa pa pou vote pou Papa Disik, sa konfizyon ek dekoneksyon ki Onorab Vidot ti pe koz lo la Mr Speaker. Zot in vol konfyans e pa rekonesan.

Sel konfizyon se ki sa detrwa siporter ankor pe met triko "Tenir For", "Tenir Pa Large", e "Mon Kontan Lepep". Demann Vicky i ava dir zot.

Onorab Lemiel Mr Speaker in montre sa tre kler, ler in felisit omwen Prezidan Mr Faure. I pa'n koz oubyen felisit personn pou al dan labou Anse Boileau li. Mon'n ekout li depi komansman ziskan finisyon. E pou fini ou konnen ki in dir Mr Speaker, i remersye tou son zabitan, me pa'n ankouraz personn pou desann le 26 pou okenn lamars!

**(APPLAUSE)**

### **HON SANDY ARISSOL**

Sa i en konfizyon enorm sa. Me in osi dir ki ansyen Gouvernman Faure, pa Gouvernman Papa Disik ki in koz lo la li - Gouvernman Mr Faure ki'n konmans bann proze lakaz dan son distrik.

Be kestyon ki mon bezwen demande? Be si nou ti kennsel tou sa bann proze parey Onorab Wallace Mr Speaker atraver ou ti lord nou pou fer, ki mannyer nou ti pou termin sa bann proze, si nou ti'n ekout zot?

Oubyen si nou ti'n ekout Gouvernman "*village dan les nuages*" e kit *Airport* fermen. Me in osi rekonnnet ki dan Bidze i rekonnnet ki i annan proze dan Bidze. Savedir *LDS* pe delivre pou sa pei. Menm pa tou dimoun ki konsyan e aksepte.



Onorab Lemiel i refer sa remark.

Me sa ki *US* i devret mazine, letan nou pe delivre parey in ganny aksepte, se Gouvernman *US* ti promet Anse Royale pou vin en dezyenm lavil li. Mon krwar i annan 5an, 10an, 15an, 25 mon krwar in 43an pe esper lavil Anse Royale.

I annan lavil Anse Royale? Mon manman pa kapab get lavil Anse Royale! Sel garanti ki Onorab Lemiel in demann avek Minis Finans - mwan mon kapab donn en larepons lo son par, sel garanti pou *US* se nou pou donn zot en bon *shower* dan eleksyon 2025!

**(APPLAUSE)**

### **HON SANDY ARISSOL**

Sa konfizyon ek dekoneksyon ki egziste Onorab Vidot atraver ou Mr Speaker. Menm *burger*, lasos tomat ek labyer pa'n marse pou bann lenvitasyon ki zot ti anvoye. Zis pwak, pwak e ankor pwak.

Sel group dimoun ki'n ganny ase fristre se bann aktivis *US* ki ti vot pou Mr Danny Faure. Prezan zot war Papa Disik. Sa fristrasyon Onorab Aglae ki egziste.

Ou ki ti kriy byen for dan sa menm Lasanble, ou pou siport Pti Danny, oli ou lwayote

zot de Onorab Vidot Mr Speaker atraver ou? Oli zot lwayote anver Mr Faure? Onorab Lemiel sa konfizyon ki ou pe fer fas avek, 2025 kote zot pou ete Mr Speaker? Mon pa vwar zot. Parske nou pa pou konnen lo ki tiket zot pou lo la.

Letan Onorab Aglae in koz lo Perseverance, Roche Caiman, Providence, mon anvi dir ek zot Mr Speaker tousala se larzan *tax payer's money*. Larzan Lepep Seselwa. I pa larzan Onorab Aglae, ni Onorab Vidot. Wi nou pou rezouir tou sa ki pou Sesel. Wi nou pou kontinyen koup riban dan sa pei. Kontan pa kontan, *too bad e too late US!*

Seselwa ti fer konfyans *LDS* lo en moto "Sesel pou tou son zanf". Ki nou war dan Bidze? Tou Seselwa ki anvi travay pe travay. Sa Bidze i garanti tou Seselwa ki pe travay en 13enm mwan saler baze lo performans. Parey zot Minis Loustau-Lalanne ti dir k nou - baze lo performans.

Otomatikman ou garanti en 50poursan, larestan i depan lo ou performans pou ou donn tou koman sa Seselwa serye.

Eski travayer dan prive i pa pou benefisye avek sa li, 13enm mwan saler. I pa'n ganny touse li? Sa ki Onorab Aglae ti pe demande Mr Speaker

dan son Bidze Merkrede 17 Novanm atraver verbatim. Mon *quote* ki i ti dir le 19 Novanm 2021.

“E se sa ki nou ti dir, kantmenm 50poursan e menm 25poursan ki ava en bon zes pou sa pep ki’n travay dir pandan sa lepidemi. Nou demann Minis pou re al diskite me i paret ki zot sourd lo nou e lo sa pep”. Mon aret la.

Sa ki Onorab Aglae ti dir Mr Speaker dan Verbatim Lasanble Nasyonal. Be mon anvi dir avek Onorab Aglae Mr Speaker, Minis in ekoute, prezan met aksyon kot ou parol i ete Onorab! Vot lo nou Bidze!

**(APPLAUSE)**

### **HON SANDY ARISSOL**

E montre ou vre sipor lo sa bann group ners ki ou’n koz lo la, kot ou ti travay. Pa zis koze, koze me *walk the talk* Onorab!

Lekel ki’n anmenn 13enm mwan saler Mr Speaker? se *LDS* ki ti anmennen. Lekel ki’n siporte pou travayer ki dan prive swa dan piblik i ganny son 13enm mwan saler? *LDS* ki'n anmennen.

Lekel ki ti taye e pa vote parey labitid Mr Speaker? Parti Pa Nonmen lot kote. E zot in deklar zot lekor mesaze Lepep - Parti Pa Nonmen. Selman zot

taye ler pou vote apre zot ki tap lanmen lo latap e zot ki koz lo par Lepep. Letan Bidze pe tous en pe partou, mon anvi dir avek Minis ki Bel Ombre osi nou annan plizyer propozisyon.

Nou konblaz in ganny netwaye Minis i annan en lord ki'n ganny mete laba. E nou oule lenvestisman pou benefis nou zabitan. Nou anvi ki bann envestiser, bann zabitan Bel Ombre, ki santi kalifye pou vin devan vin rode ki mannyer nou kapab envestir pou nou kapab kre lanplwa pou bann dimoun dan nou distrik.

Dan lespas Corsaire nou’n ganny propoze desen, plan, la nou anvi ki Gouvernman i zwenn ek lezot sekter, lezot *stakeholders* pou nou kapab akonpli en lenvestisman kot *ex Corsaire*, ki'n la pou plizyer lannen. Zis plan in ganny montre, montre e montre.

Letan mon lo size lakaz mon anvi demann Minister Lakaz pou organiz bann Dokter ki reste *Fisherman’s Cove Estate* dan bann lakaz ki’n ganny dedye pou bann Dokter. In annan plizyer koze an relasyon avek kondisyon. Swa zot ganny vann sa lakaz e swa oubyen non ki pou arive avek zot ki’n okip sa lakaz pou plizyer lannen?

Plizyer zot anvi agrandi, zot anvi anbelir e okip sa propriyete. Me kondisyon pa kler. Fodre pa ki nou bann Dokter i travay anba *stress* ek lensertitid.

Alor mon ti avar kontan ki Minis Finans i vwar avek Minis Later e Lakaz ki pli bon kondisyon pou nou bann profesyonnel ki ganny ofer plizyer *package*. En pli bon *package* e a plizyer repriz e naryen pa'n materyalize sa bann letan ki zot in ganny ofer sa bann plizyer *package*. Alor mon dir mersi lo zot par davans.

Menm nou'n ganny sa pti slab pou *container* dan Bidze pa ase Mr Speaker. Mon anvi dir ek Minis pa ase. Nou peser i ankor pe espere en landrwa apropriye parey lezot in gannyen. Zot in ganny montre plizyer desen, plizyer plan.

Plan in sanze tirwar in vin kabinet, kabinet in vin laport, laport in vin lafnet. E naryen pa'n arive anba vye ladministrasyon.

Zot kontinyen ganny blanmen pou dezord, tapaz, me kote zot ale ler en Gouvernman iresponsab parey Parti Pa Nonmen in met zot dan milye en salon Bel Ombre.

Prezan tou dimoun i oule zot reste trankil, i oule zot reste trankil. En keksoz i bezwen

ganny fer pou nou bann pti kominote peser Bel Ombre Mr Speaker.

Plizyer proze semen, proze lakaz pa zis ex Corsaire *bedsitter*, Cameroon osi nou'n deza annan en plan e en nouvo proze pou plis lakaz pou Bel Ombre. Pou ki nou bann dimoun i benefisyen Mr Speaker.

En zoli plan semen pou larantre Lekol Beau Vallon Segonder ki deservi lekol primer, zis par deryer *Shell* Beau Vallon. En landrwa ki sere, konzeste e ki anmenn bokou lenkonvenyans dan bomaten pou paran, zanfan e osi bann ansenyan ki servi sa landrwa.

Ansanm avek Lotorite *Local Government*, Minis Finans pou nou vwar ki mannyer ansanm nou kapab fer en keksoz zoli, bon pou sekirite nou paran, zanfan. Parske sa i en keksoz ki ti ganny leve dan *meeting* ki ti fer avek bann paran.

Lalis i long Mr Speaker. Travay i la. Bokou trou pou nou bouse. E alor lo sa pwen mon ti ava kontan dir en mersi tou bann dimoun ki'n ede asiste, propoze, prezante siporte pou ki distrik i ganny en nouvo souf e nouvo kouler.

Ki Bondye i kontinyen beni tou Seselwa e beni nou pti pei Sesel.

E nou lo kote *LDS* parey nou'n dir Minis, nou pou donn ou *full* sipor. Si *LDS* ek Prezidan Ramkalawan pa ti sov nou pei, nou ti pou mor an trwa manner;- mor par laswaf, mor par lafen swa nou ti pou toufe dan sa nouvo parti ki zot in apel zot lekor Mr Speaker.

Avek sa detrwa mo mon ava dir ou mersi bokou.

**(APPLAUSE)**

**MR SPEAKER**

Bon deba in terminen.

**Hon JOHAN LOZE**

*(Off-Mic)*

**HON JOHAN LOZE**

*Point of order*, mon non in ganny nonmen. *Point of order* in nonm mon non. Mon pa'n nonm non personn mwan.

**MR SPEAKER**

Onorab si ou le laparol ou adres mwan en pe pli byen. Onorab mon pe demann ou sorti dan lasal, pou lafason ki ou'n adres mwan. Sorti. Ou pa kapab adres mwan koumsa. Silvouple. Mersi.

**(APPLAUSE)**

*(Disruption)*

**Hon JOHAN LOZE**

*(Off-Mic)*

**MR SPEAKER**

Mersi ou'n kriy ek mwan. Onorab. Sekirite mon pou demann ou ed Onorab Loze sorti dan lasal.

*(Disruption)*

**MR SPEAKER**

Laprosenn fwa ou ava konmans adres mwan.

*(Disruption)*

**Hon JOHAN LOZE**

*(Off-Mic)*

**MR SPEAKER**

Onorab. Bon deba in terminen.

*(Disruption)*

**MR SPEAKER**

Deba in terminen. Si ou annan-

**HON SEBASTIEN PILLAY**

*(Off-Mic)*

**MR SPEAKER**

Onorab Pillay si ou annan en *matter of privilege* adres mwan an ekrir. Mersi.

Bon, Minis mersi pou ou partisipasyon e bann Manm osi. Nou ava aret la e nou ava rezwenn demen bomaten pou repons Minis lo deba. Mersi.  
*Adjourn.*

***(ADJOURNMENT)***